





中國邊疆史志集成

內蒙古史志  
11

全國圖書館文獻  
縮微復制中心

殺之犯姦者本婦重責不離異姦夫重責又罰銀入官其幼童與女子姦者重責之配爲夫婦俗尙天主教不知朔望或二十九日或三十日或三十一日爲一月十二月爲一歲每歲按四季大齋四次或四十日或三十餘日以冬季大齋完日爲歲初平時皆逢七齋戒知節儉厭兵戎性矜誇貪得喜詼諧好詞訟每逢吉日男子相聚會飲醉則詠詞跳舞婦女不避生客爭相炫飾遊戲爲隊行歌於途卑賤見尊者免冠立

地而叩尊者不免冠平等相遇皆免冠立地而叩男子與婦人遇男子免冠婦人立地而叩以去髭髯爲姣好髮卷者爲美觀婚嫁亦用媒妁聘娶之日往叩天主堂誦經畢方合盞殯殮有棺俱送至堂內葬埋不飲茶服氈褐苧布以麥麩爲餅餌不爲飯每食用匙及小叉無箸俗尙貿易務農者少知種而不知耘不以牛耕居河濱者善泗用瓜種大小銀錢有值三文十文五十文百文者亦有紅銅錢與小銀錢通用以十

六寸爲尺十二兩爲觔千步爲里後改五百步  
爲里其木則有杉松馬尾松楊樺叢柳櫻菓榆  
刺玫其穀則有大麥小麥蕎麥油麥及稷其蔬  
則有蘿蔔蔓菁白菜王瓜芫荽倭瓜葱蒜獸畜  
則有駝馬牛熊狼堪達韓野猪鹿狗黃羊狐狸  
兔貂鼠銀鼠灰鼠磳鼠磳鼠行地中遇陽氣卽  
死身大有重萬觔者骨色白潤類象牙性最寒  
食之可除煩熱骨可成器彼中名麻門橐窪禽  
則有鷹鵬鷓鴣海青鴉鴨鷄又有聶木沁雞大

如鵝腳高尾短有蒼黑色而花紋者有白色青  
斑者其冠色不時變幻人稍侵之卽鳴翅立冠  
下垂比戶畜之俄羅斯稱西費耶斯科國爲聶  
木沁云魚則有鮡鰭鯉石斑鯽魴鱧鰻鴨嘴  
哈打拉他庫木舒爾呼松阿禪勾深牙魯四帖  
里烈帖鄂莫裏樂則有鐘鼓喇叭木笛哨吶銅  
絃箏胡琴其土宜風俗物產大略如此明時阻  
於朔漠未通中國

本朝順治十二年其國察罕汗始遣使來朝貢方

物

上嘉其誠款降

勅及

恩賜令來使齋回國

勅曰爾國遠處西北從未一達中華今爾誠心向化遣使進貢方物朕甚嘉之特頒恩賚卽俾爾使臣賚回昭朕柔遠至意爾其欽承永効忠順以副恩寵十三年遣使奉表來朝貢方物以來使不諳朝儀卻其貢而遣還之十四年復遣使奉表進貢途經



三載以十七年五月至表稱俄羅斯一千一百六十五年語多矜夸廷臣咸謂其不遵正朔宜逐之奏入得

旨察罕汗雖恃爲酋長表文不合體制然外邦從化宜加涵容以示懷柔俄羅斯遠處邊陲未沾教化乃能遣使奉表而至亦見慕義之忱來使著該部與宴貢物查收察罕汗及其使量加恩賞但不必遣使報書爾衙門可卽以表文矜詡不令陛見之故論而遣之

康熙十五年五月察罕汗又遣陪臣尼果賴罕

伯里爾鄂維策進貢方物奏言俄羅斯僻處遠方從古未通上國不諳中華文義及奏疏禮儀兩次抒誠致多缺失今特敬謹遣使奉貢仰祈矜宥得

旨准其通貢初順治間俄羅斯部落曰羅剎者竊據黑龍江築城雅克薩之地侵擾索倫達呼爾等及是諭察罕汗嚴禁羅剎毋擾邊陲而羅剎仍復潛侵淨理溪等處遷延不返二十一年八月遣副都統郎談公彭春率兵往達呼爾索倫覘羅

剎情形將行

上面諭曰羅剎犯我黑龍江一帶侵擾民人昔發兵進討未獲翦除近聞蔓延至赫哲費雅哈侵掠不已爾等此行可聲言捕鹿沿黑龍江行圍徑薄雅克薩城下勘其形勢度羅剎斷不敢出戰爾等還時其詳視自黑龍江至額蘇里水程並訪自額蘇里至甯古塔道里借薩布素往勘以聞十二月郎談彭春等自達呼爾索倫還以羅剎情形具奏

上諭議政王大臣等曰據郎談等奏攻取羅剎甚易朕

意亦以爲然第兵非善事宜暫停攻取於黑龍江呼  
瑪爾二處建木城遣甯古塔將軍巴海副都統薩布  
素以烏拉甯古塔兵千五百戍之相機集事二十二  
年四月巴海等奏言黑龍江呼瑪爾距雅克薩  
城遼遠若駐兵兩處勢分道阻儻羅刹增兵儲  
粟更難爲計宜乘其積儲未備速行征勦

上以所議未合機宜令巴海留守烏拉以副都統瓦禮  
祐偕薩布素統兵往俟抵彼相度形勢於可進  
之時奏請進兵又經王大臣等議請將建城駐

兵之處移於黑龍江呼瑪爾中間額蘇里之地  
并設四驛從之尋復於黑龍江建城以薩布素  
爲將軍領之設候於呼瑪爾自黑龍江至烏拉  
置十驛由水路挽運至黑龍江爲承戍地時羅  
刹之眾有過黑龍江者降其兵目三十餘人赦  
不誅並安插之九月

上諭理藩院尙書阿穆呼朗曰俄羅斯國羅刹等無端  
犯我索倫邊境匿報特穆爾等逃人朕不忍加誅屢  
行曉諭令歸故地還逃人迺執迷不悟轉肆焚掠因

特遣重兵駐守其地頃者羅利遇我將卒降其三十餘人朕體好生之德皆加參養今彼若悔過則已否則必干天討或路遠難歸傾心投誠者朕亦納之加恩撫恤使得其所爾院可遵旨具文遣來降番人宜番米海羅莫羅對再行往諭彼有何言令其回奏時羅利屬人多來歸者令編爲一佐領使彼此相依有資二十三年正月薩布素等奏言宜乘四月冰解時遣官兵先往招撫不卽降則進兵滅之尋報遣夸蘭達鄂羅舜等於正月十一日抵

羅刹境令宜番等造其居開諭之因以鄂羅春  
留質之子三人來并招撫米海羅等二十一人  
送京安插五月遣往軍前之輕車都尉瑪喇奏  
言羅刹之在雅克薩尼布楚二城者各止五六  
百人於額爾古訥河口至布爾瑪台河口十餘  
處築室耕田以自給喀爾喀與尼布楚人亦時  
與交易資生請令喀爾喀車臣汗禁止交易再  
令黑龍江將軍水陸並進作攻取雅克薩狀因  
取其田禾則羅刹不久自困量遣輕騎勦滅似

易時將軍薩布素等亦以收取羅利田禾爲宜  
隨降

旨令薩布素等酌議由水陸路進兵孰便并諭車臣汗  
知之尋以薩布素請停進勦坐失事機得

旨申飭十二月徵福建籐牌兵二十四年正月以瑪喇  
爲副都統參贊軍務先是

上以薩布素上疏引罪命都統公瓦山侍郎敦丕往會  
薩布素等詳議應否攻取之處至是瓦山等與  
薩布素會奏我兵於四月水陸并進先撫後勦



如不克則毀其田禾以歸

上因命都統公彭春督師命左都督何佑等率福建籐牌官兵五百人往發

盛京兵五百人代黑龍江兵守城種地再令降

勅諭曉羅刹使速回雅庫以息兵爭三月達呼爾頭目陪勒爾等往偵雅克薩情形擒羅刹噶瓦力喇等七人以歸噶瓦力喇等備述其酋約束所屬禁持兵器往來並懼懼求援狀

上命人給時服一襲俟大兵進勦時示以寬大之意而

釋之五月都統公彭春等率師抵雅克薩城下  
遵

旨宣諭促令歸巢羅剎遷延不還乃分水陸兵爲兩翼  
急進攻城中大驚頭目額里克舍等窮迫詣軍  
前乞降彭春等復宣

上恩德額里克舍率所部咸垂涕望闕稽顙受命遷歸  
雅庫彭春等復雅克薩城並以逃人還捷奏至  
上諭王大臣曰羅剎擾我黑龍江松花江一帶三十餘  
年其所竊據距我朝發祥之地甚近應速爲翦除是

以命將行師深入撻伐今收復雅克薩地得遂初心  
至於撫綏外國在使之心服不在震之以威近遣侍  
衛關保等往軍前諄諭之曰朕以仁治天下素不嗜  
殺爾其嚴諭將士毋違朕旨以我兵力羅刹勢不敵  
必獻地歸誠爾時勿殺一人俾還故土宣朕柔遠至  
意茲一一奉行朕甚嘉焉七月釋羅刹宜番等四人  
歸國十月以都統公彭春等爲頭等第一軍功  
二十五年正月羅刹復來城雅克薩地  
上命將軍薩布素等率所部兵二千往勦八月

諭薩布素等河冰將結熟籌防禦之法薩布素奏言於  
城三面掘濠築壘壕外置木椿鹿角分汛防禦  
城西對江另設一軍復派勦禦之兵於東西兩  
岸備江路來援之羅刹爲持久計時荷蘭國入  
貢使臣稱與俄羅斯接壤因

諭議政王大臣等向者羅刹犯雅克薩尼布楚地曾諭  
察罕汗來使尼果賚等撤回其眾竟不覆奏意尼果  
賚未達前旨於察罕汗復令被擒羅刹持書從喀爾  
喀地宣諭亦不復奏因發官兵招撫羅刹不戮一人

令其頭目額里克舍等持書歸去羅刹聞我師歸復據雅克薩朕思本朝頻行宣諭曾未一答而雅克薩羅刹又死守不去或尼布楚諸地阻隔前書未達或雅克薩羅刹皆彼有罪之徒不便歸國俱未可知其以屢諭情節爲書付荷蘭國使臣轉發察罕汗處令其收回雅克薩尼布楚羅刹於何處分立疆界則兩界人民均得甯居不失永相和好之意再依此作書發西洋國轉達之八月

命副都統博定率築城官兵二百人赴薩布素等軍前

參贊軍務九月察罕汗遣使上疏言

皇帝所賜之書下國無通解者及尼果賚歸始悉情節  
以下國邊民構釁請察明作亂之人收回正法  
除遣使議定邊界外謹先齎書以獻並乞撤雅  
克薩之圍

上諭大學士等曰俄羅斯以禮通好馳使請解雅克薩  
之圍朕本無屠城之意其令薩布素等解圍近戰艦  
立營城內羅剎聽其出入俟俄羅斯後使至定議二  
十六年正月遣太醫院官二人往視軍士之患

疾者令雅克薩城羅刹就醫無禁十月遣兵部  
尚書鄂爾多等往黑龍江籌議儲糧永戍之策  
二十七年三月察罕汗遣費岳多羅等至

上命領侍衛內大臣索額圖都統公佟國綱尚書阿喇  
尼左都御史馬齊護軍統領瑪喇等往二十八  
年十二月會議於尼布楚歸我雅克薩尼布楚  
諸城定議邊界一以北流入黑龍江之綽爾納  
卽阿倫穆河相近格必爾齊河爲界循河上流  
以至於海凡山南一帶流入黑龍江之溪河盡

屬中國山北一帶之溪河屬俄羅斯一以流入  
黑龍江之額爾古訥河爲界河之南岸屬中國  
北岸屬俄羅斯凡獵戶人等不許越界犯則擒  
治一切行旅有准往來文票者許貿易勿禁不  
留逃人議定乃盟立碑界上釋兵而還三十二  
年十月察罕汗遣使進貢嗣是遣使通市無間  
四十四年十一月俄羅斯貿易來使至

上閱其文字曰此喇提諾托忒烏珠克俄羅斯三種文  
也外國之文有三十六字母者亦有三十字五十字



辨字音類 卷二十一 三  
母者源與中國同但不分平上去而尙有入聲其兩  
字合音甚明中國辨四韻極精以兩字合音不甚緊  
要故知者漸少若中國所有之字外國亦有之特不  
全耳五十一年兵部職方司郎中圖理琛使土爾扈

特國假道俄羅斯奉

旨此役於俄羅斯國人民生計地理形勢均須留意歸  
而悉其山川風俗爲異域錄以獻其略曰歲在  
壬申五月二十日出都城宿沙河行六日出張  
家口六月初二日越興安嶺又十餘日至巴顏

布拉克當興安嶺上又二日至西拉布里度十  
六日至瀚海南界之阿爾哈林圖枯布爾十七  
日至瀚海中朱爾輝地十八日至瀚海北界之  
哈囊布拉克又四日至那拉特勞赤又三日至  
達布蘇台又三日地勢漸下七月初三日自鄂  
什欣布里度下興安嶺北至汗山東枯爾布里  
度其東南二十里許卽勦滅噶爾丹之招木多  
地也初五日至土喇河岸宿三日土喇河自根  
特山右發源向西流入發源杭愛山之鄂爾渾

河又黑魯倫河自根特山左發源向東流入呼倫河又東流爲額爾古訥河又東北流入黑龍江其鄂爾渾河環布隆汗山向西北流入色楞格河自此而北至俄羅斯國界皆山又十日至博拉爾旁皆山色楞格河自西南來向東北流入俄羅斯境又一日至蘇布克圖爲俄羅斯分界處又二日至楚庫柏興近色楞格河南岸河寬五十丈水清流溜楚庫河自東南來至柏興南十里入色楞格河二河交匯處及色楞格河

東岸民皆樓居無城垣四面皆山俄羅斯與蒙古人雜處俄羅斯官衣番薩非翅遣官兵列旗幟槍礮鼓吹迎導至公署張宴饋食執禮甚恭五十二年正月十四日有厄爾庫城頭目費多爾伊番訥翅准托波爾總管噶噶林移會遣俄羅斯官溫多里臥番那非翅以察罕汗命來迓楚庫柏興東北行二百餘里山高大多林藪濱河有田疇色楞格河自此折而西北流烏的河自東南來遶柏興之西入色楞格河山有石大

如掌層疊相附質薄而明如玻璃然可飾窗牖  
其頭日出妻子獻酒張樂跳躍以爲娛越三日  
至柏海爾湖南岸之博索爾伊斯科其間小柏  
興六七處間有田疇柏海爾湖在烏的柏興西  
北三百餘里南北百餘里東西千餘里色楞格  
河自西南來巴爾古西木河自東南來昂噶拉  
河自東北來俱入於湖別一河從湖西北流出  
亦名昂噶拉湖內有地曰鄂遠漢洲寬五十餘  
里長二百餘里洲上有山岡產杉松榆柳多野

獸布拉特蒙古五十餘戶居之湖內多魚及獺  
周迴諸山環抱林木蒼鬱煙波渺瀰極目無際  
二十二日至柏海爾湖北岸之果落烏斯那越  
三日至厄爾庫城沿途山不甚高昂噶拉河自  
東南來遶城向西北流厄爾庫河自西南來入  
昂噶拉河無墉垣有市井民樓居皆俄羅斯族  
少蒙古人跡矣凡附近小柏興皆厄爾庫城所  
屬號稱雄鎮頭目費多爾伊番訥翅以前途迎  
候官未至乞少留則相與騎射捕魚爲樂二月

二十二日迎候官博爾科泥册班訥非翅至日  
托波爾云河冰泮陸行多泥陷五月初四日乘  
舟下昂噶拉河河西北流厄爾庫河東入之水  
清溜急大於色楞格河兩岸高峯絕壁激浪如  
矢有五伯克八破落克九西費喇境絕奇儉俄  
羅斯語懸崖謂伯克瀑流謂破落克水石相激  
成湍溜處謂西費喇所謂五伯克者曰滅提別  
西曰巴達爾滿斯克曰多達爾斯克曰滅費斯  
克曰費達木克所謂八破落克者曰博合滅爾

訥曰皮牙乃曰巴敦曰多爾規曰沙滿斯克曰  
阿普林斯克曰木爾蘇克曰四鐵烈洛什所謂  
九西費喇者曰鄂標木索斯奈曰洛什曰柏格  
曰郭洛活瓦曰郭費般斯克曰噶什那曰鄂費  
夏那曰鄂爾吉那曰郭薩牙也昂噶拉河流千  
餘里水漸濁伊里木河自東北來入之濱河積  
雪有嵯峨至丈餘者閒有田疇把鋤而耕者順  
流十九日水程三千里至伊聶謝柏與西爲伊  
聶謝河昂噶拉河西流入焉又東北流入北海



者也伊聶謝柏興居民千戶俗多畜鹿以供乘  
載名曰俄倫其地去北海一月程夏至前後夜  
不甚暗日落猶可圍棋不數刻東方卽曙駐伊  
聶謝柏興五日乃舍舟而陸過麻科佛斯科嶺  
越宿至麻科斯科一小村落也在伊聶謝柏興  
西北二百五十餘里西傍揭的河河自麻科佛  
斯科佛落克嶺發源環流麻科斯科向西北流  
入鄂布河寬六七丈多紆曲水色赤多蚊虻土  
燕巢於河崖之間有鄂斯提牙斯科者其人別

一種類散處揭的河濱林莽間捕貂作貢又有  
西洋將軍雅那爾者爲俄羅斯所擄伊里木城  
頭目噉法林帖攜之來謁見中國衣冠不勝仰  
慕叩頭獻酒而去初五日登舟順河流晝夜行  
水程二千五百里十二日至那里木柏興卽揭  
的河入鄂布河處也鄂布河西北流一千四百  
餘里入額爾齊斯河又西北流入北海大於伊  
聶謝河水較濁而溜甚緩衍波四溢洲渚甚多  
濱河地平坦多林木二十四日至蘇爾呼忒柏

興越二日行六百里至薩瑪爾斯科額爾齊斯

河自南來向西北流河東岸有土山設驛站那

里木柏興蘇爾呼忒柏興薩瑪爾斯科地俱窪

下無田疇從托波爾托木斯科挽運以供食云

由額爾齊斯河遡流而上越六日至狄木濱斯

科在薩木爾斯科

臣秋濤謹案卽上薩瑪爾斯科也木一作瑪

西南

六百餘里額爾齊斯河至此東北流漸濁而大

越二日頭目專禮果禮者

臣秋濤謹案異域錄作濟爾果爾

同

舟赴托波爾城越九日至其地噶噶林馬提飛

費多里魚翅遣所屬俄羅斯官衣番鄂番那西  
赤迎候白河岸至公署儀衛尤肅噶噶林隨趨  
至執手叩請中國

至聖大皇帝萬安云今察罕汗幼時好與兒童爲戰鬪  
戲從前同戲諸兒今皆爲將二十年來我國戰  
甲不少解卽如沙漳汗恭喀爾汗費頁斯科國

厄納特赫國哈薩克國哈拉哈爾巴國

臣秋濤  
謹案一

作哈拉  
哈兒叭

策旺阿拉布坦阿玉奇諸國皆互相爭

競惟中國河山清宴洵爲極樂駐托波爾八日

城內天主堂二十餘駐兵二千前後所過諸柏

興皆有教堂設官兵此爲都會故尤盛額爾齊

斯河繞城之西濱河有庫車回人流離至此臣

濤謹案異域錄云原係庫程汗之人  
庫程汗乃俄羅斯所併之一國也俄羅斯人

名之曰塔塔拉自額爾齊斯河西南迤流入托

波爾河九宿至圖敏途中皆以塔塔拉供輓運

由圖敏西北迤土拉河舟行五百餘里至鴉班

沁多出疇不駐兵自是復捨舟而陸地勢漸下

越九宿至費耶爾和土爾斯科城在鴉班沁西

北四百餘里土拉河自西北來繞城東南流東岸石山巖業止二宿過費耶爾和土爾斯科佛落克嶺在城西北二百餘里嶺不甚大而峯巒競秀泉脈爭流野花爛然土拉河發源嶺東托波爾河發源嶺西別有喀穆河發源嶺北水色赤溜急折而西南流入佛爾格河嶺西北有山名帕付林斯科高出羣峯土人云冬夏積雪不消人迹罕至越七宿至索里喀木斯科在嶺西南二百餘里沿途皆山藪值大雪巖壑積素喀

木河自東北來向西南流有烏索爾科河自東  
北入焉西北境有方木鹽井四十餘越三宿至  
改郭羅多在索里喀木斯科西北四百餘里喀  
木河自西北繞而東南流有別爾馬羈人雜處  
其地與俄羅斯言語不通蓋又一部附俄羅  
斯有年者多田疇不駐兵自此西北行至莫斯  
科窪城二千二百餘里自改郭羅多越四日至  
索羅博達有西費耶斯科國人五千餘戶舊以  
被擄居此又一日至黑林諾付在改郭羅多西

南四百餘里有費牙忒喀河遶而西南流入喀木河地勢彌下沿途小柏興甚稠密田疇亦廣遙望林木鬱然俄羅斯全境凡入道自入俄羅斯界至此皆屬西畢爾斯科道噶噶林馬提飛費多爾魚翅所轄境也越六日至喀山在黑林諾付西南五百餘里佛爾格河喀木河夾左右而流有木城凡八門一面得二里周圍八里有郭外環以木爲鹿角置城隅別有車爾米斯及土爾扈特人居之車爾米斯人皆削髮言語殊



異亦別種也地設管理喀山斯科道總管顧比爾那忒費多爾薩馬落費赤統之又三日至西木必爾斯科在喀山南三百餘里有舊城形勢略如喀山城佛爾格河遶而西南流又西南五百餘里至薩拉托付爲俄羅斯土爾扈特接壤處時康熙五十二年十一月十六日也佛爾格河東北來遶而南流水漸濁溜緩土爾扈特人名之曰額濟爾河時俄羅斯博爾科尼册班諾費赤遣通事及頭目馳告土爾扈特國汗阿玉

奇於五十三年六月至土爾扈特國使事告歲  
旋返旆渡河七月下旬至喀山十一月初七日  
至托波爾十二月初五日噶噶林來見曰我察  
罕汗近在三皮提里普爾城此城舊屬西費耶  
斯科國地爲我國所有隨以我汗之名名之今  
歲我汗與西費耶斯科國戰勝之擄其護船二  
十一將軍一兵八百今付蘭楚斯諸國俱來援  
以是堅守不卽下曩時我國又與圖里耶斯科  
國王拱喀爾汗搆兵取其阿藻城近復議和併

還其城自阿藻城東北盡隸我疆矣又云我汗  
春秋四十一歷事二十八年曩時我國並未稱  
汗自依番瓦什里魚赤始稱汗至今二十三傳  
計三百五十餘載第十三代汗始征取喀山托  
波爾阿斯托爾汗諸地今已百六十年矣十二  
月二十二日乃啟行越七宿至塔喇斯科在托  
波爾東南一千二百餘里額爾齊斯河自東南  
來西北流塔喇河自東南來入額爾齊斯河越  
十四宿至托木斯科在塔喇斯科東南二千五

百餘里爲俄羅斯準噶爾哈薩克哈拉哈爾叭  
四國接壤處鄂布河自東南來西北流托木河  
自東南遶西而西北流至百里外入鄂布河有  
塔塔拉與巴爾巴忒人雜處夏秋飲行潦冬春  
食冰雪俄羅斯準噶爾兩國徵其稅入焉自托  
木斯科至伊聶謝一千六百餘里有楚里木河  
自麻科佛斯科山發源西南流入鄂布河又十  
日至伊里木城在伊聶謝東南二千餘里四面  
皆山林伊里木河自東北環流其城入通古斯

河自伊里木城往厄爾庫城東南行千有餘里  
由昂噶拉河舟行陸路亦可達餘略如來程所  
歷不複書云初凡通市諸物有噶噶林印記者  
准市餘則否五十六年七月俄羅斯邊城頭目  
以文來請於將軍托留欲私行貿易

上命托留移文切責之雍正五年三月察罕汗遣使表  
賀

上登極附貢方物八月遣郡王額駙策凌伯四格侍郎  
圖理琛等與俄羅斯使臣薩瓦定議自額爾古

訥河岸至阿魯哈當蘇阿魯奇都勒齊克達奇  
林俱爲我斥堠應以相對之楚庫河爲界自此  
以西沿布爾古特山等處以博木沙畢彙嶺爲  
界立石以誌不許越境滋事及容留逃盜人等  
犯者互相查拏並以恰克圖口爲常互市所人  
數不得過二百定例遣理藩院司官一員照料  
修京城俄羅斯館來京讀書幼童及教習等官  
給養贍願回者聽隨

召見薩瓦等

月丁酉

卷首上

欽定皇朝文獻通考  
二百

賞賜有差並優

賜察罕汗尋遣薩瓦歸國十月理藩院奏俄羅斯頭目  
郎喀呈請以商人馬匹牛羊留張家口外牧放  
從之令郎喀嚴約所屬毋許滋事遣司官一員  
照料並飭附近張家口諸總管如俄羅斯貿易  
商人馬匹牲畜遺失爲查而歸之勿俾困於行  
旅乾隆二年監督俄羅斯館御史赫慶奏言俄  
羅斯互市止宜在於邊境其住居京城者請禁  
貿易止令以貨易貨勿以金銀相售在京讀書

子弟不可任其出入使知內地情形輿圖違禁等物禁勿售與七年八月俄羅斯人越界斫柴得

旨申飭黑龍江將軍伯第務竭力巡察勿得仍前怠玩二十二年準噶爾平六月侍衛順德誦窮追阿睦爾撒納至額爾圖拉與俄羅斯喀比潭相見於額爾齊斯河上索阿睦爾撒納未得取喀比潭印狀歸七月有俄羅斯頭目來言曰阿睦爾撒納近以二人徒步投我國濟河無蹤疑死於



水矣參贊大臣富德率順德訥等往偵虛實時  
有達瓦齊屬人自俄羅斯境脫出者爲言本年  
七月初遇阿睦爾撒納攜入人人俄羅斯境被  
獲將軍兆惠等以

聞

特命理藩院移咨令遵不納逃人之例擒獻二十三年  
正月俄羅斯遵奉行移不敢諱匿述阿睦爾撒  
納避罪闖入我界渡河幾斃於水旋以痘死且  
出其尸於邊界之恰克圖城乃遣親王齊巴克

雅蘭品爾等驗而歸之俄羅斯西北境有數小  
部落曰西費耶斯科曰圖耶斯科曰博爾托噶  
里牙曰付蘭楚斯曰雅爾馬尼牙曰宜大里牙  
曰宜斯巴尼牙曰狄音曰和爾斯提音曰布魯  
斯奇曰博爾斯奇曰別穆斯奇曰賽薩林木斯  
奇曰昂假爾斯奇曰賀蘭斯奇曰博玻林木斯  
奇西費耶斯科者前以兵助俄羅斯汗依番瓦  
什里魚赤遂有俄羅斯之那爾瓦城後察罕汗  
索歸其城不許連兵不解者數歲卒爲俄羅斯

所敗二十六年

臣秋濤謹案當作三十六年蓋刻本偶誤一字也

土爾

扈特汗渥錫

臣秋濤謹案他書皆作渥巴錫

以俄羅斯征調不

息又徵其子入侍與合族台吉挈全部來歸中

國土爾扈特者準噶爾四衛拉特之一也渥錫

之曾祖阿玉奇與策妄不睦竄歸俄羅斯居額

濟勒之地至是歸附或謂不宜納俄羅斯之屬

部

皇上謂遠人來歸不可不納且舍楞卽我之叛臣歸俄

羅斯者一再索取訖未與我如以此折俄羅斯

彼將何辭以對卒納之俄羅斯卒不敢以此爲  
言三十年十一月奉

諭旨恰克圖貿易一事近因俄羅斯不遵舊制違背禁  
約甚且多收貨稅苦累商人是以降旨停止原以俟  
其自知悔過抒誠祈請再准其通商貿易恐桑齋多  
爾濟身係蒙古未能深曉事宜復派大臣前往稽查  
彈壓協同辦理其所以責成者甚重當桑齋多爾濟  
起意私通交易時丑達係特派大臣理應正言阻止  
阻之不從卽應據實參奏乃不惟不行阻止參奏並

且通同舞弊貿易多次覈其贓私竟至數千兩之多  
藐法營私殊出情理之外及經拏解來京尙敢冀免  
顯戮在路延捱負恩喪心實屬可惡此斷不可以一  
日容留丑達已依議正法至額爾經額係隨往司員  
若丑達等恪遵禁令嚴絕貿易則額爾經額決不敢  
自行罔利其情較丑達稍輕是以改爲應斬監候此  
中輕重權衡朕惟一秉至公毫無成見期協乎情罪  
之至當而已可將此曉諭中外並軍營辦事大臣知  
之四十六年正月奉

旨據車登多爾濟等奏俄羅斯之固必爾那托爾等呈稱遵伊主之令將現在住京之俄羅斯喇嘛學滿漢話之俄羅斯學生照例派出喇嘛學生前往更換請旨允准等語俄羅斯喇嘛學生住京已居十年著施恩卽照車登多爾濟等所奏准回必爾那托爾遣人更換

臣等謹案俄羅斯地處極北據使臣圖理琛所錄夏至前後不甚暗日落猶可圍棋不數刻卽曙而日出正與唐史所載骨利幹國事相符又

圖理琛所錄俄倫地去北海一月程

臣秋濤謹案前言伊

聶謝柏興去北海一月程其地產鹿名俄倫

而荷蘭入貢使臣稱與

俄羅斯接壤又其俗皆奉天主教與西洋諸國同豈其國近北海而又接西海歟在北魏時爲烏洛侯國疑侯字爲俟字之誤卽俄羅斯轉音耳然地雖荒遠亦不應使臣三四年而後歸伏讀

御製土爾扈特全部歸順記定爲俄羅斯故爲紆繞其程觀於土爾扈特之來祇八月而已至益可見

矣其國自羅刹歸誠以後恪守分界且遣使入  
貢幼童來京讀書洵所謂

聲教四訖臣古來未臣之國非甚  
盛德何以致此哉



朔方備乘卷首十一

舉人胡景杜初校  
廩生陳文煜覆校

朔方備乘卷首十二

欽定書八

欽定大清會典

理藩院典屬清吏司

凡互市商給以院票

各商至烏里雅蘇台庫倫  
恰克圖及喀爾喀各部

者皆給院票由直隸

出口者在察哈爾都統或

多倫諾爾同知衙門

領票由山西出口者在綏

遠城將軍衙門領票

以該商姓名貨物及所往

之地起程之期書單

黏合院票給與其已至所

往之處又欲他往者

許呈明該所至則令將軍

處將軍大臣扎薩克

改給執照

若大臣若扎薩克而稽察之

各商至烏里雅蘇  
台者由定邊左副

將軍兵部司官稽察至庫倫者由庫倫辦事大臣  
 臣本院司官稽察至喀爾喀四部落者由各旗  
 扎薩克稽察至恰克圖者出卡倫時由卡倫上  
 會商之扎薩克稽察至商集由恰克圖本院司  
 官稽察 頒其商禁 一年催回不准藉索欠為名潛  
 留各部落娶妻立產不准取蒙古名字無票者  
 即屬私商查出照例治罪逐回貨物一半入官  
 烏里雅蘇台北邊九站不准商民通市其烏梁  
 海等准於進貂之便在烏里雅蘇台城交易

置庫倫辦事大臣以司俄羅斯邊務東西會兩

將軍而理之

庫倫辦事大臣二人 一由在京滿洲蒙古大臣內 簡放 一由喀

爾喀扎薩克內

特派所屬庫倫本院司官

二人筆帖式二人恰克圖本院司官一人轄卡

倫會哨之各扎薩克以理邊務凡行文俄羅斯

薩那特衙門皆用庫倫辦事大臣印文其東黑

龍江境內則由黑龍江將軍呼倫貝爾副都統  
經理其西至近吉里克以西則由定邊左副將  
軍科布多參贊大臣經理皆**定其內外之界**康熙  
與庫倫辦事大臣會同酌辦  
二十八年平定羅剎  
大臣索額圖與俄羅斯國使臣費要多羅等定  
議一以流入黑龍江之綽羅那阿倫穆河相近  
格爾畢齊河為界循河而上自與安嶺以至於  
海嶺以南為內地嶺以北為俄羅斯地一以流  
入黑龍江之額爾古納河為界河以南為內地  
河以北為俄羅斯地雍正五年世宗憲  
皇帝命郡王額駙策凌與俄羅斯使臣薩瓦等  
定議白額爾古納河岸至阿魯恰當蘇河魯奇  
都勒齊克泰奇蘭等處以相對之楚庫河為界  
自此以西沿布爾古特山以博**設俄羅斯市於**  
木沙畢彙嶺為界各定立界石  
**恰克圖** 恰克圖商集以本院司官一人王之隸  
庫倫辦事大臣管理設書吏畢協齊該

班蒙古章京昆都瑪那奇等每歲支給口糧賞  
 需銀二百十二兩有奇又該司員給賞俄羅斯  
 瑪玉爾普爾魯克喀密薩爾等綢緞價值皆於  
 口北道衙門支領報銷商集分設入行選商之  
 良善殷實者為行首與眾商會同估定貨價該  
 司官按各商到集日期先後令以次交易蒙古  
 扎薩克及哲布尊丹巴呼圖克圖等差人來市  
 者價值百兩以下聽其交易百兩以上由扎薩  
 克及商卓特巴以印文咨恰克圖司官交各行  
 首交易後覆文遣回其有不肖商人希圖射利  
 頂冒者察出將該商與喇嘛蒙古等一併  
 治罪貨物入官扎薩克商卓特巴參處  
**以禁約乃與通市焉**  
 康熙三十二年定例俄羅斯  
 斯國人准其三年來京貿  
 易一次不得過二百人令自備馬駝到京時安  
 置俄羅斯館不支廩給定限八日起程禁物  
 不准買賣外一應貨物免其納稅五十九年始  
 准於庫倫互市雍正五年始准於恰克圖互市

乾隆年間屢經禁絕通市於三十三年四十五年五十七年三次皆因俄羅斯國遵守法制籲請開市始降旨允准五十七年與該國定約五條一恰克圖互市於中國初無利益大皇帝普愛眾生不忍爾國小民困窘又因爾薩那特衙門籲請是以允行若復失和罔再希冀開市一中國與爾國貨物原係兩邊商人自相定價爾國商人應由爾國嚴加管束彼此貨物交易後各令不爽約期卽時歸結勿令負欠致啟爭端一今爾國守邊官皆恭順知禮我遊牧官羣相稱好爾從前守邊官皆能視此又何至兩次妄行失和以致絕市乎嗣後爾守邊官當慎選賢能與我遊牧官逐願相接一恰克圖以西十數卡倫爾之布里雅特哈里雅特不法故致有烏喀勒咱之事今爾國宜嚴加禁束杜其盜竊一此次通市一切仍照舊章已頒行爾薩那特衙門矣兩邊民人交涉事件如盜賊人命各就近查驗緝獲罪犯會同邊

界官員審訊明確後本處屬下人由本處治罪  
 爾處屬下人由爾處治罪各行文知照示眾其  
 盜竊之物或一倍或幾倍罰賠一切皆照舊例  
 辦理據俄羅斯使臣一一悅服遵依出具甘結  
 存案

欽定大清會典事例

理藩院

俄羅斯互市 設庫倫辦事大臣二人一由在

京滿洲蒙古大臣內

簡放一由喀爾喀扎薩克內

特派所屬庫倫本院司官一人筆帖式二人恰克圖

本院司官一人轄卡倫會哨之各扎薩克以理邊務凡行文俄羅斯薩那特衙門皆用庫倫辦事大臣印文其東黑龍江境內由黑龍江將軍呼倫貝爾副都統經理其西至近吉里克以西由定邊左副將軍科布多叅贊大臣經理皆與庫倫辦事大臣會同酌辦 康熙二十八年議准俄羅斯邊境以流入黑龍江之綽羅那阿倫穆河相近格爾必齊河爲界自大興安嶺以至於海山之陽爲內地山之陰爲俄羅斯地 三



十二年議准俄羅斯國貿易人不得過二百名  
隔三年來京一次在路自備馬駝盤費一應貨  
物不令納稅犯禁之物不准交易到京時安置  
俄羅斯館不支廩給定限八日起程 又覆  
准俄羅斯察罕汗奏文與外國奏文體式不合  
將貢物奏文一併發回但該國地遠不知中國  
制度將原奏不合式之處明白曉諭來使

召見時照常

恩賜其帶來貨物仍令貿易嗣後俄羅斯奏文先令黑

龍江將軍開看若有不合式處卽自邊地駁回  
驗明合式方令人奏到京之日令來使於

午門前跪奉置黃案上行三跪九叩禮 又覆准

俄羅斯有私越邊界者應拏送該管官照所犯  
輕重治罪今俄羅斯復有潛至精奇里烏拉等  
處打貂行走恐伊等頭目不知應行文尼布楚  
城守尉查拏治罪並申飭該國人嗣後不許私  
越邊界如城守尉查拏不嚴卽行文該國察罕  
汗將城守尉一併治罪 五十九年議准哲布

尊丹巴呼圖克圖庫倫地方俄羅斯與喀爾喀  
互相貿易民人叢集難以稽察嗣後內地民人  
有往喀爾喀庫倫貿易者令該管官出具印文  
將貨物人數開明報院給與執照出何邊口令  
守口官弁驗明院照放行如帶軍器禁物立即  
查拏送院交該部從重治罪由院委監視官一  
人前往會同喀爾喀土謝圖汗等彈壓稽查二  
年一次更代 雍正五年議准喀爾喀恰克圖  
地方設立互市通俄羅斯貿易設監視官一人

由本院司官內揀選二年一次更代又

諭俄羅斯旣請將馬匹牲口留於口外收放著照所請  
爾院差司官一人前去照看嚴禁賊盜爭鬪此次所  
去司官著曉諭俄羅斯朗喀因爾等馬匹牲口在此  
收放特差理藩院官前來照看於所留人內選擇善  
爲約束者爲頭目令其約束屬下人勿令生事再行  
文與相近居住在之總管等各飭所屬用心收管禁止  
賊盜俄羅斯乃外域小國其馬匹牲口若有被盜遺  
失係何人地方卽著該屬總管等嚴查務獲如查覓

不獲該屬總管等卽照數賠還 又議准俄羅斯人

所居近山河者以山河爲界無山河之空地設立鄂博爲界自東邊之額爾古納河岸至阿魯哈當蘇阿魯奇都勒奇克泰奇蘭等處以相對之楚庫河爲界自此以西沿布爾古特山以博木沙畢龜嶺爲界各定立界石 九年奏准俄

羅斯買賣人來時喀爾喀土謝圖汗等報院具

奏請

旨委官一人馳驛前往恰克圖地方伴接沿途照看

其買賣人仍依原議不給口糧食物一應夫馬聽其自備由張家口至京路途歇寓令官兵護送看守到京進館後兵部奏派副都統及官兵看守買賣人出館行走皆令護軍等伴行

特簡內大臣部院堂官數人總理俄羅斯事務其監視貿易官二人開列侍讀學士科道等職名引

見簡用 十年奏准俄羅斯貿易事畢起程時照例委官撥兵沿途護送并開列監視貿易官等職名候

款語一人送至邊界 又議准駐劄喀爾喀庫倫恰

克圖兩處監視貿易司官向例皆馳驛前往二

年一次更代自備盤費惟駐劄喀爾喀三部落

偵探之司官每日各折給廩給銀一兩嗣後駐

劄庫倫恰克圖兩處監視貿易司官亦照此例

每日各折給廩給銀一兩 乾隆七年議准駐

劄庫倫司官改爲三年一次更代 十二年議

准恰克圖駐劄司官改爲三年一次更代 二

十四年議准庫倫恰克圖地方貿易事務日繁

駐劄司官應給關防各一顆 二十七年議准

派往庫倫辦事大臣三年更換由院開列請

旨

三十八年議准俄羅斯連界之珠爾台

臣秋濤  
謹案卽

珠爾台等十二卡倫駐劄官兵作爲三班三月一

換 四十四年停止俄羅斯互市 四十五年

復准俄羅斯互市一應章程均照舊例辦理外

其內地商民至卡倫時查驗部給執照與車輛

駝隻等數目相符另給執照俟至恰克圖時恰

克圖部員再行查驗如無卡倫所給執照不准



入市 又

諭嗣後沿邊地方有拏獲私走或逃出之俄羅斯男婦  
訊無別項情故者或將伊等放回或遣人送回俄羅  
斯以示我天朝不留彼處人民大體儻有成羣私來  
偷竊馬匹等項事故著拏獲後奏明請旨 四十九

年

諭恰克圖事務甚屬緊要所有恰克圖部員亦著隸駐  
劄庫倫大臣管理 五十七年遵

旨與俄羅斯定約五條一恰克圖互市於中國初無利

益

大皇帝普愛眾生不忍爾國小民困窘又因爾薩那特  
衙門籲請是以

允行若復失和罔再希冀開市一中國與爾國貨物原  
係兩邊商人自相定價爾國商人應由爾國嚴  
加管束彼此貨物交易後各令不爽約期即時  
歸結勿令負欠致啟爭端一今爾國守邊官皆  
恭順知禮我游牧官羣相稱好爾從前守邊官  
皆能視此又何致兩次妄行失和以致絕市乎

嗣後爾守邊官當慎選賢能與我游牧官遜順  
相接一恰克圖以西十數卡倫爾之布里雅特  
哈里雅特不法故致有烏呼勒咱之事今爾國  
宜嚴加禁束杜其盜竊一此次通市一切仍照  
舊章已頒行爾薩那特衙門矣兩邊民人交涉  
事件如盜賊人命各就近查驗緝獲罪犯會同  
邊界官員審訊明確後本處屬下人由本處治  
罪爾處屬下人由爾處治罪各行文知照示眾  
其盜竊之物或一倍或幾倍罰賠一切皆照舊

例辦理據俄羅斯使臣一一悅服遵依出具甘  
結存案 嘉慶二年奏定俄羅斯等除在恰克  
圖地方交易外其霍尼邁拉呼卡倫俱不准通  
商若由薩那特衙門行文卽將原文報明本院  
聽候辦理 四年奏定嗣後商人等仍照舊例  
由察哈爾都統歸化城將軍多倫諾爾同知衙  
門支領部票該衙門給發商人部票時將該商  
姓名及貨物數目所往地方起程日期另繕清  
單黏貼部票用印給發給發後卽知照所往地

方大臣官員衙門不准聽其指稱未及支領部  
票由別衙門支領路引爲憑貿易一經查出照  
無部票例治罪其商人部票著該地方大臣官  
員查驗存案務於一年內勒限催回免其在外  
逗遛生事如商人已到所往地方欲將貨物往  
他方貿易者卽呈報該處衙門給予信票一面  
知照所往地方大臣衙門再遇有私行貿易並  
無部票者枷號兩個月期滿答四十逐回原省  
將貨物一半入官 五年議准俄羅斯送給恰

克圖部員禮物應酌量彼處應用顏色綢緞賞  
給仍呈報駐劄庫倫大臣察覈開銷 七年

論恰克圖東西兩邊所設卡倫自明歲爲始著駐劄庫  
倫大臣每十年一次輪流親往稽察著爲例但俄羅  
斯等素性多疑歷年未見大臣親往查邊今忽見親  
率多人前往恐致驚疑務須於往查之前豫先明白  
曉諭俄羅斯等所以稽察之故特爲肅清邊界查理  
兩邊鄂博嚴緊內外卡倫而設並無他故不可妄生  
疑慮如此行之方妥 十年奏准將巡查鄂博之處

仍照舊由烏里雅蘇台每年派扎薩克一人巡查不必親往稽查

朔方備乘卷首十一

拔貢張惇德初校廩生陳文煜覆校

朔方備乘卷第一

聖式並各一

東海諸部內屬述略敘

臣秋濤謹案東海諸部今屬吉林省統轄地周二萬餘里古靺鞨諸國境也前代朔漠未賓幅  
帙不廣以靺鞨蒙古爲北徼我

聖朝

德教覃敷

天威遠震舉凡靺鞨蒙古悉屬內地以俄羅斯爲北



卷一  
徽恭查

盛京通志載

盛京統部北至俄羅斯界五千一百餘里然

盛京北距吉林實不與俄羅斯相接惟吉林東北  
隅三姓副都統地與俄羅斯密邇三姓所屬打  
牲採捕諸部落卽舊時東海諸部慕

德嚮

化久爲編氓是則爲

盛京屏障者吉林也爲吉林根本者東海諸部也

康熙年間羅刹侵擾至恒滾等地卽吉林所屬  
東海諸部舊壤此可見論北徼邊防不可不留  
意於東海矣欽惟我

朝

列聖柔遠綏民開疆益地凡最强最大之部落如蒙古  
喀部準部回部胥隸

旃幪設官莅治其事昭著惟東海諸部止設姓長鄉  
長未立專官是以

列朝戡定撫綏之偉績罕有知者曩時道員臣趙翼撰

皇朝武功紀盛自康熙中征討三藩之役以後悉有

述略而東海之事闕載厥後知州臣魏源撰

聖武記於征東海諸部事亦祇附見而未有專紀之篇

臣秋濤不揣固陋敬考羣書以述其略誠知

大烈耿光昭垂億禩卽欲繪天賦海末由形似萬一竊

以紀述

聖德自附於清廟生民之篇頌揚

神功追擬於車攻常武之什斯則歡忻抃舞之懷所不

能自己者爾

東海諸部內屬述略

東海諸部皆在長白山以東長白山為我

朝發祥之地松花江出焉北流至吉林又北轉東  
流合黑水為混同江逕甯古塔三姓以入東海  
水勢環抱拱衛

神京古肅慎渤海女真諸國相繼居此至明萬曆

年間諸國分建滿洲之部五曰蘇克素護河臣秋

濤謹案一作蘇克蘇濟河曰渾河曰完顏臣秋濤謹案曰棟

鄂臣秋濤謹案一作董鄂曰哲陳長白山之部二曰納殷

曰鴨綠江東海之部三曰窩集臣秋濤謹案曰

瓦爾喀曰呼爾哈魏源曰一作虎爾喀一作庫爾喀臣秋濤謹案滿洲源流

考庫爾喀與呼爾哈扈倫之部四臣秋濤謹案

曰葉赫臣秋濤謹案曰哈達曰輝發曰烏拉皆

金代部落之遺城郭土著射獵之國非蒙古行

國比也各主其方爭相雄長強凌弱眾暴寡而

扈倫四部最強皆在

### 興京之北今

盛京吉林兩將軍所轄境內至東海三部本明野

人衛地皆在甯古塔以東或瀕江海或居島嶼  
距明邊絕遠多役屬於扈倫之烏拉部厥後我  
朝奄有東海設吉林將軍統之亦以烏拉爲治所  
仍舊貫也

太祖高皇帝受命於天削平諸國於是滿洲五部長白  
山二部以及扈倫四部以次收入版圖其用兵  
最勤且征且撫者莫如東海三部及黑龍江之  
索倫等部蓋此諸部種族散處山林非有酋豪  
爲之雄長亦非如四扈倫之抗衡上國而

兩朝勞徠招攜之故則見於天聰八年

太宗諭諸將之征黑龍江者曰茲地人民語言騎射與  
我國同撫而有之卽皆可爲我用攻略時宜告以爾  
我先世本皆一國之人載籍甚明毋甘自外是故屢  
次用兵皆未嘗興大衆其收服之人卽校射藝  
區等第編旗披甲與兼弱攻昧之師不同茲謹  
依

欽定開國方略諸書詳考東海諸部內屬之事稽年月  
綴故實臚列於篇以便覽觀云

其索倫諸部內屬事詳見次卷

太祖高皇帝戊戌年春正月招降安楚拉庫路先是大  
臣費英東初征瓦爾喀部取噶嘉路殺部長阿  
球降其衆以歸至是以安楚拉庫路舊屬瓦爾  
喀部

太祖命長子褚英幼弟巴雅喇與費英東噶蓋統兵一  
千征之星馳而往取屯寨二十餘招降萬餘人  
而還於是褚英

賜號洪巴圖魯巴雅喇

賜號卓哩克圖

臣秋濤謹案滿洲源流考云安褚拉庫  
內河太祖丙申年征之取屯寨



三十餘與方略所記年分不同俟考己亥年春正月東海窩集部

之呼爾哈路長二人曰旺格曰彰格率百人來朝獻黑白紅三色狐皮黑白二色貂皮自是呼爾哈部朝貢時至其長博濟哩乞婚

太祖嘉其率先歸附因以大臣女六配其六長丁未年春徙東海五爾喀部斐優城之衆於內地先是丙申年陣獲烏拉布占泰釋歸主其國未幾布占泰以珍物銅錘送葉赫貝勒納林布祿又以我國所屬五爾喀部之安楚拉庫路內河路衆

所推服之三人送葉赫引其使人招誘安楚拉  
庫內河二路適有東海瓦爾喀部斐優城長策  
木特赫來朝告曰吾等因地方遙阻久附烏拉  
國今其國主布占泰遇吾等虐甚乞移家來附  
至是

太祖命弟舒爾哈齊長子褚英次子代善大臣費英東  
扈爾漢率兵三千至斐優城徙之時夜陰晦軍  
中大燾之上有光衆以爲異捫視無有復樹之  
光如初舒爾哈齊曰吾自幼從

上征討所見多矣未有此異其非吉兆耶欲還兵褚英  
代善曰或吉或凶兆已定吾等遽還將何以報  
命耶遂決意前進至斐優城盡收環城屯寨凡五百戶  
令扈爾漢率兵三百護之先行烏拉貝勒布占  
泰發兵萬人邀諸路扈爾漢見之令五百戶結  
寨山巔以兵百人衛之使人馳告後隊諸貝勒  
是夕烏拉兵萬人扈爾漢所率兵僅二百人各  
據山一面結營相持翼日烏拉以萬人來攻我  
大將揚古利馳至先衆奮擊斬烏拉兵七人我

兵止傷一人烏拉兵退渡河登山畏懼不敢前  
兩軍相向駐營日過午我後隊諸貝勒率兵齊  
至見烏拉兵甚多褚英代善策馬而前諭軍士

曰吾

父每有征伐無不摧堅陷敵今雖未親行而我等奉  
命來此爾眾何憂昔布占泰侵我國我國擒而縛之吾  
父宥其死復參養之歸主其國爲時未久人猶是人曾  
從吾手而釋非有天幸得脫也今豈不能再縛  
之耶彼兵雖多我國荷

並刀作手  
卷一  
天眷仗

天威吾

父威名夙著破敵兵必也衆軍士皆曰願効力遂渡河  
褚英代善各率兵五百分二路緣山奮擊烏拉  
兵大敗代善追及烏拉統兵貝勒博克多從馬  
上左手攬其胷而斬之時天氣晴明忽陰晦大  
雪寒冽被傷敵兵棄甲逃者僵仆甚衆是役也  
陣斬博克多及其子生擒貝勒常住與貝勒瑚  
哩布斬三千級獲馬五千匹甲三千副師還

太祖賜舒爾哈齊號達爾漢巴圖魯以褚英遇大敵率  
先擊敗其眾

賜號阿爾哈圖圖們以代善陣斬博克多又與兄並進  
克敵

賜號固英巴圖魯先是東海窩集部之赫席赫路鄂謨  
和蘇嚕路佛納赫托克索路並附烏拉

太祖遣人招之降弗從五月

太祖命貝勒巴雅喇大臣額亦都費英東扈爾漢率兵  
千人往征遂取三路屯寨俘二千人而還戊申

年九月窩集部之呼爾哈路千人侵我甯古塔城我駐防薩齊庫路兵百擊敗之斬百人生擒十二人獲馬四百匹甲百副餘衆悉降旣而降人有逃至窩集部之瑚葉路者匿弗以獻己酉年十二月

太祖遣扈爾漢率兵千人討之扈爾漢取瑚葉路二千戶而還

太祖嘉其功

賜號達爾漢賚甲冑馬匹時有歸附我國之窩集部綏

芬路長圖楞爲窩集部之雅蘭路人所掠庚戌年十一月招降窩集部諸路長時

太祖遣額亦都率兵千人往窩集部之那木都祿路綏芬路甯古塔路尼瑪察路招其路長曰康古哩曰喀克篤哩曰昂古曰明安圖曰烏魯喀曰僧額曰泥喀哩曰塘松阿曰葉克舒等來歸令其挈家口前行額亦都旋師至雅蘭路遂擊取之收萬餘人而還辛亥年秋七月取烏爾固辰穆稜二路先是窩集部來歸路長僧額尼喀哩二



人以

太祖所賜甲四十副置綏芬地爲窩集部之烏爾固辰

穆稜二路兵掠去

太祖遣呼爾哈部長博濟哩

方略曰卽己亥年率衆歸附者

往二路宣

諭歸還所掠弗從乃

命第七子阿巴泰同大臣費英東安費揚古率兵千人

征烏爾固辰穆稜二路俘千餘人而還冬十一

月攻克扎庫塔城先是東海呼爾哈路扎庫塔

人來降

太祖賜之甲三十副其人以所

賜甲送黑龍江濱之窩集部人被於樹以試射又貪烏  
拉國布疋受其貝勒布占泰招撫至是

太祖遣額亦都何和哩扈爾漢率兵二千往征扎庫塔  
城諭降弗從圍三日攻克其城斬千人俘二千  
人並招降環近路長曰圖勒伸曰額勒伸令率  
五百戶來歸癸丑年平烏拉國甲寅年冬十一  
月征雅蘭錫琳二路先是窩集部之雅蘭路人  
掠我所屬之綏芬路長圖楞我師征之有俘獲

係庚戌年事 至是

太祖遣兵五百征窩集部之雅蘭錫琳二路收降二百  
戶俘千人而還乙卯年冬十一月征克額赫庫  
掄先是窩集部東額赫庫掄人寄語我國之人  
曰人謂爾國驍勇可來與我等決一戰

太祖遣兵二千至固納喀庫掄招之不服遂布陣鳴螺  
越壕三層毀其柵攻克其城陣斬八百人俘獲  
萬人收撫其居民編戶口五百乃班師天命二  
年春二月丙申朔遣兵收海邊部眾時東海沿

邊諸部尙多未附

太祖遣兵四百往征凡散處部眾悉收之其島居負險不服者乘小舟盡取之而還四年正月庚戌

太祖遣大臣穆哈連率兵千人征東海呼爾哈路六月已未收其丁壯二千以還

駕出城撫之椎牛二十列筵二百來降路長分二等

賜賚上等者男婦十馬牛各十衣五襲次等者男婦五馬牛各五衣三襲其田廬器物具備馬十年三

月辛未征東海瓦爾喀部諸將曰喀爾達曰富

喀納曰塔裕攜降附之衆三百三十人以歸四

月初

太祖命族弟旺善大臣達珠瑚徹爾格統兵一千五百人征東海瓦爾喀部俘獲甚衆是月己卯

駕出城迎之庚寅至必音地行獵凡四日會于穆瑚覺羅地剗牛八祭蠶畢旺善達珠瑚徹爾格率軍

士朝謁

太祖問曰爾等所向俱利耶旺善對曰仗

皇上洪福所至皆利因叩首

太祖與三臣行抱見禮以獵獲獸百餘及所攜酒二百  
甕饗從征士卒及降附戶口還至瀋陽城北岡  
復以牛羊四十酒四百甕分列四百筵大宴勞  
之既入城又

賜從征士卒銀各五兩八月丁丑朔勞征克卦勒察軍  
初

太祖遣大臣雅護喀穆達呢率兵征東海卦勒察部俘  
獲二千人至是凱旋

駕出城宴勞之十月己卯勞征克呼爾哈軍初

太祖遣第三子阿拜第六子塔拜第九子巴布泰率兵  
一千由北路征東海呼爾哈部侍衛博爾晉備  
禦曰偉齊曰扎努曰塞紐克曰衷諾曰通貴曰  
尼堪率兵二千由南路征東海呼爾哈部博爾  
晉等招降五百戶先還

駕至津河

御行幄出征諸將率招來頭目朝見

賜宴而還至是阿拜等俘獲一千五百人以歸

駕復出城宴勞之十一年十月丙辰往征東海卦勒察

部大臣達珠瑚等以俘獲人口百餘及馬牛百餘還

太宗文皇帝天聰元年十二月長白山迤東濱海呼爾哈部三人來朝以黑貂皮入貢二年五月長白山迤東濱海呼爾哈部頭日曰禮佛塔曰布克善曰喀秀曰克伊克拉來朝各

賜鞍馬緞衣并弓矢橐韃三年秋七月乙未庫爾喀部頭日九人來朝以海豹皮入貢四年五月呼爾哈部二十一人來朝以貂皮入貢十一月那堪



泰路之呼爾哈人瑪爾圖等攜家屬來歸

命於甯古塔邊地駐牧五年

命大臣蒙阿圖率官八員兵三百人往征瓦爾喀

諭之日爾等行軍宜嚴紀律毋妄殺毋劫掠歸附之眾

皆編爲民戶攜還其所產貂皮及一切諸物毋得纖

毫私取若克建功績自加陞賞五年二月甲戌蒙阿

圖自甯古塔遣人奏報俘降男子千二百十九

名婦女千二百八十四口幼丁六百三名獲人

獲貂狐狍獐等皮及牛馬甚多三月甲午

駕出城十里外拜

天畢

御行幄凱旋主帥蒙阿圖遙拜一次近前復拜行抱見

禮副帥武巴海行禮同

詔獎蒙阿圖武巴海善於用兵出征勞苦設大宴特撤御膳賜之六年冬

命大臣武巴海率兵征烏扎拉部武巴海分八旗兵爲四路並趨渥赫河斬三百三十八人俘五百餘人獲馬三百七十貂狐捨獺獾貉虎狼等皮

前  
方  
命  
三  
一  
一  
千餘張裘二十餘領七年正月乙卯凱旋以所  
俘分

賜將士有差十一月

命大臣吉思哈武巴海率官八員兵三百人征朝鮮接  
壤之瓦爾喀部

諭之曰爾等勿專以俘獲爲念致降順之人復叛逃而  
去所俘婦女當擇謹厚人守護若有姦淫事覺從重  
治罪至將領士卒身欲休息止許弛弓晝寢若昏夜  
務擐甲上弦不可怠忽其八貝勒家人遇用兵處皆

令入伍聽調遣凡所俘獲令各自立營以無父母之  
子女分給守視爾領兵諸將嚴飭軍士不許任意乘  
馬馬正行時勿飲以水駐營時須散放滾塵先令食  
草然後飲以水其甯古塔拉發二處人可分爲三以  
二分留守一分隨征烏扎拉部落編戶人等亦令隨  
征有所俘獲任其自取八年五月甲辰吉思哈武巴  
海還至甯古塔遣人奏捷俘男子五百五十婦  
女幼稚一千五百獲馬一百九十四牛一百八  
十三貂狐貉獺獾獾黃鼠青鼠灰鼠等裘一

百六十三領皮二千二百五十張貂皮褥三緞  
四布一百二十人襪八十斤初八旗每旗分隸  
牛象二十五後漸增至三十至是九月甲戌

太宗諭貝勒大臣以吉思哈等俘獲之瓦爾喀人戶不  
必均隸八旗察明不足旗分撥補十一月使犬  
部蓋青屯頭目僧格率五十人來朝貢貂皮十  
二月癸卯遣大臣武巴海荆古爾岱率每旗將  
領一員每牛象甲兵一名共四百人往征瓦爾  
喀

太宗命管兵部貝勒岳託傳

諭曰茲命爾等往征瓦爾喀所至務謹慎從事各副委任不可怠忽聞尼滿地方有千餘人在彼築城屯駐爾等宜往略之至各屯戶多少武巴海盡知可取者量力取之有分達哩所居之屯宜率鄉導往前先取餘可次第略定凡此諸屯非有統帥哨防不過泄泄然散處各村落然其人雖愚耳目頗衆爾等自甯古塔啟行之日卽行防範毋令彼知覺伺其所在以智取之所有俘獲當加意守視時其衣食勿令凍餒前

遣達珠瑚以疎忽遇害念其効力年久著有勞績方  
令承襲世職爾等未能如達珠瑚之功儻不自慎欲  
希格外之恩不可得也夫攻略之後或俘人逋逃或  
自被戕害皆由與彼同處日久漫無防範以及戮辱  
其婦女所致前者正紅旗輝滿征瓦爾喀時所爲多  
不義爾等慎勿效尤亦毋以其物力豐足妄行多取  
彼既服從秋毫不可犯爾等其毋違朕命

臣秋濤謹  
案方略曰

達珠瑚於天聰元年征瓦爾喀爲俘  
卒所害故此次諭旨及之

九年正月

使大部索瑣科來朝四月武巴海荆古爾岱等

自甯古塔遣噶爾珠奏報收撫瓦爾喀壯丁五百六十人婦女五百口幼稚九十口又俘獲婦女六十口馬六十牛百貂狍獐獾等皮六百六十有奇裘三十八領六月丙戌遣章京曰塞紐克曰沙努曰喀克曰徹尼曰郎格曰穆爾泰曰佟阿圖曰昂金等八員率各旗每牛朶兵一名往迎所降戶口是月丁酉武巴海荆古爾岱等攜所招降瓦爾喀部人至

命禮部諸臣出迎大宴之



賜屯長分達哩蟒緞朝服并緞褂其餘諸人依次分給  
房屋衣服諸物仍以所獲

賜將士有差敘功陞武巴海荆古爾岱等世職並加世  
襲二次十月癸未復發兵征之每旗派官二員  
每牛象兵五名漢軍二名分八旗爲四路兩旗  
合進一路兩黃旗武巴海爲帥其副曰昂金曰  
謨默里曰叟塞曰鄂屯曰伊里布曰蒙格率兵  
二百九十七名進兵之地二曰額赫庫掄曰額  
勒約索取其地壯丁七百五十人兩紅旗多濟

里爲帥其副曰方金曰布爾薩海曰雅爾堪曰  
聶努克曰瑚什率兵三百五名進兵之地三日  
雅蘭曰錫琳曰瑚葉取其地壯丁七百五十七  
人兩藍旗扎福尼爲帥其副曰特穆祿曰諾穆  
齊曰多蘭曰托密善曰塞格率兵二百九十八  
名進兵之地二曰阿庫里曰尼滿取其地壯丁  
四百八十人兩白旗武什塔爲帥其副曰瑯糾  
曰和勒多曰拜斯哈爾曰瑚新泰曰滿岱曰宜  
爾海率兵三百三十七名進兵之地二曰諾囉

曰阿萬取其地壯丁一千一十四人仍各攜鄉  
導人以往出征主帥各授軍律一道其應取壯  
丁及鄉導人姓名俱載四主帥軍律中武巴海

武什塔軍律內增一款云烏扎拉部

方略曰卽  
天聰六年

武巴海  
征服者

百壯丁家勿得侵擾並往招伊兄弟塞

亨布克沙等之現居寧古塔者啟行之日兵部  
承政曰徹爾格曰伊遜率出兵大臣進見

太宗諭曰此番馬匹較前肥壯自京城以至出邊須令  
緩行休息旣久卽可兼程以進四路兵或有脫逃者

同時當記其數爾多濟里所往之地島嶼甚多有可  
取者造船取之如不可取當識之以爲後圖至其中  
有從我國逃去者可遣人往招之諭以昔時爾等逃  
亡因年歲不登之故今諸蒙古俱傾心內附爾等宜  
速來歸如此開諭自當輸誠恐後也

諭畢遂行十年

臣秋濤謹案  
卽崇德元年

三月庚申武什塔等奏言

八旗將士共俘獲壯丁一千一百六十名婦女

一百四十口馬三百二十七牛百八十所獲貂

狐狍獐獐等皮及人葭無算比還

命禮部官迎宴於五里外論功擢武巴海鄂屯等世職

並

賜諸將士人口馬匹貂皮布疋有差崇德二年正月癸

亥

太宗於朝鮮軍營遣外藩科爾沁扎魯特敖漢奈曼諸

部兵出朝鮮咸鏡道往征瓦爾喀

命蒙古衙門承政尼堪甲喇章京吉思哈牛象章京葉

克舒率每旗甲士十人導之以行道出會甯擊

敗朝鮮平壤巡撫兵二千人餘兵悉降五月十

九日至烏拉地方遣還蒙古十六旗兵七月己  
已復

命諸將曰喀凱曰塔克珠曰來虎曰舒書曰翁愛曰尼  
噶禮曰克布圖曰輝山曰恩古里曰雅薩諸巴  
曰巴爾噶曰遜綏曰赫德曰珠瑪喇曰綽貝曰  
塔哈布曰海塞曰蒙格曰哈什屯曰雅布喀曰  
棟果爾曰滿都祜曰占楚喀曰音達禮等率兵  
一千二百分爲四路往征瓦爾喀兩黃旗一路  
率阿庫里尼滿地壯丁一百名穆稜地壯丁四

十名烏爾固辰地南濟蘭牛朶下喀克篤哩兒  
弟等壯丁三十名共一百七十名以先來歸人  
曰圖必善曰分達哩曰瑪哈達爲鄉導兩紅旗  
一路牽綏芬壯丁七十名雅蘭壯丁四十名瑚  
葉壯丁二十名烏爾吉壯兵七十名共二百名  
以先來歸人曰圖球曰恰塔曰齊什訥爲鄉導  
兩藍旗一路牽額赫庫掄壯丁六十名額勒以  
東塞木克勒以西壯丁五十名共一百十名以  
先來歸人曰愛韜曰多爾周曰常濟里曰濟布

楚爲鄉導兩白旗一路率諾囉阿萬壯丁三百  
名以先來歸人曰雅爾布曰佛得密曰封濟達  
曰蘇布特赫爲鄉導十月癸亥諸將遣六人奏  
捷言兩黃旗舒書塔克珠率甲士六十人入烏  
爾固辰所獲曰塞約曰愛塔哈曰佛珠曰武克  
星額曰塔克圖男子三十名家口八十馬七十  
有三兩紅旗恩古里克布圖率甲士六十人入  
綏芬所獲曰剛球曰畢爾哈木曰巴爾珠男子  
二十八人家口六十五兩白旗哈什屯滿都祜



至所入汎地所獲曰吉木善曰伊訥肯曰索畢  
伯得根曰哈里瑚曰阿爾珠曰克木訥曰畢爾  
珠男子一百三十人家口三百三十馬八十有  
三並獲貂狐獐獐獐水獺等皮張甚多於次年  
四月師還

賜新獲瓦爾喀男婦幼稚等衣服居室器用牲畜等物  
并

賞喀凱等從征兵丁銀兩有差十二月

太宗率諸王貝勒等西獵於大草灘及卓索圖爾格尼

等處

命葉克舒爲右翼大臣星訥爲左翼大臣與其下曰阿  
福尼曰赫葉訥曰瑪喇希曰喀木齊哈曰喀爾  
喀瑪曰鄂謨克圖曰薩哈納曰穆成額曰叟塞  
曰阿林曰巴雅爾圖曰塞赫曰哈喇勒岱曰訥  
爾特曰穆圖曰希福等率兵六百往征卦勒察  
部葉克舒星訥等師至薩哈勒察俘獲男子六  
百四十名家口一千七百二十名馬一百五十  
六匹牛一百有四頭三年四月

盛京留守諸王遣兵部啟心郎占巴等齋疏以  
聞遣禮部承政庫魯克達爾漢阿賴祝世昌姜新等迎  
宴之尋以所獲薩哈勒察等衣服

賜兩翼大臣并

賞從征將士銀兩有差四年七月先是東方瓦爾喀部  
眾叛入熊島至是

太宗命朝鮮國王李倣以舟師攻熊島擒其首嘉哈禪  
等縛送

盛京將同謀叛逃之人分別議罪仍遣四將曰薩

爾糾曰英古曰納爾泰曰錫圖等率兵六百人往  
瓦爾喀收其餘黨

諭曰爾等可於拉發地方牧馬前進兵少宜合爲一隊  
以行勿貪得輕殺勿妄取爲俘抗拒者諭降之殺傷  
我兵者誅戮之歸附之人編爲戶口令貢海豹皮諭  
以棄惡從善勉爲良民軍行往返勿侵擾朝鮮境地  
薩爾糾英古等遂攜嘉哈禪同往收捕餘黨五  
百人五年閏正月甲申

命戶部行文朝鮮國王令所在官員計口給糧俟我軍

同時報明數目於額貢鳳凰城米內開除奏報  
並

敕諭薩爾糾英古等曰爾等所率軍士及收獲人口並  
嘉哈禪等所需口糧已諭令朝鮮計口給予勿令多  
索至所獲人口內有強暴不可信者約束前來餘俱  
仍留彼處擇其中可任使者一人統之如無可任使  
之人卽付與先降之嘉哈禪賴達庫分管二月丙辰  
太宗遣多濟里喀珠等率八旗甲士八人嚮導四人往  
甯古塔會同章京曰鍾果兌曰達敏等酌帶兵

三四百名往征烏扎拉部

諭曰爾等此行或由水路或由陸路往返宜速務以兵扼其重地若得其地將遲誤貢獻及欺誑之人執之以歸凡事公議而行毋得怠忽五月甲辰戶部啟心  
郎布丹等白

### 盛京至錦州

御營奏薩爾糾等征瓦爾喀部俘獲男子三百三十六人歸降男子一百四十九人內有捕海豹二百四十三人捕貂鼠一百九十八人仍居彼地攜

來者四十四人俘獲家屬七百九十六口歸降  
家屬四百八十一口攜來者八十三口又來朝  
者曰羌都曰蘇拉庫曰塞木得三人輝克地方  
朱吉喇一人及先降之賴達庫與嘉哈禪之子  
曰奇喇納曰艾都曰達松阿曰託和訥俱至尋  
以所獲壯丁四十二人充補各旗披甲之缺額  
者其歸降一百四十九人及新獲二百九十二  
人俱留置鄆朱屯中令每年貢貂皮海豹等物  
時多濟里等至烏扎拉俘獲百有十人於六月

癸酉師還

命於五里外迎宴之以烏扎拉壯丁四十三人補各旗  
披甲之缺額者

賜多濟里喀珠鍾果兌等各貂皮五十布三十其從征  
將士各論功分

賞貂皮布疋有差七年九月

太宗命二將曰沙爾琥達曰珠瑪喇率將士往征松阿  
里江之呼爾哈部閏十一月沙爾琥達等遣人  
還奏喀爾喀木屯遮克特庫屯塔圖庫屯福提



希屯鄂爾琿屯幹齊奇屯庫巴察拉屯額提奇  
屯薩里屯尼葉爾伯屯十屯人民俱已招降於  
月之初十日自松阿里江旋師八年正月辛亥  
師還

命禮部官迎宴入城計獲男婦幼稚一千六百十九人  
牲畜六百三十有奇

命給新獲男婦衣服房屋及所用器皿分補各旗人丁  
缺額者敘功

賜沙爾琥達珠瑪喇等各緞布有差自是東海諸部悉

隸版圖順治十年始於甯古塔設昂邦章京副都統以鎮守之康熙元年改昂邦章京爲鎮守甯古塔等處將軍十五年移將軍駐吉林烏拉留副都統鎮守甯古塔三十年設白都訥副都統雍正元年設甯古塔值年御史一年而更三年設阿勒楚喀協領一員四年於吉林設永吉州於甯古塔設泰甯縣於白都訥設長甯縣俱隸奉天府七年罷泰甯縣設三姓副都統乾隆元年罷長甯縣併歸永吉州九年設拉林副都

前  
一  
三  
統十二年罷永吉州改設吉林理事同知二十  
一年設阿勒楚喀副都統二十二年改甯古塔  
將軍爲吉林將軍自是始稱吉林省三十四年  
罷拉林副都統此設官莅治之大略也按東三  
省駐防兵有老滿洲有新滿洲猶史言生女眞  
熟女眞也

國初收服諸部往往遷其家屬於

盛京選其壯丁入旗披甲故凡種人之能成數佐  
領數十佐領者咸歸於滿洲若瓦爾喀若呼爾

哈若葉赫若輝發若烏拉若哈達今皆無此名  
目蓋已歸入滿洲故也其順治康熙年間續有  
招撫壯丁願遷內地編佐領隸旗籍者則以新  
滿洲名之

國語所謂伊徹滿洲也至東北邊部落來甯古塔  
納貢者或謂之伊徹滿洲或仍其部落之名每  
年四月至六月以次入貢自甯古塔東北行四

百餘里居呼爾哈河松花江兩岸者曰諾雷臣

濤謹案一作鬧雷一作  
拏耶勒天聰五年朝貢曰克宜克勒臣秋濤謹  
案一作革

依克勒一作克益克曰祜什哈哩臣秋濤謹案

勒崇德二年朝貢一作祜什喀

禮一作虎習哈禮此三喀喇臣秋濤謹案喀役

崇德三年朝貢此三喀喇喇漢言姓也

屬久其頭目壯丁漸移家內地編甲入戶有服

官於

京師者初以魚皮為衣後被

德化冠服修飾柳邊紀略曰俗稱窩皆稱伊徹滿洲

臣秋濤謹案伊徹一其地產貂三姓城即因三

作異齊一作伊車

喀喇為名也自甯古塔東行千餘里居烏蘇里

江兩岸者曰木掄臣秋濤謹案一作木輪一作

木倫一作穆連一作穆稜一

倫作亦俗類窩集產貂又東二百餘里居尼滿柳邊

紀略作伊瞞河源者曰奇雅喀喇會典圖作奇雅喀爾柳邊紀略作欺

喇牙喀其人黥面地產貂無五穀夏食魚冬食獸

以其皮為衣自甯古塔東北行千五百里居混

同江黑龍江兩岸者曰赫哲喀喇臣秋濤謹案此從滿洲源

流考柳邊紀略作剃髮黑金喀喇通志作赫錦喀喇一作赫真俗類窩集產貂

以上皆每年入貢又東北行四五百里居烏蘇

里江混同江黑龍江三江匯流左右者曰額登

喀喇臣秋濤謹案此從通志柳邊紀略作不剃髮黑金喀喇滿洲源流考亦曰赫哲喀喇

東海諸部內屬述略

赫一作真其人披髮鼻端貫金環衣魚獸皮陸行乘

舟或以舟行冰上駕以犬

柳邊紀略曰御者持木篙立舟上若水行

攔頭者然所謂使犬國也其語與窩集異無文字筆

墨裂革以記事如古之結繩然地產貂

通志曰自甯古

塔水路至其部東北界共四千五百餘里又東北行七八百里曰飛

牙喀

臣秋濤謹案一作費雅喀

俗與額登喀喇同而赤股無

袴以皮蔽其前自甯古塔東北行三千里曰奇

勒爾

臣秋濤謹案一作欺勒爾

濱大東海俗產與奇雅喀喇

同以上各部皆三年一貢

柳邊紀略曰凡歲貢者除賜衣冠

什器之外宴一次固山達以下陪宴三年 又有  
一貢者宴三次甯古塔梅勒章京陪宴

使鹿鄂倫春使馬鄂倫春二部

臣秋濤謹案鄂倫春一作俄倫

春一作鄂樂春皆在混同江北岸使鹿部在使馬部之外使馬鄂倫春距齊齊哈爾城五六百里使鹿鄂倫春距齊齊哈爾城千餘里 又有遠在海中不能至甯

古塔之庫葉一部每年六月遣官至距甯古塔

三千里之普祿鄉收貢頒賜

魏源曰又有不編佐領之使鹿部曰

奇勒爾日費雅喀與海中之庫頁島皆更在鄂倫春之外每歲不能以時至甯古塔則以六月期集於三千里外之普祿鄉而章京舟行如期往受之斯則不惟非滿洲亦非索倫等部幾同土番羈縻矣臣秋濤謹案庫葉島所居凡三種日庫葉日費雅喀日鄂倫春所居既遠自與海



以內各部習俗稍別紀載未能詳也普祿鄉當  
卽普隆靄噶珊亦作蒲壟噶山在庫葉島之西

偏凡此諸部皆滿洲所屬故會典不列於理藩

院然赫哲費雅喀來京娶婦則禮部光祿寺供

筵燕

盛京工部供薪藁略如蒙古儀蓋皆遵用

國初撫循東海諸部舊典也異域錄載俄羅斯伊

聶謝柏興有一種人乘鹿者呼鹿曰俄倫此可

見俄倫春命名卽以使鹿之故而東北濱大拉

該海諸地壤接俄羅斯習俗大略相同康熙初

年羅刹犯境自牛滿河東抵恆滾侵擾赫哲奇  
勒爾等部又有自北海來之羅刹與費雅喀人  
戰又脅取鄂倫春部質子勢甚蔓延我

聖祖仁皇帝神武布昭勦撫並施始臻平定二百年來  
東海諸部共樂昇平以自古荒遠不聞之地遠  
至邇安億兆蒙福如此

聖德

神功夔乎莫並矣

朔方備乘卷一

拔貢張惇德初校  
知縣吳壽坤覆校

朔方備乘卷第二

聖武述略二

索倫諸部內屬述略敘

臣秋濤謹案黑龍江爲東三省之一其地居人不盡索倫也有滿洲有漢軍則徙自吉林有巴

爾呼

一作巴爾虎

有鄂勒特

卽額魯特之異文

則歸自蒙古

有達呼爾有俄倫春有畢喇爾則其同鄉而別爲部落者世於黑龍江人不問部族概稱索倫而黑龍江人居之不疑亦雅喜以索倫自號說

者謂索倫驍勇聞天下故藉其名以自壯茲記  
黑龍江諸部事蹟以索倫冠之職是故也我

太祖高皇帝開國之初多用兵於

盛京吉林之境然尼堪外蘭築城鄂勒歡實今齊  
齊哈爾之地蓋遁居僻遠思遁天誅而

聖皇親御桴鼓卽日蕩平征討及於龍江實自茲始厥  
後

命帥奏功則有若黑龍江之薩哈連呼爾哈等部薩哈  
連卽黑龍江之別名呼爾哈卽布特哈之音轉

與東海之呼爾哈部  
族同而地域異也 及

太宗文皇帝纘緒詰戎屢征索倫並取雅克薩鐸陳諸  
城於是諸部畏

威懷

德來享來王幅員有截式廓日增誠亘古未有之盛事  
也自索倫諸部既平而俄羅斯國亦以是時略  
地而東遂於順治年間竊據雅克薩地侵擾索  
倫等部垂四十年賴我

聖祖仁皇帝廟謀先定築城運糧屢奏克捷察罕汗上

書請和立石定界索倫諸部遂得並臻清謐而  
黑龍江之建爲省會肇基於此敬述原委於以  
見

列聖謨烈萬世永賴云

索倫諸部內屬述略

索倫諸部者黑龍江省土著之民也黑龍江省  
以水爲名地在吉林之北東西三千餘里南北  
四千里後魏時爲黑水部屬勿吉唐曰黑水靺  
鞨跨江分南北部黑水部之北爲思慕靺鞨郡

利靺鞨窟說靺鞨近西北者爲室韋部唐會要  
言思慕等部南與渤海德里府接東至大海北  
至小海今考黑龍江極北有小海卽泰西人所  
謂大拉該海也北史所云于已尼大水卽北海  
者當卽指此其地溟渤遠環興安層抱重江疊  
嶂控扼諸藩雖遼金之盛亦止統轄其南境至  
其北境則歷代皆羈縻之地不能列入版圖也  
國初時有薩哈連部臣秋濤謹案薩哈連部雖屬  
東海然其地實在黑龍江城  
之東當時各部地域相錯類如此今以濱  
黑龍江地皆類載於此卷以便檢閱云卦爾



察部薩哈勒察部呼爾哈部索倫部又有音達

琿塔庫喇喇路諾囉路錫拉忻路皆附近薩哈

連部者又有博和里屯諾爾噶勒屯都里屯小

噶里達蘇屯大噶里達蘇屯綽庫禪屯能吉勒

屯皆呼爾哈部之別也又有瑚爾布爾屯臣秋

案一作扈沃呀屯臣秋濤謹案烏魯蘇屯塞布

奇屯臣秋濤謹案郭博爾屯臣秋濤謹案額蘇

哩屯阿里岱屯臣秋濤謹案克音屯臣秋濤謹案

殷海倫屯裕爾根屯固濃屯昆都倫屯烏蘭屯

皆濱黑龍江又有多科屯噶勒達遜屯穆丹屯

臣秋濤謹案

一作納太丹都孫屯

臣秋濤謹案

一作尼都遜烏爾堪屯

臣秋

濤謹案

一作德篤勒屯

臣秋濤謹案

一作德都爾鐸陳城阿薩

津城雅克薩城多金城及博木博果爾暨使鹿

之喀木尼堪部皆索倫部之別也我

太祖高皇帝於癸未年征尼堪外蘭克圖倫城尼堪外

蘭遁於嘉班越兩月

太祖復率兵征嘉班尼堪外蘭攜其子及兄弟數人逃

於鄂勒歡地築城居之鄂勒歡

臣秋濤謹案  
一作鄂勒琿在

齊齊哈爾城西南三十餘里周二里許丙戌年

秋七月

太祖率師往征鄂勒歡克其城尼堪外藺遁入明邊境

旋伏誅此我

朝用兵黑龍江地之始天命元年七月丁亥

太祖遣大臣安費揚古扈爾漢率兵二千征東海薩哈

連部二臣行至烏勒簡河剗舟二百水陸並進

取沿河南北三十六寨八月丁巳駐營黑龍江

南岸江水常以九月始冰是日衆見他處未冰

獨我營近地距對岸二里許結冰如橋約廣六十步皆以爲異安費揚古扈爾漢曰觀此冰橋天佑我國也遂引兵以渡取薩哈連部十一寨及兵還舊所過冰橋已解其西偏復如前結冰一道我兵旣渡冰盡解後至九月仍應時而冰遂又招服音達琿塔庫喇喇路方略曰卽使犬路諾囉路錫喇忻路師於九月甲午凱旋三年二月音達琿塔庫喇喇諾囉錫喇忻三路路長四十人率百餘戶來歸

太祖命以餼糧及馬百匹迎之授官有差各給與奴僕  
牛馬田廬衣服器用無妻者並令婚配十一月  
乙亥東海呼爾哈路長納喀達率百戶來歸  
太祖遣二百人迎之

御殿受朝設宴

諭令挈家口願留我國者爲一行未攜家口而願歸者  
爲一行分別聚立

賜願留者爲首八人各男婦二十口馬十匹牛十頭錦  
裘蟒服并四時之衣田廬器用諸物畢具部衆

大悅其願歸之人感激乞留甚衆乃因還家者  
寄語曰他國之軍士欲攻伐以殺我等俘掠我  
家產而

上以招徠安集爲念收我等爲羽翼

恩出望外我鄉兄弟諸人其卽相率而來無晚也十  
一年十二月黑龍江二十六人來朝貢犬及黑白  
紅三色狐皮黑貂捨獐獐水獺青鼠等皮

太宗文皇帝天聰五年六月黑龍江有五頭目曰伊扎  
納曰薩克提曰伽期納曰鄂哩喀曰康柱來朝

聖祖諭曰齊齊哈爾地方以索倫達呼爾之衆酌量令其披甲駐防遣滿洲兵二百人往彼教訓之伊等居址附近亦心樂披甲如此既無遠徙之苦亦不致需用糗糧矣自是遂爲定制今黑龍江將軍所屬八旗

兵滿洲漢軍之外有索倫兵達呼爾兵俄倫春兵畢喇爾兵皆土著之戶而附以自蒙古遷往之巴爾呼兵鄂勒特兵是爲黑龍江八部落云說者謂索倫本遼之後裔散處山谷挽強命中

洞兇虎跡奔獸

龍沙紀略曰索倫音近蒙古間雜漢語挽弓十石能自縛於樹

射熊虎洞穿負之而歸馬有逸失者雖數百里外皆能蹤跡得之 雄於諸部自

康熙以來編旗給精訓以紀律平時自應其役軍興皆聽調撥往往以勇猛敢戰取翠翎珊頂及巴圖魯名號如寄此海內所以稱勁旅也又索倫族類至繁有敖喇都喇爾布喇穆等姓多居布特哈呼倫貝爾境而齊齊哈爾等三城較少亦有流寓俄羅斯者其國謂之喀穆尼漢又謂之通古斯蓋羅刹作亂劫去者西清黑龍江外紀云數十年前嘗有願歸故土之請今不聞



來朝以貂皮一千八百一十八張入貢丙申

命大臣阿什達爾漢伊拜往科爾沁調兵隨征大軍西

發之次日渡遼河抵陽什穆河沿河立二十營

伊拜從科爾沁至奏言噶勒珠塞特爾

方略曰科爾沁

貝勒額爾濟格之子

海賴

句

布延岱

句

白固類

句

塞布類

等託言往取北方索倫部財賦自給各率部眾

叛去科爾沁土謝圖濟農扎薩克圖杜稜

句秉

圖貝勒

句

卓哩克圖貝勒

句

已率兵往追之矣

太宗遣戶部承政英固爾岱文館舉人敦多惠回

盛京傳

諭留守貝勒曰可亟令索倫部來朝頭目巴爾達齊速  
還國恐致噶勒珠塞特爾等襲取其地宜善言訓諭  
而遣之又

命巴克什希福同伊拜往科爾沁傳

諭曰法律所載叛者必誅爾科爾沁貝勒若獲噶勒珠  
塞特爾等欲誅則誅之不誅欲以其人民爲奴者聽  
六月乙亥希福還奏土謝圖濟農等已追殺噶  
勒珠塞特爾等五人盡收其戶口冬十月壬辰

索倫部巴爾達齊又與同部曰景古齊曰哈拜  
曰孔恪泰曰烏都漢曰訥赫徹特白曰哈爾塔  
等率三十五人來朝以貂狐皮入貢十二月壬  
辰

太宗命大臣巴奇蘭薩木什喀分左右翼率官四十一  
員兵二千五百名往征黑龍江地方

諭之曰爾等此行道路遙遠務奮力直前毋怠毋忽至  
俘獲之人須善言撫慰飲食甘苦一體共之則人心  
歸附必衆且此地人民語言與我同攜之而來可以

爲我用攻略時宜諭之曰爾之先世本皆我一國之人載籍具在爾尙未之知是以甘於自外我皇上久欲收服時有未暇耳如此諭之有不翻然來歸者乎爾等其勉體朕意

諭畢

賜食又

諭曰入略之後或奏捷或送俘必由錫伯綽爾門

方略曰科

爾沁所屬地

地方經過將來遣使往還及運送軍糧亦必

於此處相待其應略地方須問鄉導人有夏姓烏音

屯長喀拜及從役二人庫魯木圖屯長都爾敦及從  
役二人

方略曰本月喀拜都爾敦等率從者六十九人來朝貢貂皮

又納屯一人

適已偕至今俱令從軍爾等率之往經行道路詢彼  
自知若彼處已經略定此歸附三屯不可稍有侵擾  
宜令留於本處並諭以因爾等輸誠來歸故使復選  
故土嗣後宜益加恭順償往來稍間必譴責立至矣  
若所略不獲如願則不必留此三屯當盡攜來凡器  
用之屬有資軍實者無使遺棄軍還務使結隊而行  
不可分散又

召屯長喀拜都爾敦等及其從人進宮

賜食既出

命沙爾琥達穆成額傳諭喀拜等令其引我軍前行凡各屯寨善爲指示復

命貝勒薩哈璘杜度大臣納穆泰額駙達爾漢兵部承政伊遜徹爾格並參政等官送於二里外按旗分列簡士卒閱器械宣讀

敕諭給諸將各一道遂令起行九年三月丁巳

特遣甲喇章京瑚什布率每旗二人往迎之四月癸巳

巴奇蘭薩木什喀令兵部啟心郎二人曰額色  
赫曰伊木布奏報收服呼爾哈編戶壯丁二千  
四百八十有三人口七千三百有二馬八百五  
十有六牛五百四十有三駝八辛丑

詔貝勒阿巴泰率眾官迎凱旋將士於蒲河之岡大宴  
之五月乙卯巴奇蘭以所招降頭目人等至

太宗御殿凱旋諸臣率眾朝見

太宗以諸臣出師勤勞

命主將巴奇蘭薩木什喀二臣行抱見禮巴奇蘭薩木

什喀出班叩頭抱

上膝見次招降二千人叩見次索倫部長巴爾達齊等

方略曰四月壬寅黑龍江索倫部長巴爾達齊率二十二人來朝貢貂獺皮叩見

命招降軍士俱較射設大宴

召巴奇蘭薩木什喀以金卮酌酒

親賜之次飲各旗出征署旗務大臣次飲以下諸臣並

招降頭目宴畢

上回宮陞巴奇蘭薩木什喀等世職加世襲二次隨征之吉思哈等三十六員各陞世職一級翼日巴



奇蘭等籍俘獲人口一百十六名馬二十有四  
牛十有七貂狐捨獬獠水獺等皮共三千一百  
五十皮裘十五領以

聞

太宗念將士勞苦卽分賜右翼五旗主帥巴奇蘭左翼  
五旗主帥薩木什喀其章京以下各賞賚有差  
招降之七千三百人俱

賜房屋田地衣食器皿等物九年九月

諭出征諸貝勒曰又黑龍江貢貂者塞布奇屯十六人

噶勒達蘇屯四人郭博爾屯二人額蘇哩屯二十四  
人阿里岱屯八人克音屯四人烏魯蘇屯二人此皆  
舊往還之人又新至者海倫屯二人裕爾根屯固濃  
屯昆都倫屯烏蘭屯各一人又索倫部內先至者四  
人其因馬疲留於科爾沁地方者兩起共六十七人  
皆革心向化不似先時執拗矣十年

臣秋濤謹案是  
年即崇德元年

也

太宗命阿賴達爾漢率外藩蒙古諸貝勒兵往追茂明  
安部下逃人至使鹿部喀木尼堪地方招集葉

雷舍爾特庫巴古奈土古奈等及其從役家口

來獻俱

賜官服纛韃等物有差葉雷等旋往盜科爾沁部占巴

拉

方略曰天聰八年秋七月與其弟塞爾固楞率兵來朝

部下馬八百匹

及秉圖王

方略曰即洪果爾

部下馬四十五匹而逃是

時秉圖王及伊勒都齊貝勒

方略曰即棟果爾

伊爾登

方略曰即

布木巴

哈坦巴圖魯

方略曰即固穆二人皆郭爾羅斯部長

等

所屬有四五家散處及出外採捕約五十人皆

被殺秉圖王部下十七人追及之逃人還擊殺

三人又奪馬十七匹而去經

興京守將奏

聞

命下甲喇章京錫特庫執信牌往甯古塔會同守將武  
巴海率甯古塔兵追之又遣正黃旗牛衆章京  
噶爾糾執信牌率卦勒察兵沿烏拉地方追緝  
又遣蒙古衙門撥什庫博羅執信牌往科爾沁  
部令土謝圖親王巴達哩卓哩克圖親王武克  
善發兵躡追兼令防失牲畜錫特庫等率二十

二人躡逃人蹤跡自多爾博庫地方行至烏拉  
駐防邊城武巴海率四十五人來會時科爾沁  
部土謝圖親王下鄂爾多木卓哩克圖親王下  
託和泰奉

命率兵二百往尼喀善城駐防聞信卽簡甲士四十人

往追占巴拉之弟塞爾固楞貝勒亦率所部兵

橫截追之鄂爾多木追至博木博果爾地方

臣秋

濤謹案博木博果爾乃黑龍江頭目

行月餘會遇武巴海錫特庫

同行途次見天鵝三鄂爾多木射中其一帶箭

而飛逐取忽不見乃見逃人營中遺火遂星夜  
馳往至溫多地方圍之諭降不從因攻殺九十  
四人生擒八十七人獲馬五十六匹問葉雷安  
在葉雷殺鹿爲食攜妻子遁去矣錫特庫武巴  
海卽率兵前進葉雷聞知乃殺其妻子遁入山  
中我兵追至與葉雷縱矢交射忽有白狐躍起  
觸葉雷弓而馳因射殺葉雷有葉雷兄弟率四  
十人攜妻子欲歸我國途遇葉雷留之亦被殺  
五月癸未奏

聞錫特庫等凡七閱月始還

太宗命管旗大臣出城五里迎宴之

臣秋濤謹案崇德四年

葉雷復逃錫特庫追至北海斬之閱七月始還知此次追兵直抵北海矣又按柳邊紀略云使鹿部大約在使犬諸部之外崇德元年五月阿賴達爾漢追毛明安部下逃人至使鹿部喀木尼漢地方獲男女二十九來獻至今未通朝貢無由見其國人但聞其駕車耕地使鹿若使牛馬而已又異域錄云自厄爾庫城至伊聶謝柏輿地方其間水程三千餘里沿途河岸寬闊之處處間有田畝俄羅斯與布喇特及索倫人等雜處又曰伊聶謝柏輿俄羅斯呼索倫為喀穆尼漢又呼為通古斯俱畜鹿以供乘馭載其鹿灰白色形似驢騾有角名曰俄倫所謂喀穆尼漢即喀木尼堪也據此則喀穆尼堪即索倫別部無疑今其地屬俄羅斯考總記言俄羅斯於

崇德四年始得白哈兒湖附近之地則當崇德元年尙未屬俄羅斯也由此北行數月直抵北海按之方隅道里無不密合

崇德二年二月黑龍江地方額蘇里屯內鄂倫扎爾固齊克訥布魯達爾漢率九人至奏言額蘇里屯東約計六日程有從未通我國者三十九屯今欲來貢不知進貢禮儀特遣人來求我等同

皇上使臣一人至彼卽備方物隨使入貢並藉其所貢貂狐等皮數目以

聞閏四月黑龍江索倫部博木博果爾等來朝貢貂皮



等物六月辛丑敘遠追喀木尼堪部逃人功擢

武巴海錫特庫噶爾糾世職加

賜衣服馬匹奴僕莊田

賜鄂爾多木號卓哩克圖庫魯克達爾漢子孫世職其

隨征將士並

賞銀兩衣服有差冬十月丙午黑龍江巴爾達齊率五

十七人朝貢又精裕里河璋春屯內扈育布祿

初未入貢至是亦來朝貢貂皮俱令禮部迎宴

之

賜扈育布祿及其從人蟒緞朝衣冠帶纓韉弓矢鞍轡等物有差十二月己丑朔

賜朝貢諸外藩宴時黑龍江諸部至者曰黑龍江薩哈

連方略曰額駙巴爾達齊之弟曰瑚爾布爾屯費揚古曰沃

喀屯武第堪曰烏魯蘇屯莽古珠等五十一人

曰索倫部博木博果爾透特等九人曰呼什哈

禮氏納木達哩等十人曰巴雅喇氏滿第特喀

下二人曰布克圖禮等五人曰賴達庫等四人

均以貢貂朝見

太宗御崇政殿賜宴

命七家以次宴之

賜綵緞銀兩衣服鞍馬等物有差三年十月黑龍江索倫部博木博果爾等來朝貢貂皮既而叛去四年十一月辛酉遣諸將曰索海曰薩木什喀曰穆成額曰葉克舒曰永順曰拜曰伊遜曰羅奇等率官兵征之

命貝勒多鐸額駙英固爾岱傳

諭曰爾等所經屯內有已歸順納貢之屯又有博木博

果爾取米之屯毋誤行侵擾行軍之際勿忘紀律新  
附之人令該管大臣以下各官查核其有兄弟及殷  
實者方令從征爾等亦應詳驗之左翼軍薩木什喀  
領之副以伊遜右翼軍索海領之副以葉克舒兩翼  
軍分行則聽該翼將令同行則聽兩翼將令凡事俱  
公議行之五年三月己丑索海等遣章京二人曰法  
譚曰宜爾格得奏言臣等至呼瑪爾河分兵各  
旗派定地方攻取因道遠定期四十日至廂藍  
旗所派烏蘭海倫屯乃令承政伊遜率每旗官

一員每牛衆兵二人往拉里闡地方伊遜等旣行有四木城曰鐸陳曰阿薩津曰雅克薩曰多金四城之人抗拒不降令右翼將領葉克舒拜阿哈尼堪譚布藍拜武巴海率每旗官二員每牛衆下有俘獲之兵丁二人無俘獲之兵丁三人助之遂克雅克薩城當攻城時綏赫德所守汛地先舉火焚燒城南關廟八旗將領各率兵二十人前進和託率蘇先入珠瑪喇繼之俱以火攻克之有四人曰達爾布尼曰阿恰勒都瑚

曰伯庫都曰漢必爾岱四人聚七屯之人於烏庫爾城薩木什喀伊遜穆成額拜令衆軍乘旦攻之日暮克之至鐸陳城力攻一日次日聞各路報博木博果爾以兵來援恐傷我軍遂還烏魯蘇屯之索倫鄂爾吞奇勒里精奇哩烏拉布丁屯以東烏木內克巴哈納以西黑龍江額爾圖屯以東阿里闡以西兩烏拉兵共六千來襲正藍旗後隊索海以兵設伏薩木什喀護輜重殿後二人率衆掩擊斬殺甚衆生擒四百人博

木博果爾既敗遂攻取其營正白正紅鑲黃三旗相繼馳入博木博果爾及餘衆二百俱遁薩弼圖卓布泰武班宜爾格得率衆九十人往助薩木什喀鐸陳阿薩津二城人以兵四百阻截我軍擊敗之斬五十人薩木什喀令伊遜率章京五員兵一百三十於鐸陳設伏斬七人又遣阿哈尼堪巴山郎圖薩祿等往攻卦喇勒屯屯內人來請索海言屯內有索倫兵五百索海喀喀木幹都等率兵往攻奪柵而入斬二百人生

擒一百三十人據額駙巴爾達齊於三月十八日來會云惟我多科屯人未曾附逆其小烏拉各處兵皆往助博木博果爾及大兵所向克捷於是七屯之人曰郭博勒屯之溫布特曰博和哩屯之額爾噴曰噶勒達遜屯之科奇納曰穆丹屯之諾奇尼曰都孫屯之奇魯特曰烏爾堪屯之博卓戶曰德篤勒屯之科約布魯俱已歸附巴爾達齊別屯雖現在逃竄不久終必來歸也并藉所獲人口皮張等細數以



聞癸巳

太宗命每旗官一員率兵往迎出征索倫大軍

諭之曰爾等此行如能過錫伯地方至克勒朱爾根處相會可謂神速矣會後由哈爾必雅勒回軍沿途宜加意防護入境時須從法庫門入不可由葉赫行以伊等習知路徑恐再至逃亡也兵丁早晚放馬務令解鞍休息尤須官爲察看勿用外藩蒙古驛馬供應乙巳薩木什喀索海復遣二人曰當習曰郭查奏言前次俘獲人口二千二百五十有四後自

額蘇哩屯以西額爾圖屯以東又獲九百人共計男婦大小六千九百五十有奇馬四百二十有四牛七百有四又先後獲貂狍猓獾青鼠水獺等皮五千四百裘二十領四月乙亥凱旋

命禮部承政滿達爾漢及安平貝勒杜度饒餘貝勒阿巴泰等先後迎宴將至

### 盛京

太宗復率親王以下大臣迎至實勝寺北館祭纛行禮

宴勞之敘功分別加授世職

賜領翼主將索海及穆成額各貂皮七十七人口四葉

克舒永順拜譚布藍拜等各貂皮四十七人口

三其從征軍士按功分

賞貂皮人口並以所獲男婦五千六百七十有三人分

隸八旗編爲牛衆

賞給衣服布疋復令較射分別等第一等視甲喇章京

二等視牛衆章京三等視半個牛衆各照等第

賜朝服袍褂等物

臣秋濤謹案通志言俄羅斯於崇德四年據雅克薩俞正燮俄羅斯事輯

諸書皆沿之今考

開國方略記此事知

是年據雅克薩者乃索倫非俄羅斯也觀此可知通志

之誤

五月戊戌分編來降索倫戶口初薩木

什喀等征索倫部時未降者三百三十七戶共

壯丁四百八十一人至是來降

太宗命理藩院參政尼堪率八旗護軍將士攜蟒緞素

緞梭布往迎之

諭之曰爾等可令索倫來歸之眾同郭爾羅斯部眾於

烏庫瑪勒格稜額喀蘇昂阿察喀地方駐劄耕種任

其擇便遷移視其中有能約束眾人堪爲首領者授

並刀有要 卷二 三  
爲牛衆章京分編牛衆爾等將攜去緞布以次給賞  
之尼堪等遵

諭給賞分編八牛衆乃還六年春正月壬辰錫特庫等

自索倫部擒獲博木博果爾凱還先是五年三月  
索倫部博木博果爾敗而遁走七月丙午

太宗命錫特庫濟什哈率護軍並徵兵外藩往征之  
命內大臣巴圖魯詹理藩院參政尼堪等

諭外藩蒙古曰敖漢奈曼烏拉特阿魯科爾沁四子等  
部從征將士俱彙集扎嚕特部內齊地悉令較射選

壯勇者二百四十名令錫特庫將之以行以伊爾鞏  
固圖哈納綽隆爲嚮導其從役駝馬甲冑器械糗糧  
俱細加檢閱毋忽十二月庚申錫特庫等遣三人曰  
歸亨岱曰青蒙格圖曰艾達漢邁圖以擒獲博  
木博果爾報次日

太宗遣貝子洛託齎

敕往錦州

諭鄭親王濟爾哈朗等曰博木博果爾自叛後抗拒我  
軍彼時朕已定計欲令其北遁以便擒獲故揚言我

軍將於黑龍江牧馬必擒博木博果爾彼聞此言果  
北遁朕已知之未及與爾等共議卽令錫特庫濟什  
哈率外藩蒙古兵從蒙古北邊追躡錫特庫等越兩  
月十三日至甘地獲其弟及家屬又閱十四日至齊  
洛台地方遂獲博木博果爾及其家屬男婦幼稚共  
九百五十六人馬牛八百四十有四特諭知之至是  
凱旋遣官迎宴於北驛館次日

召錫特庫濟什哈及從征之護軍四十人外藩台吉等

三十三人

賜宴仍

命諸王貝勒各宴一次擢錫特庫世職一等三月庚戌  
命護軍統領阿爾津哈爾阿等率將士往征黑龍江之  
呼爾哈部所向克捷攻克三處曰博和哩曰諾  
爾噶勒曰都里又招降四處曰小噶爾達蘇曰  
大噶爾達蘇曰綽庫禪曰能吉勒並籍俘獲戶  
口數目自軍中奏報五月己丑迎宴索倫歸降  
部眾索倫部蒙塞爾瓦岱之子巴爾達齊於是  
月丁亥率其戶下二百四人來降越二日己丑



又有索倫部一千四百七十一人來降俱

命迎至北驛館宴之七月戊戌征黑龍江呼爾哈之師

凱還

命將歸順男子一千四十九人披甲編補各旗缺

額者其餘俘獲分

賜出征將領

賜阿爾津哈甯阿等貂皮銀兩其從行軍士廝卒及陣

亡被傷者分別

賞給銀兩有差八年十一月

命梅勒章京鄂羅塞臣巴都哩往征黑龍江呼爾哈部  
順治元年正月又

命甲喇章京沙爾琥達征之五月鄂羅塞臣沙爾琥達  
等凱旋參政明安達禮往迎宴勞之以所獲人  
口分隸八旗其餘

賞給出征將士於是黑龍江全境索倫諸部皆稱臣妾  
奉正朔我疆我理盡東北海矣至順治初年俄  
羅斯所屬之羅刹始吞併尼布楚地又東竊據  
雅克薩築城以居索倫達呼爾諸部皆被其侵

掠由是綦倫達呼爾南徙於嫩江之濱當是時  
尙未分設黑龍江省所部軍務皆屬甯古塔章  
京統轄順治五年羅刹之伍朗格里自拔來歸  
九年甯古塔章京海色擊羅刹於烏扎拉村失  
利十一年大臣明安達禮統兵征羅刹敗敵於  
黑龍江十二年明安達禮進兵至呼瑪兒攻其  
城頗有斬獲旋以餉匱班師十四年甯古塔章  
京沙爾瑚達破羅刹於尙堅烏黑之地十五年  
又破之於松花庫爾瀚兩江之間十六年沙爾

瑚達卒以其子巴海爲甯古塔將軍討羅剎十七年巴海大破羅剎於古法壇村十八年設船廠於吉林

命昂邦章京薩兒吳代監造船艦將以水師征羅剎也  
康熙四年羅剎入索倫部取貂皮淫婦女將軍  
巴海襲而殲之七年羅剎宜番等自拔來歸八  
年秋羅剎復來寇九年羅剎奉表投誠十年  
諭巴海曰羅剎雖云投誠亦當加意防禦毋墮狡計十  
三年自吉林移水師分駐黑龍江地方十五年

俄羅斯察罕汗遣尼果賴等進貢

詔諭察罕汗嚴禁羅剎勿擾邊陲二十一年以羅剎蔓

延益甚

命副都統耶坦公朋春等率官兵往索倫等處因至雅

克薩城下偵探情形以後用兵勦撫諸事詳見

欽定平定羅剎方略二十二年

命將軍巴海留鎮烏拉副都統薩布素等領兵移駐額

蘇哩九月

命官兵永成愛瑋以薩布素爲將軍此黑龍江設將軍

之始自是分吉林西北隅之地爲黑龍江省築

愛琿

卽今黑龍江城

卜魁墨爾根等城設立台站屯田

積穀增置副都統佐領以下員額將軍初駐愛

琿後移駐墨爾根最後移駐卜魁卽今齊齊哈

爾城也先是索倫達呼爾諸部皆以採捕打牲

爲業未設額兵故順治康熙間用兵羅刹皆調

京師及他省官兵以往迨薩布素鎮守其地所統

之兵亦自吉林甯古塔調至官爲移其家口所

費甚鉅至康熙三十年

聖祖諭曰齊齊哈爾地方以索倫達呼爾之衆酌量令其披甲駐防遣滿洲兵二百人往彼教訓之伊等居址附近亦心樂披甲如此既無遠徙之苦亦不致需用糗糧矣自是遂爲定制今黑龍江將軍所屬八旗

兵滿洲漢軍之外有索倫兵達呼爾兵俄倫春兵畢喇爾兵皆土著之戶而附以自蒙古遷往之巴爾呼兵鄂勒特兵是爲黑龍江八部落云說者謂索倫本遼之後裔散處山谷挽強命中

洞兇虎跡奔獸

龍沙紀略曰索倫音近蒙古問雜漢語挽弓十石能自縛於樹

射熊虎洞穿負之而歸馬有逸失者雖數百里外皆能蹤跡得之 雄於諸部自康熙以來編旗給精訓以紀律平時自應其役軍興皆聽調撥往往以勇猛敢戰取翠翎珊頂及巴圖魯名號如寄此海內所以稱勁旅也又索倫族類至繁有敖喇都喇爾布喇穆等姓多居布特哈呼倫貝爾境而齊齊哈爾等三城較少亦有流寓俄羅斯者其國謂之喀穆尼漢又謂之通古斯蓋羅刹作亂劫去者西清黑龍江外紀云數十年前嘗有願歸故土之請今不聞



矣達呼爾一作達瑚哩一作打虎兒

臣秋濤謹案或作打

狐狸皆譯字不同也

著姓有克因精奇里瓦蘭果布勒等

氏多占籍於齊齊哈爾等三城及布特哈而呼

倫貝爾則不過數家俄倫春者索倫達呼爾類

也黑龍江以北精奇里江源以南皆其射獵之

地其眾夾精奇里江以居亦有姓都喇爾者似

與索倫為近其隸布特哈八旗為官兵者謂之

摩凌阿俄倫春其散處山野僅以納貂為役者

謂之雅發罕俄倫春

臣秋濤謹案摩凌阿雅發罕者滿洲語猶云馬上步

也下雅發罕俄倫春有布特哈官五員分治三歲

一易號曰諳達諳達歲以徵貂至其境其人先

期畢來奉命維謹過此則深居不可蹤跡矣畢

喇爾亦然有驍騎校四員分治之其人有姓默

訥赫爾者有姓都訥亨者乃畢喇爾之著族也

呼倫泊以南喀爾喀以西巴爾呼居焉巴爾呼

本外蒙古喀爾喀屬部其戍此者闌入俄羅斯

境我軍征俄羅斯時來歸遂編入八旗卽以其

人爲佐領

黑龍江外紀曰巴爾呼亦有新舊之別在齊齊哈爾者舊巴爾呼也在呼

倫貝爾者新舊巴爾鄂勒特一作厄魯特征準

呼相聞而新者盛也部時徙其降人於此多居呼倫貝爾而卜魁城

亦間有之呼倫貝爾布特哈呼蘭三處皆無城

郭而設兵駐防號為重地呼蘭之設城守尉也

始於雍正十二年呼倫貝爾遣內大臣或侍郎

一員為統領始於雍正十年至乾隆八年改設

副都統銜總管一員

臣秋濤謹案其下按部設官有索倫總管巴爾呼總

管新巴爾呼總管鄂勒特總管其

下又各設副總管佐領等官焉布特哈初設

索倫達呼爾總管二員副總管八員謂之打牲

頭目副頭目康熙三十年以後陸續增設滿洲  
總管一員副總管八員蓋布特哈爲打牲部落  
之總稱故東北數千里內處山野業採捕者悉  
隸之總管駐劄處在伊伯河西岸地名扎克丹  
每歲五月大會於齊齊哈爾城納貂互市號曰  
楚勒罕譯言盟會也呼倫貝爾之西北境以額  
爾古納河爲俄羅斯界布特哈之北境以興安  
大嶺爲俄羅斯界觀諸部之士俗民情其歸嚮  
德化敵愾奏功出乎天性考其原委而防邊之道思

過半已

朔方備乘卷二

教諭劉湛煙初校  
知縣吳壽坤覆校

朔方備乘卷第三

聖武述略三

喀爾喀內屬述略敘

臣秋濤謹案瀚海亘地中央不毛者數千里天以界中外漠南水南流入內地漠北水北流達俄羅斯我

朝

太宗文皇帝旣平察哈爾林丹汗內扎薩克四十九旗咸入版圖而北有喀爾喀爲屏蔽故未與俄羅

斯相接然崇德年間土謝圖汗車臣汗並以俄羅斯烏鎗爲獻俄羅斯之名聞中國實始於此至順治年間喀爾喀時擾邊陲屢經

命將撻伐蓋以朔漠險遠羈縻待之雖九白之貢已頻登於

闕廷而五等之封尙未盟於帶礪迨康熙年間噶爾丹搆斃喀部潰敗內徙

聖祖仁皇帝撫綏安輯出水火而衽席之於是

錫爵秩編佐領莅會盟咸視內蒙古例龍沙雁海之圖

億潼萬毳之民獨峯駝無尾羊之部奔湊萬里  
臣妾一家而我

朝拓境直抵楚庫河布爾古特山與羅刹爲鄰界  
矣庫倫設辦事大臣二人其一卽以喀爾喀之  
王公扎薩克爲之故欲考俄羅斯不可不先考  
喀爾喀爰述

列聖戡定撫卹之事具著於篇

喀爾喀內屬述略

外蒙古喀爾喀本元太祖裔以在漠北故謂之



外蒙古大部四曰土謝圖汗部爲喀爾喀後路  
曰車臣汗部爲東路曰扎薩克圖汗部爲西路  
曰賽因諾顏部爲中路分左右翼距

京師各三數千里舊服屬於察哈爾

太宗文皇帝天聰九年大軍平察哈爾車臣汗碩壘偕  
烏珠穆沁蘇尼特諸部長上書通好貢駝馬崇  
德元年春以車臣汗部私與明市

諭責之曰明朕仇也前者察哈爾林丹汗貪明歲幣沮  
朕伐明且欲助之朕故移師往征天以察哈爾爲非

故以其國予朕今爾與明市馬是助明也爾當以察  
哈爾爲戒冬碩壘遣偉徵喇嘛等來朝請與明絕市  
上嘉之

命察罕喇嘛往賚貂服朝珠弓刀金幣此喀爾喀部通  
好之始自是土謝圖汗袞布扎薩克圖汗素巴  
第賽因諾顏部長圖蒙官相繼至初喀爾喀無  
汗稱袞布祖阿巴岱赴唐古特謁達賴喇嘛迎  
經典歸衆服之稱汗至袞布始號土謝圖與碩  
壘素巴第同時爲三汗喀爾喀有所謂紅教者

與黃教爭圖蒙冒尊黃教爲之護持達賴喇嘛  
賢之授賽因諾顏號令所部奉之視三汗圖蒙  
冒尋卒次子丹津喇嘛復受諾捫汗號於達賴  
喇嘛居翁吉河霍岳爾克爲喀爾喀八扎薩克  
之一二年車臣汗碩壘獻所產獸曰獺喜二年  
扎薩克圖汗素巴第謀掠歸化城

上親征之所部遁遣使謝罪並貢馬及獨峯駝無尾羊  
諭曰朕以兵討有罪以德撫無罪惟行正義故上天垂  
佑蒙古察哈爾諸部皆以畀朕爾等皆其所屬當卽

相率歸誠否則亦惟謹守爾界乃反興兵構怨謀肆  
侵掠豈以遠處西北卽爲征討不及之區耶今與爾  
約嗣後慎勿復入歸化城界重貽罪戾是年土謝圖

汗袞布遣使貢駝貂皮雕翎及俄羅斯烏鎗車

臣汗貢馬及甲冑貂皮雕翎俄羅斯烏鎗回部

弓箛鞍轡阿爾瑪斯斧白鼠裘唐古特元狐皮

臣秋濤謹案此俄羅斯  
斯名聞中國之始

詔歲貢白駝一白馬八謂之九白之貢以爲常他物毋  
入獻賽因諾顏亦遣使通貢

世祖章皇帝順治三年車臣汗碩壘誘蘇尼特部長騰  
機思叛豫親王多鐸率師追勦至扎濟布喇克  
碩壘遣子本巴等土謝圖汗袞布遣其屬喇瑚  
里等合丹津喇嘛兵五萬餘援騰機思大軍敗  
之棄駝馬而竄有楚琥爾者袞布族也復私掠  
巴林部人畜師旋

詔責碩壘曰蘇尼特本察哈爾屬部向化來歸爾誘之  
使叛朕遣兵追勦時猶誠勿加兵於爾詎意爾反稱  
兵抗拒以致上蒼降譴立見敗衄儻非朕飭令班師

大兵既壓爾境何難長驅直入耶今爾若知自悔欲  
贖前愆其速擒騰機思來獻并詰責衮布丹津喇嘛  
協擒騰機思歸所掠巴林人畜扎薩克圖汗素

巴第聞

詔欲代解罪偕同族俄木布額爾德尼上書乞好

上因其書不稱名辭近悖慢切責之五年騰機思乞降  
車臣汗碩壘遣使獻駝百馬千入謝土謝圖汗  
衮布等並上表引罪

詔各遣子弟來朝不從七年扎薩克圖汗部人俄木布

額爾德尼等詭稱行獵私入歸化城界掠牧產  
詔遣官飭歸所掠會其汗素巴第卒子諾爾布嗣稱畢  
錫喀勒圖汗遣使入貢

諭曰朕本欲許爾等和好故命察歸所掠以贖前罪今  
反以朕留爾逃人爲辭是何心耶朕統一四海爾等  
彈丸小國勿恃荒遠勿聽奸辭致隕爾緒尋賽因諾  
顏部長丹津喇嘛遣子額爾德尼諾木齊上書  
乞好

詔偕土謝圖汗袞布約誓定議八年土謝圖汗袞布不

歸巴林人畜僅獻駝十馬百入謝

嚴諭詰責九年以車臣汗部妄爭歲貢賞

諭責之十年

命侍郎畢哩克圖往土謝圖汗部察巴林被掠人畜衮  
布等匿不盡給會其屬喇瑚里子台吉本塔爾  
攜衆來歸封扎薩克親王駐牧張家口外塔爾  
渾河因詭言巴林人畜本塔爾攜往應就被取  
并乞遣本塔爾等還

諭曰不遣子弟來朝不進九白常貢不盡償巴林人畜



冒此三罪反請遣還來歸之人是何理也今卽遵旨  
釋此三罪朕亦弗使本塔爾等還爾等其自擇之秋  
袞布遣使補貢九白至張家口

詔弗納十一年扎薩克圖汗部人額爾德尼諾木齊復  
表至

諭曰爾奏言喀爾喀左翼四旗皆爾統攝凡有敕諭罔  
弗遵行今卽如所請可速飭爾部長遣子來朝有不  
遵者卽行奏聞十二年夏土謝圖汗袞布子察琿多  
爾濟車臣汗碩壘子巴布並繼其父稱汗偕扎

薩克圖汗諾爾布賽因諾顏部長丹津喇嘛各齋表遣子弟來朝

諭曰爾等遵旨服罪朕不咎既往其應歸巴林人畜缺數悉從寬免嗣有逃人來此當卽遣還冬土謝圖汗等復遣使乞盟

許之賜盟於宗人府是年設喀爾喀八扎薩克仍分左右翼

命察琿多爾濟巴布丹津喇嘛及察琿多爾濟同族墨爾根諾顏各領左翼扎薩克之一諾爾布及同

族俄木布額爾德尼車臣濟農昆都倫陀音各  
領右翼扎薩克之一

命丹津喇嘛歲貢九白如三汗例十五年

遣大臣齎服物資諸扎薩克

敕曰朕觀爾等審知天命誠心誓好凡一詔下靡不敬  
從自茲以往其益勵忠貞仰膺寵眷以慰朕懷柔至  
意果克恪慎罔懈以獲天眷以承國恩奕世永享太  
平之福矣十八年

賜賽因諾顏部長丹津喇嘛遵文順義號給之印

聖祖仁皇帝康熙元年先是扎薩克圖汗諾爾布卒子  
旺舒克襲稱汗同族扎薩克俄木布額爾德尼  
卒子額琳沁襲號羅卜藏台吉至是額琳沁以  
私憾襲殺旺舒克土謝圖汗察琿多爾濟賽音  
諾顏部長丹津喇嘛並發兵擊之奔就厄魯特  
其叔父衮布伊勒登避難來歸封扎薩克貝勒  
駐牧喜峰口外察汗和朔圖三年  
詔賽音諾顏所部毋越界游牧尋丹津喇嘛卒子塔斯  
希布襲頃之塔斯希布卒子善巴襲

賜信順額爾克岱青號九年

命旺舒克弟成衮襲扎薩克圖汗號先是旺舒克被戕  
兄綽墨爾根自立爲汗以未請於

朝衆弗附多歸土謝圖汗察琿多爾濟至是

詔廢綽墨爾根以成衮襲扎薩克圖汗輯其衆十六年  
厄魯特部鄂齊爾圖汗爲同部台吉噶爾丹所  
襲土謝圖汗察琿多爾濟救之會鄂齊爾圖汗  
被戕因與噶爾丹搆難遣台吉色稜達什引兵  
三百劫其貢使事聞

諭罷兵誓好十八年噶爾丹自稱博碩克圖汗虐附近  
諸部土謝圖部扎薩克畢瑪里吉哩諦偵知其  
謀侵喀爾喀遣使來告

上嘉賚之畢瑪里吉哩諦者養音諾顏圖蒙冒第九子  
也號巴圖爾額爾德尼諾顏十九年扎薩克圖  
汗成袞遣使貢喀爾喀舊俗汗最貴濟農次之  
諾顏又次之有多爾濟者爲右翼扎薩克之一  
以濟農號表貢尋成袞與之隙奪濟農號授其  
從昆弟薩瑪第俾代貢九白理藩院請卻其使

詔納之噶爾丹屬額爾德尼和碩齊私掠內扎薩克烏喇特部界畢瑪里吉哩諦以所居哈嚕特山距烏喇特六日程慮還掠偵額爾德尼和碩齊竄處額濟內河以聞

詔設汛防禦二十一年

詔遣大臣分資諸扎薩克冠服佩帶弓刀器幣內大臣費揚古等往土謝圖汗部散秩大臣博洛特等往車臣汗部副都統班達爾什等往賽因諾顏部都統阿密達等往扎薩克圖汗部各入朝謝

扎薩克圖汗部以額琳沁之亂屬衆潰多依土  
謝圖汗成袞旣襲汗遣告察琿多爾濟索逃衆  
匿弗予至是厄魯特台吉噶爾丹送額琳沁歸  
成袞以其舊列八扎薩克令隨已入貢額琳沁  
懼前罪弗從反約俄羅斯來攻成袞覺之遣子  
沙喇率兵萬餘襲執額琳沁尋逸復奔厄魯特  
成袞盡收其戶畜復遣赴察琿多爾濟所索逃  
衆會達賴喇嘛遣阿爾布柰召察琿多爾濟與  
成袞盟卒弗聽成袞自是與察琿多爾濟交惡



車臣汗以所屬巴爾呼人私掠烏珠穆沁部界  
議增汛兵防禦會貢使至

諭曰朕聞爾屬衆與界內蒙古互相竊奪彼此效尤恐  
乖生計朕已飭界內人毋許出境滋擾爾亦當約束  
所部守分安居違者卽拘治之毋稍姑息尋又

詔車臣汗部毋越噶爾拜瀚海游牧大軍征俄羅斯絕  
弗與通市先是俄羅斯部人散居雅木薩尼布  
楚諸地車臣汗諾爾布屬巴爾呼與接壤時以  
牲畜及貂互市其黠者闌入黑龍江沿邊肆掠

人因呼之爲羅刹至是大軍往征

詔車臣汗諾爾布飭所屬與絕市諾爾布巴布子也二

十二年

詔車臣部賽因諾顏部毋越噶爾拜瀚海舊界游牧先是都統畢哩克圖奉

命勘喀爾喀與內扎薩克游牧以噶爾拜瀚海爲界久之多越界互竊議置哨至是善巴以蒙古舊俗逐水草居疏乞免置哨

詔舊界毋越二十三年

命內大臣阿齊圖格隆偕達賴喇嘛赴扎薩克圖土謝  
圖二汗諭和會達賴喇嘛所遣參巴陳布呼圖  
克圖至歸化城病卒

詔阿齊圖格隆還二十五年

詔理藩院尙書阿喇尼齋

敕與達賴喇嘛使噶爾旦西勒圖會未至成袞卒

詔其子沙喇襲扎薩克圖汗隨阿喇尼赴庫掄伯勒齊  
爾與察琿多爾濟盟察琿多爾濟不親至使弟  
哲卜尊丹巴呼圖克圖往受盟令盡遣所收逃

衆告沙喇亦如之旣而察琿多爾濟僅歸其半  
於沙喇復交惡是盟也察琿多爾濟長子噶爾  
旦多爾濟弟西第什哩威與並授扎薩克扎薩  
克圖汗部人朋素克喇布坦嗣薩瑪第稱額爾  
德尼濟農遣使貢

詔歸導其汗睦鄰修好

賜珊瑚朝珠二十六年土謝圖汗察琿多爾濟偕車臣  
汗諾爾布疏請給印且土

尊號

諭卻之曰爾等恪恭敬順具見悃忱但宜仰體朕一視同仁無分中外至意自今以後親睦雍和毋相侵擾永享安樂庶慰朕懷勝於受尊號也亦不允給印尋察琿多爾濟長子扎薩克噶爾旦多爾濟率宰桑額爾德尼額爾古等來貢會大闕扈

駕往觀命之射秋土謝圖汗與噶爾丹搆兵先是庫掄伯勒齊爾之盟哲卜尊丹巴呼圖克圖與達賴喇嘛使噶爾旦西勒圖抗禮噶爾丹聞之怒其不尊達賴喇嘛也又怨察琿多爾濟嘗助鄂齊

爾圖汗攻已且以女妻其孫羅卜藏衮布阿喇  
布坦貽書詰責揚言率衆來攻察琿多爾濟奏  
請往擊

詔守前約勿復興兵端有噶爾丹戚屬曰阿喇布坦沙  
喇女兄之夫也噶爾丹因誘沙喇攻察琿多爾  
濟爲會於固爾班赫格爾台吉卓特巴德克德  
赫從察琿多爾濟惡沙喇迎附噶爾丹追擊之  
殺沙喇及德克德赫卓特巴遁事聞

命傳諭達賴喇嘛召還噶爾丹而先遣學士拜哩等諭

察琿多爾濟罷兵比至察琿多爾濟已執殺沙喇等復蓄其裙羅卜藏袞布阿喇布坦追斬噶爾丹之弟多爾濟扎卜進屯喀喇額爾奇克察罕額爾奇克地與噶爾丹相拒噶爾丹尋遷沙喇妻布尼特達喇子巴朗恭格居阿爾台山陽二十七年春內大臣索額圖等率兵赴色楞額河與俄羅斯議界道出喀爾喀

詔所部安堵無恐尋噶爾丹引衆三萬由杭愛山入掠察琿多爾濟暨子噶爾旦多爾濟禦之於特穆

爾敗績奔翁吉噶爾丹偵哲卜尊丹巴呼圖克圖居額爾德尼昭遂分兵越圖拉河東趨克魯倫掠車臣汗牧地別遣將丹津鄂木布由喀喇卓爾渾攻額爾德尼昭哲卜尊丹巴呼圖克圖攜察琿多爾濟孛避居額古穆爾時噶爾丹鋒銳甚喀爾喀衆洵懼有議北奔俄羅斯者哲卜尊丹巴呼圖克圖曰俄羅斯素不奉佛不可投也宜歸順

大皇帝以圖安全耳因南走蘇尼特部界馳告急



詔發阿巴哈納爾部兵沿瀚海防禦之秋噶爾丹自克  
嚕倫還掠圖拉察琿多爾濟悉衆由尼列圖至  
鄂羅會諾爾慶戰三日衆潰遂自察袞庫勒踰  
瀚海會哲卜尊丹巴呼圖克圖顛請內附噶爾  
丹上書訴其棄好興兵妄殺無辜請勿納

上弗許

命入居蘇尼特界內鄂琳圖於是察琿多爾濟悉族來  
歸弟曰西第什里

賜牧蘇尼特界內阿嚕額埒蘇台從弟曰巴朗曰岱青

諾顏洪果爾牧蘇尼特界內烏納齊族子曰禮塔爾附牧右翼親王諾內部族弟曰固嚕什喜牧四子部落界外洪果爾發歸化城倉粟賑之

尋

命與噶爾丹會盟議和噶爾丹既遷沙喇妻子沙喇弟策旺札布隨母扎爾穆轉徙年餘遂相失至是策旺札布偕同族色稜阿海等相繼至

詔附牧烏喇特諸部是時車臣汗部賽音諾顏部並避噶爾丹難率屬來歸初車臣汗諾爾布卒伊勒

登阿喇布坦嗣稱汗駐牧克嚕倫河北巴顏烏  
蘭伊勒登阿喇布坦卒子烏默客襲

上遣侍衛阿南達往賻會噶爾丹敗察琿多爾濟偵烏  
默客幼弱由圖拉踰克嚕倫謀掠巴顏烏蘭所  
部聞之懼欲遁烏默客叔父納木扎勒倡議內  
附衆始定因白烏默客母率衆來歸阿南達以  
聞

詔附牧烏珠穆沁界外阿爾圖地先是烏珠穆沁及浩  
齊特蘇尼特阿巴噶阿巴哈納爾皆舊爲車臣

汗屬部後相繼南徙隸內扎薩克獨阿巴哈納  
爾諸台吉有留故土者曰根敦額爾克曰阿海  
烏巴什曰伊克岱青額爾克烏巴什凡千餘戶  
仍隸車臣汗至是隨烏默客至并所部十餘萬  
戶均於界外

賜牧安置有車布登者亦烏默客叔父號額爾克台吉  
駐牧克嚕倫河之南烏純地隨烏默客來歸以  
烏純距邊近遣歸牧

命烏默客襲汗號如故烏默客幼

詔納木扎勒駐牧烏珠穆沁界外布哈和賴距烏默客  
居一日程兼領其衆代掌旗務賽音諾顏部長  
善巴嘗以兵助察琿多爾濟禦噶爾丹於鄂羅  
會諾爾不敵兵潰攜孥來歸

賜牧烏喇特部界外其再從弟丹津額爾德尼仍駐牧  
哈嚕特山丹津額爾德尼者畢瑪里吉哩諦之  
孫也其偕至之伊勒登楚琥爾烏巴什居烏蘭  
布拉克地諾木齊岱青居都什地喀喇庫蘭居  
奧吉碩隴地木札勒墨爾根居茂金口地阿玉

什額爾克阿海居蘇巴爾罕地阿喇布坦岱青  
阿海居楚布魯洪郭爾地烏巴什居喀喇和碩  
地皆附收烏喇特界有扎薩克圖汗部人曰索  
諾木曰伊斯札布者額爾德尼濟農朋素克喇  
布坦從弟也率屬由和碩託輝來歸

命居歸化城理藩院奏降衆日多請授納木扎勒等爲  
扎薩克轄之

報可

命科爾沁親王沙津等往示內地法度

諭曰朕因爾等爲厄魯特所掠憐而納之今觀爾等並  
無法制約束部曲恐劫奪不已離析愈多爰命增置  
扎薩克分掌旗隊禁止盜賊各謀生業爾等果能遵  
而行之寇盜不興禍亂不作庶副朕撫育歸降愛養  
羣生之至意是年爲噶爾丹故

上幸塞外駐蹕紅川車臣汗部人洪俄爾岱青率衆來  
降先是洪俄爾岱青世爲琿台吉駐牧克魯倫  
河之南穆壘和碩瑪塔特諸界以時入貢最恭  
順噶爾丹掠所部誘達賴宰桑授之檄令還誘

其主洪俄爾岱青弗從遣使乞內附

召覲行幄

諭曰爾喀爾喀與厄魯特世世通貢朕一體優禮從無偏私今聞互相結怨亟遣使諭令和睦使臣未至而喀爾喀敗遁悉至汎界朕以亂尙未定故留之未遣朕昔遣兵討羅刹時爾母達賴達喇納豫備糗糧牛羊資送大軍今爾又率屬歸誠朕甚嘉之特賜爾御用朝珠一以示優獎尋

命附牧札賚特界外瑣圖塔什海授扎薩克二十八年



土謝圖汗察琿多爾濟疏乞免與噶爾丹會盟  
諭廷臣曰朕統御天下窮者救絕者繼離散者使之完  
聚交惡者使之和協恆欲中外生靈羣底安樂察琿  
多爾濟與噶爾丹交惡朕屢遣使諭止不肯罷兵以  
致屬衆潰散窮困來歸朕因其昔日職貢維謹憐而  
納之留置邊境頒給米粟但念兵端未息生民何日  
可安是以敕令議和今伊旣以會盟爲難朕亦不强  
其諭使知朕意

詔授察琿多爾濟族弟固嚕什喜濟農號

諭曰墨爾根諾顏固瞻什喜係喀爾喀舊扎薩克職貢  
有年今因所部潰亂卽率衆內附洵不愧墨爾根號  
朕甚嘉悅着晉號濟農居三汗之次尋以固瞻什喜  
與諾顏呼圖克圖爭產互訐

遣官諭解並

諭諸部輯所屬潰散者土謝圖汗族岱青諾顏洪果爾  
至

命巴朗兼領其衆洪果爾者巴朗族弟順治初巴朗之  
父喇嘛塔爾及洪果爾之父額爾克岱青嘗貢

方物蒙

頒賚會騰機思叛逃袞布碩壘皆遣兵迎獨喇嘛塔爾  
與額爾克岱青不可且遣送前使至

世祖嘉悅

諭曰爾等自通好以來惻忱甚摯今復不肯舉兵助逆  
忠順如此朕豈有不報之理耶嗣是朝貢不絕

賜賚便蕃既聞噶爾丹肆掠岱青諾顏洪果爾因避居  
楚克地巴爾亦徙收色楞額河近俄羅斯之地  
巴朗先內附至是岱青諾顏洪果爾亦攜屬七

百餘戶來歸同族台吉諾木齊岱青子齊巴克  
額爾克及鄂齊爾子達什敦多卜等相繼至

命察琿多爾濟轄之車臣汗部台吉額爾克綽克圖暨  
包爾呼巴特瑪達嚕噶索諾木達嚕噶等攜屬  
踵至

命烏默客轄之尋授烏默客叔父車布登扎薩克時大  
軍征噶爾丹車布登捐助弁兵乏馬者有阿南  
達者車臣汗碩壘第十子烏默客曾叔祖也駐  
牧克嚕倫河之北索和尼至是率子貢楚克暨

台吉札布伊勒登等來歸

詔阿南達所攜戶屬分牧錫喇什寶台及烏珠穆沁界  
內之都什多羅特浩齊特界內之固都哩呼而  
合阿南達留牧阿魯科爾沁界內之呼魯蘇台  
往來防護會其屬泰賴等糾眾肆劫

命嚴懲之

授賽因諾顏部長善巴扎薩克

詔隸內扎薩克之喀爾喀右翼親王諾內往示內地法

度弁

遣官發殺虎口倉粟賑其衆扎薩克圖汗部人根敦者  
世居和託輝特其地爲喀爾喀極邊西近厄魯  
特北近俄羅斯俗喜鬪烏梁海復錯處其間捕  
貂射獵依木而居納賦和託輝特有事則藉之  
爲兵故和託輝特雖隸扎薩克圖汗實自爲一  
部尙書阿喇尼於二十五年奉

命赴庫掄伯勒齊爾泣喀爾喀盟時根敦從兄子額琳  
沁戕其汗旺舒克西奔厄魯特久無統屬阿喇  
尼承

制授根敦扎薩克使領其衆追噶爾丹侵所部徙屬避  
色楞額河自引兵擊走噶爾丹將濟喇克偉徵  
喀什哈等既而所部齊巴克塔爾及諾木齊札  
朗阿伊爾札海等附噶爾丹逸走根敦追執之  
收其戶畜乘勝由杭愛山趨阿爾台斬噶爾丹  
將察罕台吉及烏爾袞而還十二月善巴等請  
赴窩夏互市

許之是年秋土謝圖汗部減收

遣內大臣伯費揚古往賑

諭廷臣曰朕聞土謝圖汗屬衆有乏食致斃者深爲軫念費揚古採買牲畜尙需時日著速發張家口倉粟運往散給計支一月牲畜繼之則衆命可活矣二十

九年春

詔察土謝圖汗所屬貧戶遣就食張家口故扎薩克圖汗沙喇子巴朗等由阿爾台逃歸遇故台吉卓特巴偕內附聞同族岳蘇圖阿海游牧烏蘭往依之三月土謝圖汗族人昆都倫博碩克圖昆布爲噶爾丹所掠集衆來歸



命同族扎薩克噶爾丹多爾濟選兵偕車臣汗部兵隨  
尙書阿喇尼侍郎溫達赴圖拉河援之謀袞布  
居額爾古納河遣郎中馬迪往迎渡克嚕倫河  
而南時噶爾丹居阿爾坦額默爾在克嚕倫河  
北由烏爾順喀爾喀二河來追袞布敗走大軍  
迎擊噶爾丹遁

諭成袞移牧內汎賽音諾顏部人托多額爾德尼素勇  
悍噶爾丹之自杭愛山轉掠克嚕倫所部多潰  
走托多額爾德尼獨拒戰殺傷略相當賊衆稍

衰有兩人共一騎及削木爲杖者至是偵噶爾  
丹居巴顏烏蘭偕同族素泰伊勒登以兵三千  
赴圖拉遏噶爾丹歸路五月巴朗率所屬來朝  
乞襲汗號

上憫其父無辜被殺欲俟會閱以雪其冤而後命之襲  
未許也授卓巴特扎薩克

賜居歸化城同族台吉日喇布坦日納木札勒鄂齊爾  
日冰圖岱青等相繼降

命轄之發粟賑所屬貧戶十月托多額爾德尼自軍營

入

覲優賚之士謝圖汗部人敖巴私縱屬千餘劫驛騎

上憫其無知不忍治檄察哈爾兵制之車臣汗部人洪

俄爾岱青及達賴宰桑爲噶爾丹所掠不獲歸

洪俄爾岱青兄子罕篤代領其衆肆劫內地

命尙書阿喇尼遣罕篤攜衆入科爾沁界附親王沙津

游牧罕篤至仍肆劫遣出界其兄車布登乞留

牧

諭飭屬毋爲盜扎薩克圖汗部扎薩克博貝來朝先是

博貝奉貢至奏喀爾喀習尙偷惰必敗亡彼時  
臣必來歸至是

上憶前奏嘉其先見

賜賚甚厚三十年正月

上以噶爾丹服罪立誓上書請降慮其狡詐

命賽音諾顏部扎薩克善巴隨侍郎五岱赴圖拉河偵  
禦路由克嚕倫土謝圖汗從弟錫布推哈坦巴  
圖魯率諸弟迎五岱降初噶爾丹由杭愛山肆  
掠錫布推哈坦巴圖魯逆擊之有和托輝特二

台吉誓相戮力既而背盟怒而拘之會噶爾丹  
誘降又執其使避走克嚕倫河至是來歸

上嘉之

諭曰爾於察琿多爾濟爲兄弟行職貢有年當噶爾丹  
誘爾時獨知大義雖敗不降今隨大軍慕化歸誠朕  
甚嘉悅特封爾爲扎薩克輔國公爾其勛之仍歸巴  
顏烏蘭游牧尋徙圖拉河

上以察琿多爾濟來歸後喀爾喀全部內附封爵官制  
宜更定且降衆數十萬錯處應示法制俾遵守

將

巡幸多倫諾爾行會閱禮

詔三汗及賽因諾顏諸部長隨四十九旗扎薩克先集

以俟尙書馬齊奉

命往議禮定賞格九等坐次七行以察琿多爾濟爲之

首夏四月

駕至喀爾喀汗濟農諾顏台吉等三十五人以次朝見  
諭曰爾等以兄弟之親自相侵奪啟釁召侮致全部潰  
散其時若令四十九旗扎薩克將爾人衆收取爾部

早已散亡朕好生之心出於天性不忍視爾滅亡置  
附界內給與贍養自古以來未有如朕拯救愛養如  
此者也用是親臨教誨普加賞賚會同之時見爾等  
傾心感戴特沛恩施俾與四十九旗同列以示一體  
撫育罔分中外爾等其知朕意

命土謝圖車臣扎薩克圖三汗仍留汗號如故改諸部  
濟農諾顏舊號封王公貝勒台吉等爵有差各  
授扎薩克編佐領一如內蒙古之制三十二年  
土謝圖汗部人車稜札布集屬六百自俄羅斯

來歸乞附巴顏烏蘭牧

允之尋授一等台吉仍兼扎薩克三十四年車臣汗部  
鎮國公罕篤誘奪錫喇布所屬懼討執郎中音  
札納以叛脇台吉札木巴拉等遁附俄羅斯旣  
而札木巴拉等謀擒罕篤不克乃自拔歸謀罕  
篤由博爾濟河走俄羅斯弗納攜五百餘衆棲  
額克阿喇勒勢甚憊八月俄羅斯擒罕篤以獻  
伏誅三十五年

聖祖親征噶爾丹大將軍費揚古等大破賊衆於昭莫



多三十六年噶爾丹竄死朔漠悉平

詔遣喀爾喀諸部並歸舊牧加封有功諸台吉增編爲  
五十五旗屯田於鄂爾昆河左右並徵其兵防  
秋於阿爾泰山

世宗憲皇帝雍正五年以庫倫恰克圖爲土謝圖汗部  
與俄羅斯互市地

詔非市期毋許俄羅斯踰楚庫河界

命賽音諾顏部郡王額駙策凌偕內大臣伯四格侍郎  
圖理琛等赴楚庫河與俄羅斯使臣薩瓦立石

定界策凌陳兵鳴礮謝天四格歸劾奏議罪應  
削爵

詔罰俸三年免削九年以策凌奮擊準噶爾立大功

詔晉封超勇親王錫黃帶城塔密爾河居之佩定邊左

副將軍印進屯科布多

授盟長便宜行事又分土謝圖汗部所滋息之二十一

旗隸賽音諾顏部而析所留之十六旗爲二十

仍隸土謝圖汗部由是賽音諾顏部始爲大扎

薩克與三汗部並列共七十四旗云初準噶爾

欺喀爾喀部兵不競屢闖其庭如出入無人之境及爲策凌所挫孕重墮殞始駭喙不敢窺塞高宗純皇帝登極與準噶爾議和定界皆令策凌會議乾隆十五年策凌薨以功配享

太廟及平準噶爾策凌之子成衮札布車布登札布咸從征有功於是喀爾喀戶口蕃盛增至八十四旗建城烏里雅蘇台及科布多駐定邊左副將軍及參贊大臣鎮撫之永爲定制而定邊左副將軍節制喀爾喀三汗一諾顏八十四旗及金

山天山間烏梁海等數十部落爲漠北第一重  
鎮云

朔方備乘卷三

舉人王樹相初校  
知縣吳壽坤覆校

朔方備乘卷第四

聖武述略四

準噶爾蕩平述略敘

臣秋濤謹案準噶爾舊爲西北強部其境與俄羅斯接壤其勢亦與俄羅斯埒大昔康熙間克魯倫河之役地近東方故悉發東三省兵令黑龍江將軍薩布素統之自是戰於烏爾會捷於昭莫多地皆在杭愛以東旣而窺青海寇西藏則邊警之來又在洮岷以西蓋沙磧之地號爲

英丁信身  
瀚海準部恃勢憑陵出沒靡定卽俄羅斯亦深  
憚之異域錄云俄羅斯東境城邑如塔喇斯科  
等處與策妄阿拉布坦相鄰每被侵擾足知準  
部剽劫之習犯天下之公怒也我

朝統一寰宇溥海內外罔弗臣服惟準部跳梁西  
陲勞

三朝廟算始克平之世咸知乾隆中取新疆闢地二萬  
餘里按準回二部東西六千餘里南北三千餘  
里以徑一圍三計之得周二萬餘里然康熙中

因準部攻喀爾喀

聖祖撫而收之計喀部東西五千餘里南北三千餘里  
其周已逾二萬里矣迨準部寇西藏

聖祖發兵逐之收其地入版圖計藏地東西南北各五  
六千里其周又逾二萬里矣雍正中青海羅卜

藏丹津蓄叛謀

世宗命將收其地東至甘肅西至藏地三千餘里北至  
沙州南至中甸五千餘里其周又逾二萬里矣  
因此三地悉入疆索而西北萬里外之俄羅斯



業已講信修睦永相和好然後

高宗西伐成功於指顧之間卽阿逆叛逃終爲羅刹執

獻蓋外域之服

教畏

神非一日矣說者謂西北數萬里之版章

聖祖樹之

世宗培之

高宗穫之蓋惟有

善繼善述之美而後

文謨

武烈益顯著於天下固億萬世

聖子神孫所當永遠效法者已

準噶爾蕩平述略

準噶爾者厄魯特四部之一其先本元阿魯台部聲譌爲厄魯特後分爲四日和碩特曰準噶爾曰杜爾伯特曰土爾扈特其游牧在金山之西各有分地以伊犁爲會宗處東鄰喀爾喀北鄰俄羅斯準噶爾兵力強於諸部

國初時其酋嘗遣使通貢後有噶爾丹者

臣秋濤謹案一

作噶爾旦一作額諾德

自立爲汗性兇狡攻滅和碩特鄂

齊爾圖汗并其地遂侵掠其鄰喀爾喀部喀爾

喀地在我四十九旗蒙古之北與準噶爾接壤

至是爲所侵擾勢不支康熙二十七年喀爾喀

之士謝圖汗車臣汗等率全部來歸並不敢游

牧於故地避入我邊境

聖祖敕噶爾丹率衆西歸還喀爾喀侵地噶爾丹旣屢

勝益驕蹇遂據喀爾喀庭幕四出攻剽二十九

年五月俄羅斯使人吉里古里伊法尼齊等至  
京

詔諭之曰噶爾丹揚言會爾國兵同侵喀爾喀喀爾喀  
已歸順本朝儻誤信其言是負信誓而開兵端也爾  
等可疾遣善馳者二人歸告尼布潮頭日令伊徧諭  
俄羅斯之眾當是時噶爾丹以追喀爾喀爲名選銳  
東犯侵及烏爾會河尙書阿爾尼率兵備邊會  
厄魯特驅掠喀爾喀人畜過阿爾尼以蒙古兵  
擊之而令喀爾喀奪還所掠喀爾喀務爭取陣

遂亂厄魯特因而乘之反爲所敗乃以裕親王  
福全爲撫遠大將軍恭親王常寧爲安北大將  
軍出師至烏蘭布通大敗其衆噶爾丹始以書  
來乞和然弗悛也其兄子策旺阿拉布坦亦爲  
所凌虐嘗遣間使來附我使者往爲厄魯特所  
害三十三年約其來會盟不報而擾喀爾喀益  
甚

聖祖仁皇帝念喀爾喀爲我外藩不庇之使安游收勢  
將以近邊蒙古地處之則蒙古生計亦受害自

非大創噶爾丹不可乃決計用兵又恐我兵至而敵先遁也三十四年圖謝圖親王沙津來覲于木蘭具言噶爾丹約其爲內應將入邊

聖祖仁皇帝命沙津僞與相結誘其兵來是秋噶爾丹果掠喀爾喀之納木扎爾陀音所部駐兵於土喇及克魯倫河之間自秋徂冬不去亦不犯漠南遣使往激之賊令使者徒步歸且大言借俄羅斯烏鎗兵六萬將大舉內犯蓋以烏蘭布通之役火器不如中國而敗故佯假西洋火器以

張其軍其實俄羅斯並無意助寇且噶爾丹懲前敗亦未敢深入也三十五年春三路出師

聖駕統禁旅由中路出獨石口向克魯倫河進發黑龍江將軍薩布素率東三省兵出東路遏其衝撫遠大將軍伯費揚古率將軍孫思克總兵康調元等出西路向土喇進發五月五日大兵至克魯倫河噶爾丹已遁追之不及

聖駕回鑾費揚古兵至昭莫多探知噶爾丹在特勒克濟相距僅二十里遣碩岱誘之孫思克陣東阜

康調元陣西亭以待賊果大至我軍擊之自未  
至西噶爾丹大敗追殺三十餘里斬數千級生  
擒數百人牛二萬餘羊四萬餘軍資器械無算  
噶爾丹之妻阿奴哈屯亦死於亂軍其他台吉  
宰桑陣歿者不可數計投費揚古軍者二千餘  
人投馬思喀軍者五百餘人噶爾丹既敗與台  
吉會於塔米爾噶爾丹欲往翁金丹濟喇欲往  
阿爾台阿賴卜灘臣秋濤謹案一作阿拉布坦及丹津俄木  
布欲往俄羅斯邊境皆無定議已而丹津俄木



布之人盜噶爾丹部內羊馬噶爾丹責之遂有隙丹津俄木布叛去惟丹濟喇及阿賴卜灘尙隨之又有諾顏格隆及吳爾占扎卜等亦率其屬以從然所屬各不過千人少僅數百人

聖祖仁皇帝欲乘勢遂滅之秋九月

聖駕再發京師往歸化城經理其事檄諭青海諸台吉協擒噶爾丹諭策妄阿拉布坦亦如之又多遣間使招其黨與時翁金有我軍所餘糧噶爾丹欲資以度冬使丹濟喇來劫我副都統祖良璧

敗之其遣往達賴喇嘛之使人喇克巴過青海亦爲我副都統阿南達所擒有台吉厄爾克巴圖等皆承檄與策妄阿拉布坦會於阿爾台約共擒噶爾丹噶爾丹聞之遂向白格爾西去十

二月

聖駕回京三十六年春噶爾丹之子塞卜騰巴爾珠爾捕獸於巴爾思庫爾我哈密回日都拉達爾罕遣子郭帕擊擒之俘送京師二月

聖駕啟鑾往寧夏時噶爾丹竄於薩克薩呼里克資野

獸以給勢益蹙諸合吉咸出怨言噶爾丹於三月十三日仰藥死丹濟喇攜其屍及其女鍾濟海來降

聖祖仁皇帝以噶爾丹餘眾畀策妄阿拉布坦無何狼子野心漸狂悖五十四年來擾哈密我駐防哈密之遊擊潘至善拒之肅州總兵路振聲出兵應援敵始去自是常發兵備邊五十六年以內大臣傅爾丹爲振武將軍駐阿爾台尙書富寧安爲靖逆將軍駐巴里坤散秩大臣祁里德爲

協理將軍在西路策應是年冬策妄阿拉布坦遣大策零敦多卜侵西藏藏中會長曰拉藏汗與達賴喇嘛及班禪厄爾得尼退守布達賴五十七年侍衛色楞率西寧兵會同青海王台吉等進援總督額倫特繼之未至而拉藏汗已爲敵所殺額倫特敗賊於齊諾郭勒色楞敗賊於喀喇烏蘇尋合兵進勦八月朔日賊大至額倫特中槍殞我師敗績於是撫遠大將軍允禴率重兵駐西寧五十八年平逆將軍延信由青海

定西將軍噶爾弼由打箭爐兩路進兵收復藏地傅爾丹富寧安祁里德等亦由西北兩路襲擊以分賊勢富寧安在僻展降回眾三百餘至吐魯番降番眾千餘祁里德亦降厄魯特宰桑塞卜騰等二千餘傅爾丹至格爾額爾格殺厄魯特二百餘擒宰桑貝肯等百餘然皆未深入也八月延信兵與大策零敦多卜戰於密諾郭勒綽瑪喇等處皆捷噶爾弼由南路乘虛入聞春丕宰桑以兵來拒及其未至先克墨朱工喀

所至望風歸款朱貢之胡土克圖獻地降第巴  
達克咱及喇嘛鍾科爾亦降卽令聚皮船渡河  
乘勢直抵西藏藏中大小頭目及各寺喇嘛俱  
歡迎恐後盡擒獻準噶爾喇嘛百餘人其大策  
零敦多卜所授爲總管者俱斬於軍前西藏遂  
復雍正元年青海王羅卜藏丹津叛以陝督年  
羹堯爲撫遠大將軍提督岳鍾琪爲奮威將軍  
入平之羅卜藏丹津走投策妄阿拉布坦

世宗憲皇帝遣使索之不卽獻惟不敢入犯乃撤兩路

兵量留兵哈密護其耕作五年策妄阿拉布坦  
死子噶爾丹策零襲凶狡好亂過於其父又集  
兵窺邊乃復以傅爾丹爲靖遠大將軍駐阿爾  
台岳鍾琪爲寧遠大將軍駐巴里坤噶爾丹策  
零遣小策零敦多卜以二萬衆犯闕舍圖掠駝  
馬總兵樊延副將冷人雄拒退之九年六月傅  
爾丹出師敗績於和通淖爾兵二萬得歸者僅  
二千餘岳鍾琪聞傅爾丹被圍急出師遙爲聲  
援亦不能大獲賊得志益猖獗大策零敦多卜

駐華額爾齊斯小策零敦多卜駐喀喇額爾齊斯日伺釁擾邊時方築城於科布多以地遠難守移營於察罕瘦爾以順承親王錫保爲靖邊大將軍鎮之降傅爾丹仍爲振武將軍又以馬爾賽爲綏遠將軍駐歸化城爲犄角兩策零敦多卜一由郭多里一由杭愛來掠喀爾喀公通靡克兩佐領人畜爲所擄通靡克率所部內移小策零敦多卜自率大眾屯蘇克勒達錫保令喀爾喀親王丹津多爾濟及額駙策凌與戰於



鄂登楚克敗之時議以推河翁金河拜達里克  
河三處皆要地乃各築城爲大營犄角馬爾賽  
率兵移守拜達里克城以扼山南之衝十年又  
有塞卜騰策零那木扎爾由烏魯木齊來擾哈  
密岳鍾琪遣總兵曹勳副將紀成斌拒之秋噶  
爾丹策零傾國入寇至額駙策凌所部策凌方  
入朝遂盡掠其貲畜二子一妾亦爲所得策凌  
在途聞之割辮髮及所騎馬尾誓以死復讐卽  
借各蒙古兵回救噶爾丹策零方酣飲爲樂策

凌夜半由間道繞出山後黎明自山頂大呼壓而下賊驚起人不及甲馬不及鞍棄其軍貨猝遁策凌追及之於額爾德尼招左阻山右限大水賊無路走我兵乘勢蹙之擊殺數萬尸滿山谷河水數十里皆赤噶爾丹策零由鄂爾昆竄去策凌卽檄馬爾賽出拜達里克城截殺臣秋濤謹案趙翼謂策凌急檄馬爾賽出歸化城邀擊魏源曰考方略馬爾賽是時已不在歸化況此戰在漠北歸化城在漠南相去二千餘里賊敗必西走何由轉繞大漠東南爲歸路乎松筠新疆識略俞正燮癸巳類稿並沿其誤故辨之副將軍達爾濟整兵待發

馬爾賽不許副都統傅鼐至跪求出兵亦不許  
軍士登城望見賊騎由城下過如亂鴉投林紛  
雜無行列翌日將士不稟命自出追之噶爾丹  
策零已從前隊過僅截其零騎馬爾賽由是伏  
法而噶爾丹策零衰弱亦不敢擾邊等遣人來  
議和十二年傅鼐及學士阿克敦報之尋以所  
議邊界不決使命往返至乾隆四年始定議厄  
魯特游牧不得過阿爾台喀爾喀游牧不得過  
札卜堪兩國各遵守已又許其通市易及進藏

作佛事入馬貨物各限以數乃盡撤西北兩路  
兵十年噶爾丹策零死其子策妄多爾濟那木  
扎爾嗣位昏暴不恤國事十五年其姊夫賽音  
伯勒克弒之立其庶兄喇嘛達爾濟本噶爾丹  
策零外婦所生子也有大策零敦多卜之孫達  
瓦齊於喇嘛達爾濟爲近屬喇嘛達爾濟忌之  
輝特台吉阿睦爾撒納者最狡黠欲搆達瓦齊  
篡亂而已從後圖之乃與達瓦齊合兵突入伊  
犁弒喇嘛達爾濟達瓦齊自立爲汗阿睦爾撒

納欲襲之而力不敵十九年遂與都爾伯特台吉訥默庫和碩特台吉班珠爾率所部二萬餘人來降且乞師往靖亂其意欲借我兵力滅達瓦齊而已得據其處也先是喇嘛達爾濟之立以台吉達什達瓦素爲策妄多爾濟那木扎爾所任用執而廢之欲以其部衆分賞各台吉其部有宰桑薩拉爾不肯他屬率千戶來降

高宗純皇帝授爲散秩大臣詢以準夷事備悉其內亂狀然尙未欲用兵也迨達瓦齊之篡有都爾伯

特台吉策凌臣秋濤謹案一作車凌下同一及策凌烏巴什策

凌蒙克率所部來降益得悉其情形亡可企足

待

高宗純皇帝念我朝數十年設斥埃議邊防厲兵秣馬

欲殄滅準噶爾而未能者今事會適有可乘時

不可失於是用兵之策遂決方調兵籌餉以圖

大舉而阿睦爾撒納來降尙書舒赫德奉

命往撫率請留其壯丁於烏里雅蘇台軍營而部落悉

徙蘇尼特斥罷之更以尙書班第往輯其衆俾

游牧於札卜堪阿睦爾撒納等至熱河封爲親  
訥默庫班珠爾皆封郡王寵賚甚至二十年春  
兩路出師北路以班第爲定北將軍阿睦爾撒  
納爲定邊左副將軍副之西路以陝甘總督永  
常爲定西將軍薩拉爾爲定邊右副將軍副之  
所至準夷各部落大者數千戶小者數百戶攜  
醢酪獻羊馬跪迎恐後兩路兵行數千里無一  
人抗顏行者五月五日齊抵伊犁達瓦齊已遁  
於格登山阻淖爲營衆尙萬餘我兵追及之侍

衛阿玉錫等夜以二十二騎直薄其營呼噪突  
入賊萬眾驚潰達瓦齊竄於呼爾滿回酋霍集  
斯承檄縛獻軍門並獲青海叛賊羅卜藏丹津  
及前歲已降復叛之巴朗先後檻送入京行獻  
俘禮是役也出師僅百餘日不傷一兵不折一  
矢犁庭掃穴生縛名王沙漠萬里悉入版宇信  
自古未有之駿烈也厄魯特之先故有四衛拉  
特華言四大部也部各有汗

高宗純皇帝之初用兵也欲俟平定後仍其舊設四汗



衆建以分其勢可以消亂萌息邊釁如喀爾喀之編七旗至今長享太平而阿睦爾撒納志不在此也

高宗純皇帝預燭其情甫出兵卽密諭班第示以分封四汗之意以消其妄念又以額駙色布騰巴爾珠爾本科爾沁親王與阿睦爾撒納語言相通氣類相近令與阿睦爾撒納偕行俾耦居無猜實陰伺察之乃額駙反與之昵阿睦爾撒納遂恃爲奧援旣平伊犁班第及西路參贊大臣鄂

容安留伊犁與阿睦爾撒納薩拉爾共籌善後  
事宜阿睦爾撒納輒隱以汗自處事多不稟承  
將軍生殺任意置副將軍印不用用其國汗舊  
傳小紅鉛記發書鄰部哈薩克及俄羅斯之烏  
梁海又使其黨布流言謂不立阿睦爾撒納爲  
汗準部終不得安班第鄂容安密以其事馳奏  
得

旨卽軍中誅之毋濡忍貽後患而是時大兵已撤隨將  
軍者僅五百兵其餘皆厄魯特也班第等遂不

敢舉事時先有

旨令阿睦爾撒納以九月至熱河行飲至禮班第等乃  
趣其入覲欲使入我境則易擒也先是六月中  
額駙先回阿睦爾撒納私以總統四部之意乞  
其代奏並約略時日以七月下旬爲期及額駙  
歸不敢奏而阿睦爾撒納待信不至以入覲期  
迫班第又令喀爾喀親王額林沁多爾濟伴行  
阿睦爾撒納不得已自伊犁起行途次屢遷延  
迨八月中旬尙無信疑事中變十九日行至烏

隆古距其舊游牧僅一日程詭稱歸辦裝以副  
將軍印付額林沁多爾濟使先行約一二日卽  
追及遂率所部逃去額林沁多爾濟久之始悟  
其給已急追之已不及阿睦爾撒納寄聲伊犁  
衆厄魯特嗾其反又使其黨阿巴噶斯哈丹等  
掠西路軍台先已潛遣人迎其妻子及部衆於  
札卜堪賴先事已奉

聖諭烏里雅蘇台軍營得爲備其妻子遂不能去而伊  
犁宰桑克什木敦多卜曼集等蠢起爲亂二十

三日班第鄂容安薩拉爾率五百兵奪路歸賊  
萬眾圍之至崆吉斯薩拉爾先遁五百兵皆散  
班第鄂容安自刎死定西將軍永常方駐木壘  
聞軍台被掠六七處恐賊大至乃退回巴里坤  
時新降諸台吉方覲於熱河噶爾藏多爾濟封  
爲綽羅斯汗沙克都爾滿津封爲和碩特汗巴  
雅爾封爲輝特汗其先降之策凌巴封親王至  
是亦封爲都爾伯特汗其餘宰桑呢嗎丹津巴  
桑厄魯錐音哈薩克錫拉等各授官賞銀幣皆

願歸出兵協勦阿睦爾撒納

高宗純皇帝以額駙匿情不奏致誤軍事革其爵發軍前効力額林沁多爾濟與阿睦爾撒納偕行而聽其兔脫立賜之死又以永常恆怯退兵逮問來京以公策楞爲定西將軍富德玉保達爾黨阿俱爲參贊大臣由巴里坤速進兵十一月師行玉保爲前隊諸降夷入覲後回游牧者亦各以兵從二十一年正月薩拉爾自伊犁脫歸迎大軍於吐魯番玉保至特克勒探知阿睦爾撒

納僅距一日程急進可追及忽有報台吉諾爾  
布已擒阿睦爾撒納來獻者玉保遂駐兵待之  
先以紅旗報捷於策楞策楞亦不暇審虛實卽  
以紅旗報入

京而不知報擒阿睦爾撒納者卽阿睦爾撒納所  
遣慮我兵追及故以此緩師而已得逸去也二  
月策楞兵至伊犁阿睦爾撒納已逃入哈薩克  
乃褫策楞玉保職用達爾黨阿爲定西將軍富  
德副之以擒阿睦爾撒納事專任此二人直入

哈薩克索取繼

命巴里坤辦事大臣兆惠爲定邊左副將軍往軍營應

援諸降夷在軍前者皆撤歸使得休息夏六月

忽有喀爾喀郡王青滾雜卜

臣秋濤謹案一作青滾咱卜

撤

軍台之事北路郵驛本喀爾喀各部應役自用

兵以來軍報絡繹需人馬頗多青滾雜卜苦之

遂撤其所設台文報中斷又以額林沁多爾濟

之賜死謂我喀爾喀本青吉斯汗子孫例不治

罪以此散流言衆喀爾喀惑之自十六台至二



十九台一時盡撤乃以超勇親王策凌之子成  
袞扎布爲定邊左副將軍往勦捕又

命尙書納延泰侍郎阿桂等往各台旋即復設達爾黨  
阿等之追賊至哈薩克界阿睦爾撒納方借哈  
薩克兵來拒我兵擊敗之陣獲哈薩克人楚魯  
克等願說其酋長阿布賚擒阿睦爾撒納來獻  
阿布賚旋遣人送馬並爲阿睦爾撒納乞命達  
爾黨阿不許使命往返迄數月未得賊時將冬

寒

命達爾黨阿等撤兵由北路歸與成衮扎布協擒青滾  
雜卜是年冬阿桂追獲之始伏誅而西路諸降  
夷巴雅爾呢噶爾藏多爾濟哈薩克錫拉等聞  
青滾雜卜之變亦羣起叛亂我副都統和起殲  
馬策楞玉保逮入京在途亦爲所害兆惠方駐  
兵濟爾喀朗聲息阻隔或傳其率兵途次爲賊  
所截者巴里坤大臣募人往探大風雪莫敢應  
有守備高天喜獨請行侍衛圖倫楚已由巴里  
坤率兵往兆惠方率千有五百兵轉戰而東自

十一月起行戰於塔勒奇戰於鄂壘前後殺賊  
數千二十二年正月至烏魯木齊諸賊皆會自  
十二日至十七日數十百戰然軍中無馬皆步  
行雪淖中履襪亦多不完所食惟瘦駝疲馬且  
將盡二十三日至特納格爾今阜康縣不復能衝殺  
乃結營固守三十日圖倫楚兵至諸賊始解圍  
去兆惠得圖倫楚兵又往勦巴雅爾部落始回  
巴里坤是歲再出師擒阿睦爾撒納並勦洗諸  
叛者成袞扎布出北路兆惠出西路皆於三月

中起行會諸賊自相吞噬扎納噶爾卜襲殺噶  
爾藏多爾濟呢嗎又欲襲扎納噶爾卜不果阿  
睦爾撒納自哈薩克歸會諸賊於波羅塔拉欲  
自立爲汗我兵將至又遁去諸賊皆竄匿於是  
兆惠擒原任內大臣巴桑鄂博什擒原任散秩  
大臣厄魯錐音圖倫楚擒原任貝勒訥奇木海  
蘭察擒巴雅爾烏爾登擒呢嗎扎納噶爾卜已  
病故台吉琿齊達瓦以其首來獻惟阿睦爾撒  
納尙未獲夏六月兆惠富德等又窮追至哈薩

克阿布賚誓擒以獻適阿睦爾撒納率二十人  
往投阿布賚約以詰朝相見先使人收其馬阿  
睦爾撒納驚又逃阿布賚執其兄達什策凌送  
軍門阿睦爾撒納徒步入俄羅斯爲樵者所得  
守卡之瑪玉爾送往其國察罕汗處理藩院行  
文俄羅斯索之阿睦爾撒納患痘死俄羅斯以  
其屍送入邊兆惠富德因擇地過冬明年再盡  
勦厄魯特之漏網者二十三年春兆惠由博羅  
布爾噶蘇富德由賽里木如獵場中分兩翼合

圍會於伊犁凡山陬水涯可漁獵資生之地悉  
搜剔不遺於是準部悉平設伊犁將軍以莅治  
之建官屯田築城開渠遂爲西北一大都會億  
萬年被

聖澤於無涯云

朔方備乘卷四

拔貢張惇德初校  
知縣吳壽坤覆校

朔方備乘卷第五

聖武述略五

征烏梁海述略敘

臣秋濤謹案西北部族有居國行國之殊人人能言之至同一行國而有游牧採捕之別則知之者罕今漠北之地烏梁海業採捕散處山林而受役屬於喀爾喀準噶爾諸大部蓋自古漠北之俗以游牧者爲強國而捕貂打牲之人附之匈奴之興役屬丁零諸部突厥之興役屬鐵



勒諸部以古準今若合符節康熙年間喀爾喀  
既內屬其所屬之烏梁海等亦皆歸順

天朝供賦聽役比於內地惟準噶爾所屬之烏梁海  
部人在烏里雅蘇台之北俄羅斯之南阻深負  
固未供貢役

聖祖初亦度外置之已而策妄阿拉布坦跋扈倚烏梁  
海爲援始議征烏梁海以殺準部之勢厥後北  
路大兵控扼要衝因以漸撫勦迨及乾隆年間  
又屢征之而卡倫外之烏梁海遂全歸版籍矣

自定界以外直抵俄羅斯國別有屬彼之烏梁  
海人貢貂於彼國蓋風俗同而統轄異也烏梁  
海部落雖小然金山劍海之間古爲用武之地  
自

天威遠震疆以戎索而卡倫以外闢地數千里所謂  
無形之金湯也臣秋濤謹詳稽其事以志

聖世幅員之廣迥超前代云

征烏梁海述略

烏梁海卽明時兀良哈部族在蒙古諸部之北

而役屬於蒙古諸部大抵蒙古事游牧非平原  
曠野弗便也烏梁海事採捕非深山密林弗便  
也瀚海以外迤南近內扎薩克多平原曠野喀  
爾喀蒙古居之迤北近俄羅斯多深山密林烏  
梁海居之以故烏梁海種人與俄羅斯尤爲密  
邇有我

朝所屬之烏梁海歲以五貂貢於我

朝有俄羅斯所屬之烏梁海歲以五貂貢於俄羅  
斯其附近邊境者又有彼此各取一貂之烏梁

海至雍正五年始議停止然俄羅斯仍私征一  
貂如故我

朝亦姑置勿問也又尼布楚城本我茂明安蒙古  
舊地其樹林中亦多烏梁海種人康熙二十八年  
議界割屬俄羅斯然此皆未嘗征所征者乃  
屬準噶爾之烏梁海也先是扎薩克圖汗部人  
根敦者世居和託輝特其地爲喀爾喀極邊西  
近厄魯特北近俄羅斯俗喜鬪烏梁海復錯處  
其間捕貂射獵依木而居納賦於和託輝特有

事則藉之爲兵故和託輝特雖隸扎薩克圖汗  
實自爲一部康熙二十五年尙書阿喇尼莅監  
承

制授根敦扎薩克使領其衆四十四年根敦卒以其嗣  
子博貝襲扎薩克輔國公四十八年

諭曰博貝與厄魯特接壤防守不可不嚴念伊力孤必  
得族中兄弟助之方克有濟納瑪琳藏布本和託輝  
特人著授扎薩克一等台吉與博貝同居尋

賜牧塔斯郭勒克木克木齊克地厥後遷烏梁海人於

此因號克木克木齊克烏梁海云五十四年

上以準噶爾策妄阿喇布坦扇眾喀爾喀

命散秩大臣祁里德率大軍赴推河偵禦扎薩克博貝  
從往博貝因言準噶爾不靖恃烏梁海障之乞  
往招若抗卽以兵取扎薩克合吉濟納彌達阿  
哩雅及根敦羅卜藏兵俱習戰請與同往

上聽其議從之此征唐努山烏梁海之始九月烏梁海  
頭目和羅爾邁率屬降先是和羅爾邁居吹河  
嘗以越界射獵爲博貝縛獻

上宥其罪

諭還巢至是將遣子瑚洛虎納請降博貝至因遷其游牧赴特斯冬和羅爾邁遁博貝追至喀爾罕什巴爾執之還五十九年八月大軍自阿爾台分路進勦準噶爾博貝偕朋素克喇布坦隨征西將軍祁里德由布魯勒進勦至鏗格爾河偵宰桑色布騰率眾據山守大軍分擊之降其屬二千餘並擒烏梁海逃眾四百封多羅貝勒藉準噶爾降眾賜之六十年調車臣汗兵防護烏梁

海降衆於巴顏車爾克雍正元年有厄魯特羅  
卜藏錫喇布耆烏梁海人初隸厄魯特和託輝  
特貝勒博貝擒降之置汗阿林後徙置察哈爾  
授佐領偕藍翎侍衛春丕勒轄其屬至是攜衆  
叛逃土謝圖汗部扎薩克車木楚克納木扎勒  
偕同部扎薩克車布登車臣汗部貝勒旺扎勒  
偕同部輔國公車稜旺布扎薩克色稜達什等  
追擒之射斃賊衆阿玉什額博壘等

上嘉悅敘功晉封車木楚克納木扎勒爲多羅貝勒以



車布登父原爵貝子晉封多羅貝勒封旺扎勒  
多羅郡王尋授副盟長二年正月貝勒博貝來  
朝

諭廷臣曰朕詢貝勒博貝管轄烏梁海何以資生據奏  
在將軍祁里德處借餉一萬八千餘兩買牲分給各  
得產業今勝於昔所借項伊自以貝勒俸逐年扣抵  
朕思博貝宣力戎行勲績卓著且烏梁海均朕百姓  
豈有朕之百姓而借餉於朕之理所借銀兩著不必  
扣還諭祁里德知之三年和羅爾邁復遁由阿哩克

竄準噶爾界博貝遣次子額琳沁由托濟邀擒  
而自赴克木克木齊克緝叛黨誅之四年正月  
博貝偕策凌奉

命勘阿爾台形勝初厄魯特與喀爾喀未構兵時錯處  
科布多烏蘭固木地噶爾丹旣滅喀爾喀西境  
直抵阿爾台故自唐努山陰之克木克木齊克  
至博木等處皆博貝及來歸之厄魯特貝子策  
稜旺布所屬烏梁海游牧其地至是策妄阿喇  
布坦奏克木克木齊克舊隸準噶爾乞還

上弗許慮伺間掠烏梁海

詔博貝率所部兵千隨前鋒統領定壽駐唐努山陽特  
斯地防護之尋

諭理藩院曰朕詳思克木克木齊克烏梁海皆博貝等  
所屬和羅爾邁旣已就擒交博貝撫恤居之公所但  
念此等人向在喀爾喀邊外林木中射獵爲生與準  
噶爾所屬烏梁海接壤又與俄羅斯連界宜令博貝  
等同大臣前往曉諭令自爲豫備以防不虞著傳諭  
博貝知之五年博貝率子額琳沁追擒烏梁海逃人

和羅爾邁於托濟降其眾雍正八年博貝卒康熙年間征烏梁海之議發自博貝厥後撫輯降眾殫竭心力而唐努山北之烏梁海遂入版圖皆博貝功也乾隆七年

賜扎薩克圖汗部一等台吉額琳沁公品級

命轄烏梁海降眾十四年烏梁海降人巴黨遁有烏勒

木濟者馳告旺布多爾濟追至貢贊伯勒齊爾盡擒還理藩院議雖擒獲究因疏懈所致停敘

功

上以旺布多爾濟聞信疾追奮勇可嘉仍

賜幣旺布多爾濟額琳沁子也尋授二等合吉十六年

三月博貝之孫青滾咱卜坐縱屬私與準噶爾

互市罪削爵

諭曰青滾咱卜縱所屬人私出汛界與準噶爾回眾貿易以致潛居烏梁海甚屬疏懈且於特諭擒解之喇嘛札木闡尙未解到怯懦推諉深負朕恩著革副將軍及扎薩克貝勒爵朕觀額琳沁人材出眾著襲扎薩克多羅貝勒但念青滾咱卜係博貝長孫一旦全

削朕心殊爲不忍著卽以額琳沁所遺公品級扎薩克台吉職令其調補

詔額琳沁議定烏梁海出入汎界例並飭禁所部越境與準噶爾及回衆私市十八年扎薩克圖汗部二等台吉達什朋素克隨北路軍營參贊大臣薩拉爾擒私入科布多汎之烏梁海人札木闡等薩拉爾者厄魯特人初爲準噶爾宰桑乾隆十五年準噶爾內亂薩拉爾率四十七戶投誠授散秩大臣至是立功

高宗嘉獎之授內大臣尋

命薩拉爾收烏梁海及札哈沁衆此征阿爾泰烏梁海  
之始是年杜爾伯特部三車凌來歸十九年二  
月烏梁海人博羅特瑚圖克等擅入汎界土謝  
圖汗部扎薩克輔國公巴木丕勒多爾濟次子  
車登三丕勒隨參贊大臣薩拉爾擒之有

詔獎諭薩拉爾遂由崆格進屯卓克索招撫烏梁海青  
滾咱卜額琳沁等並率兵從旋追擒馮木特黨  
札木闡等額琳沁尤奮勵薩拉爾以聞

詔封輔國公二月

諭成袞扎布日前因軍營無事額駙策麥年老就近以  
塔密爾作爲軍營今有辦理烏梁海之事軍營應移  
駐烏里雅蘇台以塔密爾作爲內地尋與尙書舒赫

德議防秋

詔來京面授方略三月以收撫烏梁海

詔桑齋多爾濟署所部副將軍偕車布登率諸部兵親  
隨成袞扎布駐防鄂爾海喀喇烏蘇尋偕參贊

大臣安崇阿德甯等移駐庫克嶺九月青滾咱



卜及土謝圖汗部扎薩克台吉三都布多爾濟  
各以兵千隨參贊大臣努三等赴阿勒和碩偵  
烏梁海宰桑赤倫遁吹河乃率兵由喀喇莽柰  
直抵所居降其衆四百四十五戶徙所屬台吉  
班札喇克察於特斯傳袞安置之薩拉爾又率  
額琳沁車布登札布貢格敦丹車木楚克札布  
等勦撫烏梁海宰桑達克車根等於察罕烏蘇  
尋復擊宰桑禡木特及通禡木特降之十一月  
敘功晉封青滾咱卜郡王品級復授所部副將

軍二十年正月烏梁海降臣察達克招包沁種人來歸並察獲杜爾伯特所屬以獻

詔給所部敘功授察達克內大臣七月固爾班和卓等賊眾千餘戶潛通烏梁海誘同逃大軍猝與遇分路掩擊盡誅之先是班第之勦達瓦齊於伊犁也道出阿爾台以烏梁海潛附準噶爾遣車布登沿途勦捕至固爾班鼐塔克及烏蘭布拉克喀喇哈巴地遇烏梁海副都統察達克屬得木齊綽罕宰桑圖布慎屬得木齊喀喇曼濟等

衆盡降之並獲叛賊巴朗從賊二百餘戶師旋  
車布登偕副都統敦多卜率兵三百由薩噶勒  
巴什嶺往收汗烏梁海汗卽烏梁海所居地也  
宰桑郭爾卓輝鄂木布及布魯古特宰桑根都  
什特楞古特宰桑瓜齊楞皆率衆降青滾咱卜  
又招降宰桑齊巴漢等自是烏梁海地略定編  
新降旗分補授總管以青滾咱卜習烏梁海情  
命總轄之先是巴朗叛逃青滾咱卜追至和通鄂博率  
兵還言巴朗由西路額琳哈畢爾噶遁故追不

及至是巴朗就擒青滾咱卜言盡妄

諭責之尋烏梁海逸賊戕守汛侍衛貝多爾時齊巴克  
札布率兵駐防奇爾吉斯諾爾卽偕根敦往捕  
至察罕烏蘇遇青滾咱卜自伊犁歸與合兵赴  
巴斯庫斯收撫烏梁海時舊屬準噶爾之烏梁  
海散居汗哈屯等處青滾咱卜宣揚

上命於是各宰桑曰哈爾瑪什曰瑪濟岱曰納木札勒  
曰保袞曰莽噶拉克曰納穆克布曰珠庫鄂木  
等相繼降敘功車布登封多羅貝勒齊巴克札

布公品級九月

諭青滾咱卜率烏梁海兵隨參贊大臣哈達哈勦阿逆  
方大軍之勦達瓦齊也青滾咱卜與阿逆同隊  
交甚暱定北將軍班第與參贊大臣薩拉爾密  
奏阿睦爾撒納逆狀青滾咱卜微聞之私以相  
告阿逆既叛青滾咱卜潛遣烏梁海人諾爾布  
丹津赴阿逆所至是事發

諭哈達哈擒解來京未幾

上追念其招撫烏梁海功

宥弗究會烏梁海賊郭勒卓輝博博等譌傳阿逆煽哈薩克阿布賚汗入寇仍

命青滾咱卜以參贊大臣隨哈達哈進勦二十一年三月以阿睦爾撒納煽烏梁海梗哈薩克道

詔札哈沁公札木禪從哈達哈勦烏梁海叛賊有固爾班和卓者奇爾吉斯宰桑也攜千餘戶潛赴烏梁海車布登札布及車登三丕勒等邀擒之因進兵哈薩克界五月達爾齊雅及納木扎勒齊蘇隴等由海喇蘭伯勒齊爾旺勦烏梁海之倡

亂者追至庫楚克及哈達什伯根斬獲甚衆大  
軍抵烏梁海青滾咱卜私攜所部兵還牧搆逆  
且遣人赴烏里雅蘇台軍煽衆喀爾喀令散歸  
輝特逆賊普爾普德濟特等由固都爾格叛逃  
齊巴克札布追擒之復隨參贊大臣納穆札爾  
捕烏梁海逃衆至阿固特賊逸尾擊之歿於陣

事聞

諭曰齊巴克札布歿於行陣深堪嘉憫著追封輔國公  
賜銀三百兩治喪視一品大臣例賜祭葬入祀昭忠祠

其子巴圖濟爾噶勒襲爵並授扎薩克

詔貢楚克札布由翁吉達什和碩解內扎薩克馬納烏  
里雅蘇台自青滾咱卜屢干重譴

上不忍置之法

恩宥者三至是叛蹟顯著不可復遣

諭廷臣曰青滾咱卜受朕恩最深去歲將軍大臣參奏  
阿逆伊敢私自漏洩百計趨承以致阿逆趾高氣揚  
肆行無忌後於追緝之時觀望退縮妄言必得兩路  
出師五萬方可追擒種種乖謬指不勝屈前此屢欲



擒治念伊祖博貝夙著勤勞施恩寬宥今無故自軍  
營擅歸又揚言額琳沁多爾濟達木巴扎布等治罪  
之後衆心疑懼而喀爾喀數年以來皆以用兵爲累  
以其怨望之私託爲他人之說妄行瀆奏藐法已極  
斷難姑容必當明正典刑以示懲戒著傳諭舒明阿  
蘭泰如已歸游牧可諭哈達哈等旋師往勦如至舒  
明所駐地方卽降旨擒解青滾咱卜之叛造僞符撤  
汛兵衆扎薩克多爲所惑延丕勒多爾濟子旺  
沁多爾濟等並棄汛歸牧土謝圖汗部貝勒達

什丕勒亦慮所屬游牧被掠由烏里雅蘇台軍營私歸尋覺其詐督兵護台汎獨桑齊多爾濟飭所屬安伍察獲台吉阿雅喇所匿偽符扎薩克圖汗部台吉遜篤布與車臣汗部扎薩克台吉成衮扎布亦察其詐安堵如故初遜篤布等以檄由德沁札布所至疑與青滾咱卜通以聞諭曰僞檄流傳或係他人假冒德沁札布之名亦未可定著加恩免究飭令速歸舊汎接理驛務毋自貽誤遜篤布督兵嚴守各汎誓以死拒事聞

諭曰喀爾喀王公等爲青滾咱卜所煽多擅離職守遜  
篤布等特一扎薩克台吉耳獨明大義不冑附逆誓  
死效力朕甚嘉之

賜公品級以示獎勵

詔獎桑齋多爾濟之能授北路參贊大臣

命往諭烏梁海總管赤倫協擒青滾咱卜時汗哈屯烏

梁海衆附青滾咱卜叛

詔杜爾伯特汗車凌率兵從勦自諸扎薩克棄汛後驛

路中梗軍書旁午不得達經過官吏輒遇害車

木楚克札布督兵續遞文報同部三等台吉噶  
瓦供給牲畜爲之護送且多捐馬助驛用諸汎  
之路始通

詔晉封車木楚克札布多羅貝勒

賜噶瓦公品級

諭達什丕勒曰昨聞達什丕勒私歸游牧朕卽料其不  
過爲浮言所惑今果知悔悟率兵接遞驛務前咎不  
足深責仍加恩晉封郡王品級但驛站旣係新設非  
加意巡察恐有遲誤著達什丕勒會同總管達松阿

等悉心辦理七月宣

諭喀爾喀王公等曰青滾咱卜係獲罪斥革之人復加  
恩令襲貝勒並授副將軍去歲從征伊犁封授郡王  
稍有人心自當圖報孰意深負朕恩實出情理之外  
此次辦理烏梁海授爲參贊予以自新之路伊至烏  
梁海並未擒獲鄂木布郭勒卓輝等卽撤兵還雖自  
有哈達哈率兵往勦伊卽退還無關輕重但旣爲參  
贊並不奏請諭旨亦未咨報將軍率兵擅還律以軍  
法罪不容誅且妄造浮言煽惑衆聽其心實不可問

試思辦理準噶爾一事原爲喀爾喀經理長久之計  
命將興師以期一勞永逸然選派爾部官兵俱經賞  
給錢糧米石購辦牲畜何次不給價值而伊乃以連  
年用兵爲累是誠何心至軍營賞罰乃國家憲典所  
必行達木巴札布係管理杜爾伯特游牧之人縱令  
巴朗遁走諱匿不報額琳沁多爾濟監視阿逆來京  
明知叛蹟已著袖手旁觀致令兔脫二人情罪斷無  
可逭然猶不忍加以顯戮令其自裁此而曲爲寬貸  
國法何在伊乃謂成吉思汗裔向不治罪此語舛謬

更甚如朕宗室中有犯刑章者朕又何嘗廢法耶至於稍知奮勉如巴雅爾什第桑齋多爾濟及車布登札布等則優封顯秩賜賚便蕃伊寧不聞之耶本應除其屬衆削其封爵朕始終眷念舊勲不忍遽令澌滅所有貝勒爵仍著施恩以額琳沁子輔國公旺布多爾濟承襲先是衆喀爾喀爲青滾咱卜所煽棄汛私歸或乘間肆劫青滾咱卜又分遣其黨誘厄魯特貝子朋素克公丹拜及烏梁海總管赤倫察達克等與同叛及聞

聖諭無不悔悟乞罪七月

詔旺布多爾濟就近擒獻青滾咱卜

諭曰逆賊青滾咱卜背恩叛逆所襲之爵自不應復令承襲但念此爵本係博貝所襲且效力有年不忍遽削著加恩卽令旺布多爾濟晉襲青滾咱卜所屬盡轄之會哲布尊丹巴呼圖克圖以青滾咱卜悔罪乞

### 宥具奏

詔弗許青滾咱卜窘懼爲擁兵自衛計脅所屬曰伊克和託輝特曰巴罕和託輝特曰明噶特曰哈柳



沁曰托斯曰奢集努特六鄂拓克及烏梁海十  
六鄂拓克附已大兵至皆棄去青滾咱卜攜孛  
由托濟走斯吉特謀遁俄羅斯

諭旺布多爾濟爾必無與逆賊同謀之事朕可深信昨  
據貝勒車布登札布屬人告稱逆賊令遷爾游牧爾  
雖聽從並非有心附之今大兵已抵和託輝特爾若  
能擒獻朕必加重賞否卽率屬速赴軍營旣可永受  
朕恩且不墮爾祖博貝舊勲况青滾咱卜屬人不過  
脅從若棄之來歸概免治罪爾其熟思審慮善自爲

計毋貽後悔十一月成袞扎布遣參贊大臣納穆札爾輕騎往追青滾咱卜旺布多爾濟亦率兵從至杭哈將噶斯擒青滾咱卜及其子曰車蘇隆多爾濟曰齊旺札布巴里械送京師賊平解德沁札布參贊大臣職十二月

諭曰親王成袞扎布奉命討罪實心效力迅奏膚功朕甚嘉之著賞杏黃帶封伊第四子占楚布多爾濟爲世子以獎忠勤成袞扎布奏和託輝特屬六鄂拓克並烏梁海十六鄂拓克聞大兵至卽解尙知感

戴和託輝特輔國公旺布多爾濟係貝勒博貝  
嫡嗣輔國公多爾濟車登台吉達什朋素克係  
博貝從子皆未附逆請令轄青滾咱卜屬至車  
登札布助逆時台吉諾爾布曾經諫沮弗聽乃  
率衆台吉馳赴烏里雅蘇台軍汛訴世受

國恩誓不從賊因率屬由博羅哈卜齊爾赴察罕  
托輝游牧供應駝馬亦極奮勉請授扎薩克令  
轄車登札布屬庶伊等不致離析各扎薩克知  
感自必嚴加鈐束

詔獎協機宜如議行二十二年正月青滾咱卜伏誅

特旨宥其幼子巴里八月車木楚克札布偕唐喀祿奏

言杜爾伯特貝勒巴圖博羅特公舍稜台吉阿喇善等通阿逆走額爾齊斯不從其汗車凌徙牧臣等偵得狀偕副都統瑚爾起馳赴輝巴郎山後擒巴圖博羅特並勦烏梁海賊五十戶乃旋兵赴塔爾巴噶台緝哈薩克錫喇

諭嘉其能和衷且協機宜以

御用佩飾賜之飭敘加級九月

諭車木楚克札布偕車布登札布招降烏梁海宰桑博  
和勒納木札勒等車布登札布奏請遣烏梁海  
內大臣察達克往招之並由布延圖軍選兵策  
應

上韙其議於是察達克率兵四百往招車木楚克札布  
檄布延圖兵百繼進盡降之有特勒伯克札爾  
納克者阿勒坦諾爾之烏梁海宰桑也聞之亦  
攜屬至

詔車木楚克札布定賁賞例宣示

德意此阿爾泰諾爾烏梁海歸附之始十二月

諭曰車木楚克札布數年宣力戎行勤勞懋著近復招  
降烏梁海善爲撫納著晉封多羅郡王二十二年先  
是杜爾伯特及烏梁海未內屬錯牧額爾齊斯  
後杜爾伯特諸台吉游牧札克拜達里克初徙  
牧額克阿喇勒再徙額爾齊斯烏梁海就撫以  
烏蘭固木地給之車凌等復請由額爾齊斯往  
徙遣都統納穆札爾往勘杜爾伯特及烏梁海  
牧界車凌復請以烏蘭固木爲屯耕地而游牧

於科布多額克阿喇勒

允之

詔嚴禁所屬勿攘竊尋以錯牧不便定烏蘭固木爲杜爾伯特牧別以科布多爲烏梁海牧車凌謀噶特烏梁海衆叛竄哈喇哈爾榜復遣兵勦之詔酌賞從軍弁兵免追從征達瓦齊所給駝馬有察衮者車凌婿也附阿逆叛聞追軍至竄和落霍斯河爲達什所擒獻論誅宥其妻給車凌準噶爾竄黨有額爾克勝者準噶爾二十四鄂拓克之

一也既降尋叛謀竄俄羅斯有不從者二人中道脫歸至車凌所以告車凌以其一械送科布多軍以一給輝特扎薩克袞布爲導令率兵六十往勦袞布馳踰阿爾台遇賊於杭愛海圖擒斬其男俘妻女歸無脫者

獎賜茶幣二十三年春車木楚克札布奏偕察達克勘烏梁海戶口其得秦有十餘戶二十餘戶不等分置得木齊及收楞額等員請並戶少者約四十戶編得秦一



上知其悉烏梁海情

詔如所請四月烏梁海總管阿拉善攜戶百餘叛逃車  
木楚克札布率扎薩克圖部公多岳特追捕有  
車根者亦烏梁海總管也縛獻阿拉善收其衆  
又有烏梁海人恩克叛逃

命成衮扎布調諸部兵悉擒其屬衆並  
賜銀幣尋

諭扎薩克圖部公多爾濟車登偕參贊大臣福祿緝烏  
梁海劫賊布爾古特布格等擒之並蒙

獎賚時烏梁海賊阿木古朗等劫馬扎薩克圖部扎薩克達什朋素克護所屬福祿劾之

詔削扎薩克留軍效力尋隨福保追擒阿木古朗等寘於法

詔宥前罪仍授扎薩克恩克等之叛竄也其屬已就擒惟恩克未獲九月車木楚克札布諜恩克竄哈屯河疏請暫歸阿勒和碩屯駐冬雪後賊必就擒

許之十二月車木楚克札布果擒恩克

賚幣是年烏梁海種人明噶特叛定邊左副將軍成衮  
扎布檄杜爾伯特扎薩克輔國公巴圖蒙克追  
勦之明噶特舊爲厄魯特屬以大軍定伊犁乞  
降

詔置之黑龍江之呼倫貝爾旣而由納林喀喇泥叛遁  
巴圖蒙克追之遇諸烏蘭固木河環以兵不卽  
降中夜圍稍懈賊乘間逸成衮扎布劾之

上以杜爾伯特部新附且聞檄卽以兵往

詔免劻責仍量加賞賚二十四年七月車都布多爾濟

隨杜爾伯特郡王車凌烏巴什等追勦烏梁海  
宰桑庫克辛盡降其衆

詔嘉之

命乾清門行走先是烏梁海人郭木薩以擅殺懼罪遁  
俄羅斯車都布多爾濟追至和寧嶺縛之獻至  
是並

賚幣示獎八月

詔賽音諾顏親王成衮扎布安置新撫烏梁海衆是時  
烏梁海以科布多產貂無多生計艱難請徙就

阿爾台山陽額爾齊斯之源採捕

上諭車凌烏巴什等曰額爾齊斯爲爾舊牧今爾移處  
烏蘭固木烏梁海察達克請游牧額爾齊斯地向會  
降旨爾等若願歸舊牧聽爾便今哈薩克已全部內  
附伊犁厄魯特賊衆復殲無子遺若爾果願歸舊牧  
可卽徙往額爾齊斯所遺烏蘭固木自可給烏梁海  
處之但哈薩克新附非爾等久爲內屬者比務宜嚴  
飭所屬安靜無事若爾部衆旣遵鈐束而哈薩克反  
來肆擾可卽擒誅之爾等或安土重遷則額爾齊斯

地與其爲哈薩克俄羅斯所竊據不若令烏梁海往徙之也車凌烏巴什等奏察達克所請地係烏梁海舊牧距臣等牧遠且烏蘭固木地饒水草臣等游牧人請勿徙以額爾齊斯地給烏梁海

詔如所請十二月哈薩克襲烏梁海杜爾伯特以兵三百餘擊走之得

旨獎賚二十五年烏梁海爲哈薩克部人巴圖克巴圖爾所掠賚因諾顏部公額爾克沙喇獲被掠者詰之告以烏梁海游牧遠以故被掠且哈薩克

汗阿布賚遣使至欲擒獻巴圖克巴圖爾

諭曰額爾克沙喇久駐哈薩克界可撤兵還卽以朕旨  
宣諭曰劫掠烏梁海係巴圖克巴圖爾一人所爲與  
其部長無涉使彼知之尋車布登札布偕車木楚克  
札布擒獲巴圖克巴圖爾二十六年三月賽因  
諾顏親王成袞扎布奏喀爾喀汎舊設阿爾台  
今準夷回部底定向時成區俱成內地請展札  
哈沁烏梁海喀爾喀等汎資耕牧奉

詔會勘二十八年奏柰曼明安至度濟察罕布爾噶蘇

所設汎宜展至烏嚕木齊烏梁海內大臣察達  
克等勘巴顏珠爾克至烏拉克沁伯勒齊爾及  
烏嚕木齊可設汎十五俱相隔百里爲率軍機  
大臣遵

旨議奈曼安舊汎應遠徙但千里長途喀爾喀難遙  
制應將附近烏嚕木齊之烏爾圖布拉克賽塔  
喇納里特濟木薩四汎令索倫綠旗兵駐防其  
蘇伯昂阿至烏拉克沁伯勒齊爾十一汎令成  
衮扎布督理



詔依議既而成袞扎布來朝以督理烏梁海與哈薩克  
互市協夷情

諭獎之是年烏梁海叛賊庫克辛走俄羅斯道掠哈薩  
克馬土爾扈特親王車凌烏巴什率兵緝之偵  
匿和羅圖郭爾馳往擊賊潰竄尾至林際獲之  
斬庫克辛及從黨五十八人俘其孥及戶七十  
餘歸

詔賜幣並酌賞弁兵是後烏梁海感沐

聖化永遠綏謐迄今種人之著名者有三曰唐努山烏

梁海凡四十五佐領曰阿爾泰烏梁海凡七旗  
曰阿爾泰諾爾烏梁海凡二旗分隸於烏里雅  
蘇台之定邊左副將軍及科布多之參贊大臣  
以地在卡倫之外密邇俄羅斯禁止商民前往  
貿易惟赴各城納貂之便許與民市仍禁賒借  
云

朔方備乘卷五

舉人王樹枬初校  
知縣吳壽坤覆校

朔方備乘卷第六

聖武述略六

哈薩克內屬述略敘

臣秋濤謹案西北之國與俄羅斯爲鄰者曰哈薩克本回部之俗恃畜牧爲生東接塔爾巴哈台南接伊犁二城之境賴哈薩克爲屏蔽其分部大者有三曰左曰右曰北左右二部最近新疆右部之西卽俄羅斯始起地也阿睦爾撒納之叛遁也實與左部相犄角及

天戈進討摧朽拉枯左部旣稽首稱臣右部亦舉  
國內附於是膺王公台吉之爵歲時朝覲納租  
賦悉與內地各蒙古相等自古康居大宛之地  
未有服屬中國若此者也至北哈薩克一部距  
中國最遠雖未受職納賦然其部當俄羅斯東  
俄南俄之中路通莫斯科窪僅三千里程實爲  
俄羅斯腹心大患故常宿重兵以防之然則講  
北徼邊防者詎可以蘇對小國忽不加察哉敬

考

高宗純皇帝神武戡定之烈綴以地形山川爲哈薩克  
內屬述略一卷庶邊事有可稽云

哈薩克內屬述略

左部哈薩克東南與準噶爾接西與右部接北  
與俄羅斯接其常所會廷曰葉什勒傍葉什勒  
河東去塔爾巴噶台南去伊犁皆千里東南去  
鎮西府四千五百餘里其部曰鄂圖爾玉茲無  
城郭逐水草事遊牧冬夏別居無常處地廣人  
稠甲於他部境西北隅有獨樹一株其上五枝

盤拏蔭廣可容二百騎名鄂喀引噶克义莫朵  
爲西域神物風俗物產大略與準噶爾等文字  
同言語稍異其君曰汗其汗族而爲首領者名  
蘇爾統相傳其地爲古大宛今詳考之蓋古康  
居國也其汗阿布賚初乘遠瓦齊亂數侵擾準  
噶爾乾隆二十年二月準噶爾平

詔遣使往諭阿布賚言於使臣侍衛順德訥達永阿曰  
向聞

大皇帝臨御中土以山川之故貢譯未通今

天威遠播掃伊犁興黃教俾與準夷俱慶昇平實無疆  
之福敢以誠心歸於

德化九月順德訥等以其使博洛布拜等歸伊犁阿睦  
爾撒納適以伊犁叛明年走哈薩克阿布賚納  
之

詔遣將軍達爾黨阿由西路哈達哈由北路先後以大  
軍進阿睦爾撒納之走哈薩克也有奈曼鄂拓  
克納拉巴圖者邀劫之不獲勦其眾阿睦爾撒  
納以三騎走附阿布賚其屬欲擒獻阿布賚不



可乃遣和集博爾根以兵從阿睦爾撒納走努  
拉自率千騎西行會於蒿哈薩拉克鄂拉下以  
待我師七月將軍達爾黨阿兵至於雅爾拉與  
和集博爾根前隊二千餘兵遇賊設伏佯敗我  
師登於山俯其陰則伏在焉蜂屯蟻聚隨以號  
火乃堅壁壘繕營伍賊不敢出越宿遣烏爾登  
以輕騎致師分阿里衮鄂實哈甯阿明瑞爲左  
右翼將軍達爾黨阿副將軍扎拉豐阿執纛以  
中軍進齊努渾瑪瑞特通額額爾登分部從之

賊倉猝不及顧潰於山麓斬首五百七十餘級  
餘敗去我兵乘勝進努拉擒楚魯克是時和集  
博爾根方與阿睦爾撒納引二千騎西行我軍  
逼之列而陣出入鏖戰良久獲其纛及礮賊乃  
亂斬三百四十餘級阿睦爾撒納易纛褫衣冠  
而遁初順德訥歸自哈薩克以阿布賚恭順狀  
聞復遣齋

勅往諭七月至博爾喀爾綽闊爲哈薩克兵所阻不得  
達至將軍哈達哈營乃遣扎薩克三都布等擊

三ノ布手 名ノ  
敗阿布賚兵於蒿哈薩拉克鄂拉下斬首百餘  
級奪其馬匹輜重無算阿布賚遁師從之復斬  
首百餘獲馬二百鎗械百餘獲昭華什由是三  
戰皆捷師至於伊什勒於是達爾黨阿哈達哈  
兩軍合楚魯克昭華什既獲而見將軍極陳阿  
布賚之欲內附也將軍縱之俾往諭曰

大皇帝命將討叛爾從賊則死若能擒以來臣僕無二  
於是阿布賚亦稔知爲阿睦爾撒納所賣將擒  
賊以求臣於我其謀泄阿睦爾撒納乃竊哈薩

克馬十餘騎逃歸準噶爾二十二年將軍兆惠  
參贊大臣富德等復將兵西征阿睦爾撒納再  
走哈薩克六月阿布賚以兵三萬賙擒阿睦爾  
撒納遣其弟阿布勒比斯爲前隊與我兵遇奉  
將軍馬一參贊馬一陳情請罪願受約束於是  
兆惠等復遣使往諭阿布賚乃遣亨集噶爾等  
奉良馬四表請內附其文曰自臣祖額什木汗  
楊吉爾汗以來從未得通中國聲教今祇奉

大皇帝諭旨加恩邊末部落臣暨臣屬靡不懼忭感慕

皇仁臣阿布賚願率哈薩克全部歸於鴻化永爲中國

臣僕奏入

詔受之秋阿布賚使臣至

避暑山莊朝謁

賜宴萬樹園觀燈火阿布賚旣臣於我遂以其兵助擒  
賊與順德訥遇於途而言曰我哈薩克以阿睦  
爾撒納之故獲罪

天朝仰荷

大皇帝鴻慈不棄覆載爲臣爲僕願悉力擒賊庶贖前

罪毋有二心阿睦爾撒納敢外幟幪是不祥人  
也是有天道其何能活乃以托忒烏珠克字印  
文導我師巡行諸部是月阿布賚將以計擒阿  
睦爾撒納於阿爾察圖不獲奔俄羅斯執其從  
賊額布濟齊巴罕來獻先是二十一年努拉之  
役和集博爾根以殘兵遁至是聞阿布賚降乃  
與喀拉巴拉特者親率其屬三萬戶款於軍門  
曰外臣不識文字謹以身詣降將軍兆惠爲啟  
帳命東向坐將軍南向坐列筵食之牲體哈薩

克俗必持咒破戒始食於是乃言爲

大皇帝臣豈敢稱禁因共飽啖畢引觀馬射懸鎖子甲  
射之徹其裏益大駭服約助擒賊叩首去左部  
咸服二十三年五月哈薩克拜濟格特部落之  
拜布拉克巴圖魯等獲布庫查罕六月哈薩克  
哈爾津等獲厄魯特和碩齊皆獻於軍械送

京師二十四年阿布賚復遣其兒子俄羅斯蘇爾  
統及其頭目伯克訥等來朝

賜宴

高宗較射於

御園得與觀焉二十五年復遣使來朝宴之

命觀圍獵

賜勅諭俾約束所部毋越境游牧二十六年正月

賜勅諭寬所屬巴圖克巴圖爾侵掠烏梁海罪六月伴

送使臣入

覲回程定派

乾清門侍衛禁哈薩克於烏里雅蘇台市易二十

七年二月哈薩克阿布勒瑪木比特等遣使來



朝值

聖駕南巡

覲於揚州

行在

賜冠服所屬哈喇圖魯什送歸厄魯特人口賞賚有加  
參贊大臣阿桂收取越界游牧之哈薩克等

諭寬其罪而還之五月弛烏里雅蘇台市易之禁仍禁  
私市七月阿布賚遣使來朝

命隨觀木蘭園

賜冠服以陪臣烏默爾爲

乾清門侍衛令暫歸挈眷移居伊犁二十九年二月  
月阿布勒瑪木比特遣使來朝

賜冠服三十四年正月阿布勒比斯遣子卓爾齊來朝

三月阿布賚遣子幹里蘇爾統來朝三十八年

正月哈薩克波羅特繼其父阿布勒瑪木比特

爲汗遣使來朝阿布賚子卓爾齊亦來朝四十

一年正月阿布賚遣使來朝俱宴賚如例哈薩

克建廷葉什勒居客斯騰城其地北極高四十

六度二十分至四十八度距京師偏西三十二度至三十七度當準噶爾北全境東西千里南北六百里四山環繞山脉亦自西而東其南境之山曰喀拉巴克喀爾海山又東爲喀爾克圖哈薩拉克山又東爲札拉圖哈薩拉克山又東爲勒克楞山踰山而南入準噶爾境齋爾界又東爲鄂綽沁吉斯山又東爲阿爾津沙拉什保台山又東北爲阿爾輝西里入準噶爾境額米爾界自喀拉巴克喀爾海山西北行折而東爲

厄勒伊們山葉什勒河源出焉又北爲尼雅克  
圖山又東爲尼滿哈濟蘭山又東北爲喀爾瑪  
奇爾哈山又東爲阿克奇拉山又東爲巴顏山  
又東爲蒿哈薩拉克山卽將軍哈達哈敗阿布  
賚處又東南爲阿巴拉爾山又東至塔爾巴噶  
台而止羣山內外源泉經絡其最著者爲綽多  
爾圖河出喀拉巴克喀爾海山東爲克巴什博  
爾濟爾河又東爲哈薩拉克布拉克又東爲博  
爾喀得克布拉克又東爲額特倫布拉克又東

北爲什納噶布拉克沮洳渙散燦若列星又東  
爲奎蘇布拉克又東爲阿爾齊圖布拉克又東  
爲青吉斯布拉克又北爲阿林布拉克又東爲  
阿濟蘇布拉克又東爲烏爾圖布拉克又東北  
爲色爾格河又東爲罕拉海圖布拉克又東爲  
三察爾河又東爲楚庫魯克河又東南踰山入  
塔爾巴噶台界其在右哈薩克西北境者爲葉  
什勒河沿河西北行二百里爲哈薩克春吉索  
波藍地苦寒其汗盛夏常居此自是以西地益

曠渺左部境內岡阜層沓折而西北行二千里  
爲伊底克山當塔拉斯河東南境入右部右部  
哈薩克東去左部二千里北至俄羅斯界西南  
至塔什罕其部曰烏拉克玉茲汗曰阿比里斯  
其巴圖爾有三曰吐里拜曰輝格爾德曰薩薩  
克拜阿比里斯駐塔什罕城不事事受成而已  
惟吐里拜實專其政其俗大略與左部等其地  
在古康居國西境初阿布賚告於順德訥曰我  
哈薩克之有三玉茲如準噶爾之有四衛拉特

也鄂圖爾玉茲則我爲政矣他如奇齊克玉茲  
烏拉克玉茲族兄爲政當與偕來作中土臣乃  
使其弟阿布勒比斯往而參贊大臣富德方以  
兵索逆賊哈薩克錫拉至右部遣蒙固爾岱赫  
善等往撫次軍於莽格特城外是時吐里拜等  
方與塔什罕回人吐爾古戰於河上兩不相下  
蒙固爾岱赫善因諭以睦鄰守土之道並宣示  
聖主威德乃大感悟罷蠻觸之爭於是吐里拜等感

德畏

威詣軍門納款奉馬進表以降其文曰伏念臣者久思  
內附遠處邊末與左部阿布賚各長一方爲準  
噶爾阻絕末由自通近聞左部輸服被

恩優渥恭維

天使惠來祇領

宸訓得均隸臣僕誠懽誠忭謹遣臣子弟入

覲瞻仰

天顏如天覆育之

聖人在上臣願竭衰駑奮勉自効永無二心倍于左部



表聞乃受正朔列外藩焉二十三年吐里拜遣  
其子卓蘭及輝格爾德之弟博索爾滿朝

京師

賜宴盤山靜寄山莊並隨至

南苑與觀

大閱及燈火

恩賚甚渥今測其地北極高四十三度至四十五度距  
京師偏西四十五度四十八分東與左部接東南  
與伊犁西北境接南與布魯特及安集延那木

干諸部接西踰塔什罕西六百餘里北至依底  
克山接北哈薩克部界北哈薩克者以寇鈔爲  
俗時侵掠俄羅斯邊境俄羅斯設兵防之西南  
爲格根河又西南爲納穆爾河又南爲雅哈爾  
斯河又西南爲錫爾河又西爲薩哈斯河又北  
爲搭拉斯河格根河東近塔拉斯河者爲哈拉  
庫爾爲達布孫淖爾薩哈斯錫爾兩河之間岡  
巒綿亘爲穆呼札爾山爲哈拉綽克多嶺爲莽  
阿錫魯嶺爲柯格納斯嶺嶺北大澤名騰吉斯

周數百里蓋小海也海之東南崖有部名沙爾  
又東北薩哈斯河南有達拉什城噶拉楚克城  
錫爾河西北有波拉克城其東有那幹喀特城  
又南有蒿達克城由蒿達克西踰錫爾河爲塔  
什罕其城寄居右哈薩克部內而別自爲部不  
相統也

朔方備乘卷六

教諭劉淮  
知縣吳壽坤覆校

朔方備乘卷第七

考一

北徼星度考敘

臣秋濤謹案天體正圓地球之體亦渾圓周天三百六十度應大地七萬二千里是故論坤輿者必上考星度誠以憑地測天數緣理顯非如占驗禳祥之說多傳會亦非如考論分野之數有所窮也人居地而有南北則北極出地有高下而晝夜之長短因以不同是爲南北里差人

居地而有東西則見時刻有早晚偏東一度見時應遲四分偏西一度見時應早四分是爲東西里差康熙年間

欽定皇輿全圖於直省各府州縣悉測北極高度以定緯並依

京師中線考偏東偏西之度以定經迨乾隆年間平定西域

特命推步之臣乘傳前往測量經緯度數補入全圖於是新疆回部各處星度皆可按籍而稽及奉

詔修西域圖志以晷度列爲一門而龍沙蔥雪之間準  
道里之遠近憑儀器之審求俯察仰觀弗踰銖  
黍洵可永爲後世地志諸書之槩矧茲臣纂集  
北徼彙編敬考

欽定皇輿全圖自喀爾喀以北直抵北海星度經緯粲  
然具在蓋

聖德洽乎遠邇以故夷情恭順自獻圖籍以備職方之  
掌聞內府有俄羅斯圖具載經緯度數

石渠天祿之藏非外臣所得窺見謹就

皇輿圖中恭錄北徼星度悉以距

京師偏東偏西之度次其遠近以昭示掌之形徼  
拱極之義亦論邊事者所當知已

北徼星度考

聖祖仁皇帝聖訓曰東方朔記北方有層冰千尺冬夏  
不消今年俄羅斯來朝其地去北極二十度以上名  
爲冰海堅冰凝結人不能至始知東方朔所言不謬

臣秋濤謹案輿地之圖自唐以前者皆不傳於  
世宋以後之圖間有傳世者亦第有開方而無

天度雖爲準望測量之法要不足爲憑也至外  
藩各部及邊徼之外自古無能詳言其境者無  
論圖矣惟我

聖祖於地圖一事極爲留心每

命人乘傳詣各部落詳詢精繪並

命精於推步之人測驗天度經緯或有不能身履其地  
者必周諮博訪而載之既成鑄以銅版垂諸永  
久乾隆乙亥平定準噶爾各部

高宗命何國宗等率西洋人分道往各部測量星度占



候節氣補入輿圖己卯諸回部悉隸版籍復

命明安圖等前往備繪地圖一如舊制蓋

皇輿圖內備載星度實由

兩朝

大聖人創制顯庸永爲典則誠自古未有之盛舉也謹  
附志於此以昭筌篔云

聖訓曰推算天象中國與瀚海俱在赤道四十五度之  
內四十五度之南水皆向南而東流四十五度之北  
俱向北流此皆天文地理之相合者也

臣秋濤謹案俄羅斯自烏拉嶺以東訖於大拉該海凡近中國邊界發源之水在外興安嶺雪莪嶺金山以北者俱向北流入冰海蓋其緯線皆在赤道四十五度之北也

聖訓曰中國與西洋地方俱在赤道北四十度內海洋行船中國人多論更次西洋人多論度數自彼國南行八十度至大狼山始復北行入廣東界嘗六閱月在海中不見一山又自西洋至中國有陸路可通因隔鄂羅斯諸國行人不便故皆從水路而行

臣秋濤謹案歐羅巴州緯綫自赤道北三十六度起至七十一度止經綫自

京師午綫偏西四十八度起至一百二十六度止與中國壤地相連本係一州而分爲二者歐羅巴人奉天主教似欲自爲一區以示別異也

聖祖御瀛臺召見尙書庫勒納等奏對畢庫勒納請曰黑龍江日長夜短雖晚日落不至甚暗不知何故

聖祖諭之曰黑龍江極東北之地日出日入皆近東北

方所以黑龍江地方日長夜短日落亦不甚暗

臣秋濤謹案夏至日長者冬至日必短此渾天

之妙也黑龍江夏至晝六十四刻冬至晝三十  
二刻雅克薩汗山哈屯河唐努烏梁海夏至晝  
六十七刻冬至晝二十九刻此皆地方實測所  
及以九十六刻計者也以上黑龍江等處均與  
俄羅斯接界俄羅斯更在黑龍江等處之北北  
極出地愈高圖理琛云伊聶謝柏興晝長夜短  
夜亦不甚暗雖日落夜深猶可圍碁不數刻東

方已曙正與唐書骨利幹國之北晝長夜短之說相合觀於黑龍江而餘處可以類推矣

黑龍江外紀曰土人言黑龍江地處極高去天較近故夜深不甚暗壹似日在地中返照者出關東行漸遠益高所過岡阜旣上輒平坦有軌途法庫門又東岡起愈平無俯瞰低下勢土人謂之上天邊子可以驗地形矣地高則天愈近測量家惟依北極高度爲準日月出輪較大色亦深赤夜見斗杓橫屋角星點亦大手若可捫

四時之氣多風四月猶霏雪霰夏日偶暄或南風作必雨不雨則江漲蓋興安嶺一帶陰山中雨雪不常或冰澌融入谿澗所致惟雷至四月始聞伏天多雹大者如盃七月已霜八月則無不雪所謂高處不勝寒可以驗天時矣臣秋濤謹案西清所記龍江風景甚詳北徼星度高至五十度以上者大抵皆然也錄之可備參考

附近北徼各處經緯度

均見會典欽天監事例

黑龍江城 北極高五十度一分偏東十度五

十八分

尼布楚城 北極高五十一度四十八分偏西

十七分 以上俱乾隆二十二年奏准

克嚕倫河巴爾城 北極高四十八度六分偏

西二度五十二分

圖拉河汗山 北極高四十七度五十七分偏

西九度十二分 以上俱康熙五十二年奏准

烏里雅蘇台 北極高四十七度四十八分偏

西二十二度四十分

唐努山烏梁海 北極高五十度四十分偏西

二十四度二十分

烏蘭固木杜爾伯特 北極高四十九度二十

分偏西二十五度四十分

科布多城 北極高四十八度二分偏西二十

七度二十分

阿爾泰山烏梁海 北極高四十八度三十分

偏西二十八度三十五分

阿爾泰諾爾烏梁海 北極高五十三度三十



分偏西二十八度四十分

哈屯河 北極高五十一度十分偏西二十九度

額爾齊斯河 北極高四十八度三十五分偏西三十二度二十五分

齋桑諾爾 北極高四十八度三十五分偏西三十二度二十五分

以上俱乾隆三十七年奏准

哈薩克 北極高四十七度三十分偏西三十四度五十分

塔爾巴哈台 北極高四十七度偏西三十度

以上俱乾隆二十二年奏准

巴爾噶什諾爾 北極高四十七度偏西三十

八度十分

特穆爾圖諾爾 北極高四十二度五十分偏

西三十九度二十分

吹河 北極高四十四度五十分偏西四十二

度 以上俱乾隆二十七年奏准

臣秋濤謹案以上經緯各度均係欽天監奉

百測定凡

皇輿全圖及每歲頒行時憲書皆依以立算茲謹錄  
附近北徼諸地則俄羅斯地之經緯度可以  
舉隅而得矣

俄羅斯境經緯度總載

俄羅斯本境在歐邏巴州之東緯綫自赤道北  
三十八度起至七十度止經綫自

京師偏西五十三度起至九十四度止其氣候南  
境與北境迥異北當冬時寒冽殊甚川有堅冰

日光所不照常覺晦冥夏時溽暑逼人雲霧四塞有晝無夜西南則天朗氣清無疾風暴雨故其富庶之地多在西南之域

俄羅斯東藩西伯利部在亞細亞州北境緯綫自赤道北四十五度起至七十八度止經綫自京師偏東七十四度起至偏西五十六度止氣候極冷冰雪凝積

俄羅斯南藩高加索部在亞細亞州西境緯綫自赤道北四十度起至四十五度止經綫自

京師偏西六十六度起至七十九度止氣候溫和  
俄羅斯屬地在亞墨利加州西北者緯綫自赤道北五十四度起至七十二度止經綫自

京師偏東七十七度起至百有三度止其地道光  
五年俄羅斯始議定疆界東至英吉利屬地西  
至白令海峽西南接大平洋北枕北冰海長四  
千里廣三千六百里

臣秋濤謹案右俄羅斯境經緯度本之西人地理全志其經度以

京師爲中綫蓋外夷而知尊

王之義者亟錄之以備攷至西人艾儒略地圖以極西之福島爲經綫第一度遞推而東至三百六十度止又西人瑪吉士地理備考以佛郎西國爲經度中綫推偏東偏西度皆不足爲訓概從刪斥不錄謹發其凡於此

俄羅斯境各屬經緯度

京師中綫偏東各度

偏東五十分北極高六十八度五十分 惹爾

莽阿和屯

偏東一度北極高七十三度 作祖和屯

偏東三度五十分北極高七十三度 郭列穆

斯歸和屯

臣秋濤謹案即疴哥德斯科一作阿谷又按此卷地名悉依內府與圖所列惟於一統志異域錄諸書習見之地則注明以備考餘詳疆域考

偏東四度五十分北極高七十四度 德爾吉

郭列穆斯歸和屯

偏東五度北極高七十四度五十分 佳達刮

噶珊

偏東五度五十分北極高七十五度 博特錫

倭爾斯歸和屯

偏東二十三度五十分北極高六十一度五十

分

噶穆薩特喀和屯

臣秋濤謹案卽岡札德加一作甘查甲

京師中綫偏西各度

偏西二度五分北極高六十八度四分 巴達

爾斯歸和屯

偏西四度二分北極高六十九度五十分 邁

歸和屯



偏西四度三十分北極高六十七度三十分

冬古爾斯歸和屯

偏西五度二十分北極高六十四度五十分

集敏噶噶珊

偏西五度五十分北極高五十八度二十分

巴爾古錫穆和屯

偏西五度五十分北極高五十七度 伊談珠

拜商

偏西五度五十分北極高五十六度二十分

烏德拜商 臣秋濤謹案  
卽烏的柏興

偏西六度四十分北極高六十七度三十分

列訥和屯

偏西六度四十分北極高五十一度三十分

伊拜商

偏西六度五十分北極高六十四度 鄂爾佛

拉特噶珊

偏西六度五十分北極高五十一度五十分

鄂伯爾齊都勒拜商

東方傳  
卷一  
三  
偏西六度五十分北極高六十九度二十分

惹鞠斯歸和屯

臣秋濤謹案卽亞古德斯科

偏西六度五十分北極高五十九度五十分

格勒噶珊

偏西七度十分北極高五十六度二十分 米

德里斯克噶珊

偏西七度四十分北極高五十四度 楚庫拜

商

臣秋濤謹案卽楚庫柏興

偏西七度五十分北極高六十一度十分 倭

爾郭任斯歸和屯

偏西八度二十分北極高五十九度十分 伊

爾古斯歸和屯

臣秋濤謹案卽義爾古德斯科亦作額爾口城一作厄爾

庫

偏西十一度二十分北極高五十九度五十分

博拉斯歸和屯

偏西十一度五十分北極高六十一度十分

伊林斯歸和屯

偏西十一度五十分北極高六十六度五十分

希穆斯歸和屯

偏西十二度五十分北極高五十三度五十分

通肯圖拉

偏西十九度北極高六十度五十分 噶們噶

噶珊

偏西十九度三十分北極高六十一度四十分

惹尼色斯歸和屯

臣秋濤謹案卽也尼塞  
斯科一作伊聶謝柏興

偏西二十一度四十分北極高六十度五十分

瑪古斯歸和屯

偏西二十一度五十分北極高五十八度五十

分 阿穆哈拜商

偏西二十一度五十分北極高五十六度五十

分 烏邁圖拉

偏西二十二度二十分北極高六十度五十分

鄂羅錫金噶珊

偏西二十二度五十分北極高六十度五十分

穆納薩爾噶珊

偏西二十四度北極高六十八度十分 德羅

伊特斯郭格珠克特亨

偏西二十四度四十分北極高六十八度三十分  
多羅三色吉和屯

偏西二十四度四十分北極高六十一度二十分  
色爾日噶珊

偏西二十六度五十分北極高五十九度十分

托穆斯歸和屯

臣秋濤謹案  
卽疇慕斯科

偏西二十七度北極高七十四度  
烏格里達

臣秋濤謹案此色楞格河  
入海處海船灣泊於此

偏西二十七度三十分北極高五十八度五十

分 阿巴圖拉

偏西二十七度四十分北極高五十七度四十

分 納生斯噶珊

偏西二十七度五十分北極高五十八度二十

分 蘇斯德必噶珊

偏西二十八度五十分北極高五十八度三十

分 博蘇噶珊

偏西二十八度三十分北極高六十九度 薩



達里莽阿斯和屯

偏西二十九度二十分北極高五十八度十分

吉爾日斯噶珊

偏西二十九度五十分北極高五十九度十分

德勒尼特斯噶珊

偏西三十度四十分北極高六十一度五十分

格野斯歸和屯

偏西三十度五十分北極高五十三度三十分

僧博羅特圖拉

偏西三十度五十分北極高六十二度二十分

納隆和屯

偏西三十度五十分北極高六十一度三十分

瓦欣阿噶珊

偏西三十一度二十分北極高六十度十分

拉林斯歸和屯

偏西三十一度二十分北極高五十一度四十

分 鏗格爾圖拉

偏西三十一度五十分北極高七十七度 伊

策三布拉島 臣秋濤謹案此北海中大島俄羅斯之極北境也

偏西三十二度五十分北極高六十二度四十

分 羅納郭昂噶珊

偏西三十三度五十分北極高五十九度三十

分 巴拉彬斯歸和屯

偏西三十四度五十分北極高六十四度二十

分 蘇爾古特和屯

偏西三十五度二十分北極高六十四度十分

瑪齊木噶珊